

দারুশ শাদীয



২



অধ্যাপক মাওলানা আবদুল মতিন

দারুল ইদার

২



অধ্যাপক মাওলানা আবদুল হাভিব

প্রকাশনায় :
সাহাল প্রকাশনী
৩০৮/১, খানজাহান আলী রোড,
তারের পুকুর, খুলনা।

প্রকাশ কাল :
শাবান : ১৪২৪ হিজরী
আশ্বিন ১৪১০ সন
অক্টোবর : ২০০৩ সাল

স্বত্বঃ লেখক
প্রচ্ছদ : অংকুর
স্যার ইকবাল রোড, খুলনা।

অক্ষর বিন্যাস
মাওঃ মোঃ আল-আমিন
দেশ কম্পিউটার
শামসুর রহমান রোড, খুলনা।

মুদ্রণে :
নবযুগ ছাপাখানা ও প্রকাশনী
২৯৮, খানজাহান আলী রোড, খুলনা।
ফোন : ৭২৩৯৬৭ (অনুঃ)

নির্ধারিত মূল্য : ৩০ টাকা

পরিবেশনায় :
সাহাল বুক কর্ণার
৩০৮/১, খানজাহান আলী রোড
তারের পুকুর, খুলনা।
ফোন : ৭২৩৯৬৭
মোবাইল : ০১৭১-৩৮৯০৭৬,
দোকানঃ ০১৭২-১০২৪২৭

প্রাপ্তিস্থান

- | | |
|--|--------------------------------------|
| ★ কেন্দ্রীয় জামায়াত প্রকাশনী, ঢাকা। | ★ তাসনিয়া বই বিতান, মগবাজার, ঢাকা। |
| ★ জামায়াত প্রকাশনী, ঢাকা মহানগরী। | ★ কাটাবন বুক কর্ণার, ঢাকা। |
| ★ জামায়াত প্রকাশনী, সাতক্ষীরা। | ★ সখী বিতান, হাতেম খান, রাজশাহী। |
| ★ জামায়াত প্রকাশনী, যশোর। | ★ একাডেমী কর্ণার, বিনোদপুর, রাজশাহী। |
| ★ প্রফেসরস বুক কর্ণার, মগবাজার, ঢাকা। | ★ আলআমিন লাইব্রেরী, সিলেট। |
| ★ আহসান পাবলিকেশন, মগবাজার, ঢাকা। | ★ কুরআন মহল, সিলেট। |
| ★ একাডেমী লাইব্রেরী দেওয়ানবাজার, চট্টগ্রাম। | ★ ইসলামিয়া লাইব্রেরী, বরিশাল। |

প্রকাশকের কথা

بِسْمِ اللَّهِ الرَّحْمَنِ الرَّحِيمِ

সমস্ত প্রশংসা আল্লাহ পাকের জন্য। যাঁর বিশেষ মেহেরবানীতে দারসে হাদীস দ্বিতীয় খন্ড প্রকাশ করতে সক্ষম হয়েছি। বিশিষ্ট লেখক জনাব অধ্যাপক মাওলানা আবদুল মতিন আল কুরআন এবং আল-হাদীসকে আধুনিক এবং সাধারণ শিক্ষিতদের কাছে সহজ সরল ভাষায় তুলে ধরার চেষ্টা অব্যাহত রেখেছেন। তারই অংশ হিসেবে দারসে হাদীস দ্বিতীয় খন্ডের পাভুলিপি তৈরী করেন। আমরা আশা করছি আধুনিক ও সাধারণ শিক্ষিত ইসলামী আন্দোলনের কর্মী ভাই বোনদের জন্য হাদীস নিজে বুঝা এবং অন্যকে বুঝানো সহজ হবে।

ইতোমধ্যে লেখকের লেখা দারসে কুরআন ১ম ও ২য় খন্ডসহ আরও ১০টি বই পাঠক পাঠিকাদের হাতে তুলে দেয়া হয়েছে। যা আধুনিক এবং সাধারণ শিক্ষিত পাঠক পাঠিকাদের মধ্যে সাড়া জাগিয়েছে। আমরা আশা করি লেখকের এই লেখার ধারাবাহিকতা অব্যাহত থাকবে। লেখকের জন্য আমরা দোআ করি আল্লাহপাক যেন তাঁর লেখার হাতকে আরও মজবুত করে দেন এবং আখেরাতে আদালতে নাজাতের অসীলা বানিয়ে দেন।

দারসে হাদীস দ্বিতীয় খন্ড বইটি নির্ভুলভাবে প্রকাশ করার চেষ্টা থাকা সত্ত্বেও ভুল-ত্রুটি থাকা স্বাভাবিক। এই অনিচ্ছাকৃত ত্রুটির জন্য সম্মানিত পাঠক-পাঠিকাদের কাছ থেকে ক্ষমা চেয়ে নিচ্ছি। সাথে সাথে এই আহবানও জানাচ্ছি যদি কোন ভুল-ত্রুটি দৃষ্টিগোচর হয়, তাহলে সরাসরি কিম্বা পত্রের মাধ্যমে অবহিত করলে আগামীতে সংশোধন করার চেষ্টা করবো ইনশাআল্লাহ।

আল্লাহ হাফিজ।

প্রকাশক

তারিখ : ১০ অক্টোবর ২০০৩

ভূমিকা

بِسْمِ اللَّهِ الرَّحْمَنِ الرَّحِيمِ

আল হামদুলিল্লাহি রাব্বিল আ'লামীন, অস্সালাতু অস্সালামু আ'লা সাইয়্যেদিল মুরসালীন, অআ'লা আলেহী আয্মায়ীন। আল্লাহ পাকের অশেষ মেহেরবাণীতে দারসে হাদীস দ্বিতীয় খন্ড প্রকাশ করতে পেরে তাঁরই দরগায় শুকরিয়া জ্ঞাপন করছি।

আল-কুরআনের ব্যাখ্যা হলো রাসূল (সাঃ)এর হাদীস। সুতরাং কুরআন বুঝতে হলে হাদীস সম্পর্কে জ্ঞান থাকতে হবে। তাই আমি আল্লাহর নবী (সাঃ) এর অসংখ্য হাদীস সমূহের মধ্য থেকে বাছাই করে আধুনিক এবং সাধারণ শিক্ষিতদের নিজে বুঝা এবং অপরকে বুঝানোর উপযোগী করে অত্যন্ত সহজ-সরল ভাষায় হাদীসের দারস লেখার উদ্যোগ গ্রহণ করি। আল্লাহ পাকের অশেষ মেহের বাণীতে ইতোমধ্যে দারসে হাদীস প্রথম খন্ড প্রকাশিত হয়েছে। যদিও সীমাবদ্ধ জ্ঞান নিয়ে হাদীসের দারস লিখতে ভয় পাচ্ছিলাম। তার পরও আল্লাহর উপর ভরসা রেখে এই কাজটি আঞ্জাম দেই এবং পরপর ১ম ও ২য় খন্ড লিখা এবং প্রকাশ করতে সক্ষম হই। দারসে হাদীসের আরও খন্ড পরবর্তীতে লেখা এবং প্রকাশিত হবে ইনশাআল্লাহ। ইতোমধ্যে আমার লেখা দারসে কুরআন ১ম ও ২য় খন্ড প্রকাশিত হয়েছে এবং তার আরও খন্ড লেখা হবে ইনশাআল্লাহ। এই জন্য আমি পাঠক-পাঠিকাদের দোআ এবং আল্লাহ পাকের সাহায্য কামনা করছি।

আমি দারসে হাদীস দ্বিতীয় খন্ড বইটি আধুনিক এবং সাধারণ শিক্ষিত ইসলামী আন্দোলনের ভাই-বোনদের দারস পেশ করার উপযোগী করে লেখার চেষ্টা করেছি। এই জন্য হাদীস নিজে বুঝা ও অপরকে বুঝানোর জন্য হাদীস সম্পর্কে প্রাথমিক ধারণা এবং হাদীস দারস দানের পদ্ধতি মূল দারস আরম্ভ করার পূর্বেই উল্লেখ করেছি। তাছাড়া হাদীসের সরল অনুবাদে সাথে সাথে শব্দার্থও লিখে দিয়েছি। বইটির আরও বিশেষ বৈশিষ্ট্য হলো দারসের উপস্থাপনা এমনভাবে করা হয়েছে যেন আপনি নিজেই স্রোতার সামনে দারস পেশ করছেন।

দারসে হাদীস দ্বিতীয় খন্ড বইটি লেখা এবং প্রকাশের ক্ষেত্রে যে সমস্ত হীতাকাংখী ভাই ও বোনেরা উৎসাহ, পরামর্শ এবং অর্থ দিয়ে সহযোগীতা করেছেন তাদের কাছে আমি চির কৃতজ্ঞ। এজন্য আল্লাহপাকের কাছে তাদের জন্য উত্তম প্রতিদান কামনা করছি।

লেখা ও ছাপার ক্ষেত্রে ভুল-ত্রুটি থাকা স্বাভাবিক। এজন্য যদি কোনো সুহৃদয় ব্যক্তির দৃষ্টিতে ভুল-ত্রুটি ধরা পড়ে তাহলে আমাকে সরাসরি অথবা পত্রের মাধ্যমে অবহিত করার জন্য আহবান জানাচ্ছি। পরবর্তীতে তা সংশোধন করে প্রকাশ করার চেষ্টা করবো ইনশাআল্লাহ।

পরিশেষে মহান আল্লাহ পাকের কাছে আমার আরজি, হে আল্লাহ তাবারাক ওয়া তাআলা, তোমার রাসূলের হাদীসের ব্যাখ্যা এবং শিক্ষা তুলে ধরতে যেয়ে যদি আমার অজান্তে কোন ভুল-ত্রুটি ও বারাবাড়ি হয়ে যায় তার জন্য তুমি আমাকে ক্ষমা করে দিও। আর আমার এই ক্ষুদ্র প্রচেষ্টাকে সাদকায়ে জারিয়া হিসেবে কবুল করে আখেরাতে আদালতে নাজাত দান করিও। আমীন!

মুহাম্মাদ আবদুল মতিন
প্রভাষক, ইসলামিক স্টাডিজ বিভাগ
দৌলতপুর কলেজ, খুলনা।

উৎসর্গ

কবরে চির শায়িত
আমার পরম প্রদ্বৈয়
মরহুম আব্বা-আম্মা
দাদা-দাদী, নানা-নানী
ও আত্মীয়-স্বজনেদের
মাগফিরাত কামনার্থে ।

সূচী পত্র

দ্বিতীয় খন্ড

<u>বিষয়ের নাম</u>	<u>পৃষ্ঠা</u>
● রাসূলুল্লাহ (সাঃ) এর কতিপয় গুরুত্বপূর্ণ উপদেশ	০৭
● ইসলামী আন্দোলন না করার পরিণতি	২৩
● জামায়াতবদ্ধ জীবন-যাপনের গুরুত্ব	৩৫
● দানকারীর প্রতিদান এবং কৃপণ ব্যক্তির পরিণতি	৪৭
● দুনিয়া ভোগীদের প্রতিফল ও দুনিয়া ত্যাগীদের প্রতিদান	৫৬
● যে সব আ'মল জান্নাত নিয়ে যায় এবং জাহান্নাম থেকে দূরে রাখে	৫৬
● রিয়া বা লোক দেখানো কাজ থেকে বাঁচার উপায়	৮৩
● আল্লাহ পাকের মহত্ব	৯৬
● মানুষ মানুষের কোনো উপকার এবং ক্ষতি করার ক্ষমতা রাখে না, সকল ক্ষমতা আল্লাহর	১১৪

দারসে হাদীস প্রথম খন্ডে যা আছে

- বিষয়ের নাম
- হাদীস সম্পর্কে প্রাথমিক ধারণা
 - সিহাহ্ সিত্তাহ্ ও তার গ্রন্থকারদের নাম
 - বিশিষ্ট রাবীদের নাম
 - হাদীস শাস্ত্রের কতিপয় পরিভাষা
 - হাদীস সংরক্ষিত কিভাবে হলো
 - হাদীস কিভাবে সংকলিত হলো
 - হাদীস দারস দেয়ার সমস্যা
 - হাদীস দারস দানের পদ্ধতি
- হাদীসের বিষয়
- বিশুদ্ধ নিয়াত
 - দায়-দায়িত্বের জবাবদিহীতা
 - ইসলামের মৌলিক ভিত্তি বা খুঁটি
 - হালাল-হারামের বাচ-বিচার এবং সন্দেহযুক্ত জিনিস পরিহার
 - ঈমানের শাখা-প্রশাখা
 - নারীদের বেশী জাহান্নামে যাবার কারণ
 - যে সব আ'মলের প্রতিদান কবরে পৌঁছতে থাকবে
 - সত্যবাদিতার প্রতিদান ও মিথ্যাচারিতার পরিণতি
 - হাশরের মাঠে আল্লাহর ছায়ায় যে সব মুমিন আশ্রয় পাবে

এক

রাসূলুল্লাহ (সাঃ) এর কতিপয় গুরুত্বপূর্ণ উপদেশ

نَحْمَدُهُ وَنُصَلِّي عَلَى رَسُولِهِ الْكَرِيمِ

بِسْمِ اللَّهِ الرَّحْمَنِ الرَّحِيمِ

عَنْ أَبِي ذَرٍّ قَالَ دَخَلْتُ عَلَى رَسُولِ اللَّهِ صَلَّى اللَّهُ عَلَيْهِ وَسَلَّمَ فَذَكَرَ الْحَدِيثَ بِطَوِيلِهِ إِلَى أَنْ قَالَ قُلْتُ يَا رَسُولَ اللَّهِ أَوْحَيْتَنِي - قَالَ أَوْ صِيكَ بِتَقْوَى اللَّهِ فَإِنَّهُ أَزِينُ لَأَمْرِكَ كُلِّهِ - قُلْتُ زِدْنِي؛ قَالَ عَلَيْكَ بِتِلَاوَةِ الْقُرْآنِ وَذِكْرِ اللَّهِ عَزَّ وَجَلَّ - فَإِنَّهُ ذَكَرَكَ فِي السَّمَاءِ وَنُورَكَ فِي الْأَرْضِ - قُلْتُ زِدْنِي، قَالَ عَلَيْكَ بِطَوِيلِ الصَّمْتِ فَإِنَّهُ مَطْرَدَةٌ لِلشَّيْطَانِ وَعَوْنٌ لَكَ عَلَى أَمْرِ دِينِكَ - قُلْتُ زِدْنِي، قَالَ وَإِيَّاكَ وَكَثْرَةَ الضَّحِكِ فَإِنَّهُ يُمِيتُ الْقَلْبَ وَيُذْهِبُ بِنُورِ الْوَجْهِ - قُلْتُ زِدْنِي قَالَ قُلِ الْحَقَّ وَإِنْ كَانَ مُرًّا - قُلْتُ زِدْنِي، قَالَ لَا تَخَفْ فِي اللَّهِ لَوْمَةً لَائِمَ - قُلْتُ زِدْنِي؛ قَالَ لِيَحْجِرَكَ عَنِ النَّاسِ مَا تَعْلَمُ مِنْ نَفْسِكَ - (بَيَّحَقِي)

অনুবাদ : হযরত আবু যার (রাঃ) থেকে বর্ণিত আছে, তিনি বলেনঃ একদা আমি রাসূলুল্লাহ (সাঃ) এর দরবারে হাজির হলাম। অতঃপর তিনি বিস্তারিত ভাবে (ঘটনা) বর্ণনা করলেন। বর্ণনাকালে এটাও উল্লেখ করেন যে, আমি আরম্ভ করলাম, হে আল্লাহর রাসূল (সাঃ), আমাকে কিছু উপদেশ দিন। তখন রাসূলুল্লাহ (সাঃ) বললেনঃ আমি তোমাকে উপদেশ দিচ্ছি যে, প্রত্যেকটা ব্যাপারে অন্তরে আল্লাহর ভয় রাখবে। কেননা ঐ একটা কথা (আল্লাহর ভয়) এর কারণে তোমার সমস্ত দীন সৌন্দর্য মণ্ডিত হয়ে যাবে।

পুনরায় আমি আরয করলাম, আরো কিছু উপদেশ দিন। রাসূলুল্লাহ (সাঃ) বললেনঃ তুমি কুরআন তিলাওয়াত (অধ্যয়ন) এবং আল্লাহর যিকির (স্মরণ) করতে থাকো। কেননা এ কাজের জন্য আসমানে তোমার কথা আলোচিত হবে এবং যমীনে তুমি সম্মান লাভ করবে। বললাম, আরো কিছু বলুন। রাসূলুল্লাহ (সাঃ) বললেনঃ তুমি প্রায়ই চুপ-চাপ অবস্থায় জীবন-যাপন করবে। কেননা এ অভ্যাস শয়তানের কাছে ঘেঁষতে দেয় না। আর দ্বীনের সব কাজে সহায়তা করে। আমি পুনরায় আরয করলাম, আরো কিছু উপদেশ দিন হে আল্লাহর রাসল (সাঃ) বললেনঃ বেশী হাসা-হাসি করো না। কেননা এতে অন্তর মরে যায় এবং চেহারার উজ্জ্বলতা কমে যায়। আরয করলাম, আরো কিছু নসিহত করুন। রাসূলুল্লাহ (সাঃ) বললেনঃ তিক্ত হলেও সর্বদা সত্য কথা বলবে। আমি আবার বললাম, আরো কিছু বলুন। রাসূলুল্লাহ (সাঃ) বললেনঃ আল্লাহর কাজে কোন তিরস্কারকারীর তিরস্কারের প্রতি দ্রুতক্ষেপ করবে না। আমি বললাম, আরো কিছু উপদেশ দিন। বললেনঃ তোমার মধ্যে যে দোষ-ত্রুটি আছে বলে তুমি মনে কর অন্যের সে দোষ-ত্রুটি নিয়ে সমালোচনা করো না। (বায়হাকী)

বিশেষ বিশেষ শব্দার্থ : قَالَ -বলেন। دَخَلْتُ -আমি প্রবেশ করলাম বা উপস্থিত হলাম। فَذَكَرَ -অতঃপর বর্ণনা করেন। قُلْتُ -বললাম। إِلَى -দিকে। بَطُولِهِ -বিস্তারিত ভাবে। الْحَدِيثُ -ঘটনা প্রবাহ। أَوْصِيَنِي -আমাকে নসিহত করুন বা উপদেশ দিন। يَا -হে বা ওহে। أَوْصِيَكُ -আমি তোমাকে উপদেশ দিচ্ছি। أَزَيْنُ -কেননা উহা। فَإِنَّهُ -আল্লাহর ভয়ের। بِتَقْوَى اللَّهِ -সৌন্দর্যমন্ডিত করে। لَأَمْرِكُ -তোমার (দ্বীনের) কাজকে। كَلِّهِ -উহার প্রত্যেকটি। زِدْنِي -আমাকে আরো উপদেশ দিন। عَلَيْكَ -তোমার উপর বা জন্য। وَ -এবং। تِلَاوَةِ الْقُرْآنِ -কুরআন তিলাওয়াত বা অধ্যয়ন। زَكَرَكَ -তোমার কথা আলোচিত হয়। فِي السَّمَاءِ -আল্লাহর যিকির বা স্মরণ। نُوْرَكَ -তোমার জন্য সম্মান।

-প্রায়ই চুপ-চাপ -بَطُولِ الصَّمْتِ। -যমীনে বা পৃথিবীতে -الْأَرْضِ
 থাকবে। -عَوْنُ لَكَ। -শয়তানকে ঘেষতে দেয় না। -مَطَرْدَةُ لِلشَّيْطَانِ।
 -তোমার জন্য সহায়ক হবে। -أَمْرِيْنِكَ। -তোমার দ্বীনের সব কাজ।
 -অন্তর মরে -يُمِيتُ الْقَلْبَ। -বেশী বেশী হাসা-হাসি। -كَثْرَةُ الْخِشْكِ
 যায় বা মৃত্যু ঘটে। -يُذْهِبُ بِنُورِ الْوَجْهِ। -চেহারার উজ্জ্বলতা কেড়ে নেয়
 বা লোপ পায়। -وَأِنْ كَانَ مُرًّا। -সত্য বলবে। -قُلِ الْحَقُّ
 তিক্ত বা কটু হয়। -لَا تَخَفْ فِي اللَّهِ। -আল্লাহর কাজে ভয় বা ভ্রঞ্জেপ
 করবে না। -لَيَحْجُزَنَّ عَنْكَ۔ -কোন তিরস্কারকারীর তিরস্কার। -لَوْ مَتَّ لَأَيِّمٍ।
 -যা তুমি -مَا تَعْلَمُ। -মানুষের দোষ-ত্রুটি সমালোচনা করো না। -النَّاسِ
 জানো। -مِنْ نَفْسِكَ। -তোমার নিজের মধ্যে (যে দোষ-ত্রুটি) আছে।

সম্বোধন : প্রিয় দ্বীনি/ইসলামী আন্দোলনের কর্মী ভায়েরা/ বোনেরা! আসসালামু
 আলাইকুম। আমি আপনাদের সামনে হাদীসের দারস পেশ করার জন্য হযরত
 আবু যার গিফারী (রাঃ) এর বর্ণিত হাদীসটি পাঠ ও অনুবাদ করেছি।
 আল্লাহপাক যেন আমাকে হাদীসটির ব্যাখ্যা এবং শিক্ষা তুলে ধরার তাওফীক
 দান করেন।

হাদীসটি বর্ণনার সময়কাল : আল-কুরআনের মতো হাদীস বর্ণনার সময়-কাল
 উল্লেখ করা কঠিন ব্যাপার। তার পরেও হাদীসের বিষয়বস্তু অনুযায়ী বলা যায়,
 সম্ভবতঃ হাদীসটি মক্কী যুগে রাসুলুল্লাহ (সাঃ) বর্ণনা করেছেন। তাছাড়া রাবী
 হযরত আবু যার গিফারী (রাঃ) ইসলাম গ্রহণকারীদের মধ্যে প্রথম শ্রেণীভুক্ত
 ছিলেন।

রাবী বা বর্ণনাকারীর পরিচয় : নাম-আবু যার গিফারী (রাঃ) এর প্রকৃত নাম
 বারির অথবা জুনদুব। লকব-মসিহুল ইসলাম। যহুদ, তাকুওয়া, আল্লাহ ও
 রাসূলের প্রতি ভালবাসার অবস্থার প্রেক্ষিতে রাসুলুল্লাহ (সাঃ) তাকে এই লকব
 দেন। তিনি বনু গিফার গোত্রের লোক ছিলেন। গিফার বিন মিবাল আবু যার
 (রাঃ) এর উর্ধ্বতন সপ্তম পুরুষের এক নেতৃস্থানীয় ব্যক্তি ছিলেন। তারই

নামানুসারে এই গোত্রকে গিফারী গোত্র বলা হতো। বানু গিফারের অবস্থান ছিলো মদীনা থেকে ৮০ মাইল দূরে বদরের পাশে। তার পাশের সড়ক দিয়েই মক্কার লোকেরা সিরিয়া ও ফিলিস্তিনে ব্যবসা-বাণিজ্যের জন্য যাতায়াত করতো।

পিতার নাম-জানাদাহ্। মাতার নাম-রানলাহ্ বিনতে রবিয়াহ্। তিনিও গিফার গোত্রের মহিলা ছিলেন।

ইসলাম গ্রহণ- আবু যার গিফারী (রাঃ) ইসলাম গ্রহণকারীদের মধ্যে পঞ্চম ব্যক্তি ছিলেন। তাঁর ইসলাম গ্রহণ সম্পর্কে শিক্ষণীয় ঘটনা রয়েছে। গিফার গোত্র ছিলো অত্যন্ত গরীব এবং অভাবী। তারা বাণিজ্য কাফেলা এবং আশপাশের কবিলা লুঠন এবং লুটতরাজের মাধ্যমে জীবন-যাপন করতো। প্রথমে আবু যার গিফারী (রাঃ)ও যুবকদের সাথে লুটতরাজ, হত্যা এবং রাহাজানির কাজে জড়িত ছিলেন। কিন্তু আল্লাহ্ তাঁকে জ্ঞানচক্ষু দান করেন। আবু যার লুটতরাজ, হত্যা এবং রাহাজানির প্রতি বিরূপ হয়ে যান। সেই সাথে কবিলার দেব-দেবী এবং মূর্তিদের প্রতিও বৃতশ্রদ্ধ হয়ে পড়েন। আল্লাহ্ তাঁকে তাওহীদের পথ দেখান এবং একক ভাবে দাওয়াত পাবার আগেই আল্লাহ্র ইবাদতে মশগুল থাকতে লাগেন। মুসলিম শরীফে আছে, আবু যার (রাঃ) নিজেই বর্ণনা করেন। “আমি রাতে নামাজের জন্য দাঁড়াতাম এবং দাঁড়িয়েই থাকতাম, এমনকি সকাল হয়ে যেত। সেই সময় আমি নিজেকে মাটিতে নিষ্ক্ষেপ করতাম এবং এমন ভাবে পড়ে থাকতাম যেন কোন কাপড় পড়ে আছে। আমার উপর যখন রোদ পড়তো তখন আমি উঠতাম”।

তিনি রাসূলের স্বাক্ষাৎ পাবার আগেই লাইলাহা ইল্লাল্লাহু কালিমা পড়তেন আর তার কবিলার লোকেরা আশ্চর্য হয়ে যেত এবং বলতো যে তাকে কোনো পাগলামীতে পেয়ে বসেছে। সে সময় মক্কাতেও রাসূলুল্লাহ্ (সাঃ) তাওহীদের দাওয়াতের কাজ শুরু করে দিয়েছেন। একদিন গিফার গোত্রের এক লোক মক্কা গেল। সেখানে তার কানে হকের দাওয়াত পৌঁছলো। ফিরে এসে আবু যার (রাঃ) কে বললোঃ আবু যার, তোমার মতই মক্কাতেও এক বক্তা লাইলাহা ইল্লাল্লাহু বলে থাকেন এবং লোকদেরকে মূর্তি পূজা থেকে নিষেধ করেন। আবু যার (রাঃ) একথা শুনে ব্যাকুল হয়ে পড়েন এবং নিজ ভাই উনাইসকে স্বাক্ষাতের জন্য মক্কাতে পাঠান। তিনি মক্কায় রাসূলুল্লাহ্ (সাঃ) কথা শুনে খুব প্রভাবিত হন এবং ফিরে এসে আবু যার (রাঃ) কে সব ঘটনা বললে তিনি সন্তুষ্ট

হতে না পেরে নিজেই মক্কা গমন করেন। মক্কা পৌঁছে আবু যার (রাঃ) কা'বাতে অবস্থান করেন। কিন্তু তিনি মুহাম্মদ (সাঃ) কে চিনতেন না। আবার তিনি পরিবেশের কারণে কাউকে জিজ্ঞেস করতেও পারছেন না। এভাবে কয়েকদিন চলে গেল। এদিকে হযরত আলী (রাঃ) তাকে এই অবস্থায় কয়েকদিন দেখে গোপনে তাকে মক্কা আগমনের কারণ জানতে চাইলেন। আবু যার (রাঃ) তাকে গোপনীয়তা রক্ষার শর্তে মহানবী (সাঃ) এর কথা জিজ্ঞেস করলেন। হযরত আলী (রাঃ) তার শর্ত পালনের প্রতিশ্রুতি দিয়ে তাকে সাথে নিয়ে রাসূলুল্লাহ (সাঃ) এর কাছে পৌঁছলেন। রাসূলুল্লাহ (সাঃ) কে তিনি দেখে বুঝে ফেললেন, ইনিই সেই চরম কাঙ্ক্ষিত ব্যক্তি মুহাম্মদ (সাঃ)। তিনি আল্লাহর রাসূলের কাছে দিনের দাওয়াতের বিষয় বিস্তারিত জানতে চাইলেন।

রাসূলুল্লাহ (সাঃ) তাকে ইসলাম সম্পর্কে এমন সুন্দর ভাবে বুঝালেন যে, সাথে সাথে আবু যার কালেমায়ে শাহাদাত পড়ে ইসলামের পঞ্চম স্তম্ভ হয়ে গেলেন। তার পূর্বে মাত্র চারজন ব্যক্তি ইসলাম কবুল করেছিলেন। তাঁরা হলেন (১) হযরত খাদিজা (রাঃ), (২) হযরত আবু বকর (রাঃ), (৩) হযরত আলী (রাঃ) এবং (৪) হযরত য়ায়েদ বিন হারিসা (রাঃ)।

ইসলাম কবুলের পর রাসূলুল্লাহ (সাঃ) তাকে নিজ কবিলায় চলে গিয়ে ইসলাম প্রচারের জন্য বললেন এবং বর্তমানে মক্কাতে নিজের ইসলাম গ্রহণের কথা গোপন রাখতে পরামর্শ দিলেন। কিন্তু আবু যার (রাঃ) পূর্ব থেকেই তাওহীদের আবেগে পূর্ণ ছিলেন। তাইতো তিনি আবেগ প্রবন হয়ে কাবা ঘরে ছুটে গিয়ে কাফেরদের মজলিসের সামনেই কালিমার ঘোষণা দিয়ে দিলেন। সাথে সাথে মুশরিক কাফেরদের দল ভীমরুলের মতো চারদিক থেকে ঘেরাও করে মারতে মারতে রক্তাক্ত করে ফেললো। এমতাবস্থায় হযরত আব্বাস (রাঃ) (তখনও তিনি ইসলাম কবুল করেননি) এসে হাজির হয়ে তাকে উদ্ধার করলেন। কিন্তু তাওহীদের পাগল হযরত আবু যার পুনরায় দ্বিতীয় দিন কাবা ঘরের সামনে গিয়ে কাফেরদের উপস্থিতিতেই কালেমার দাওয়াত দিলে পুনরায় কাফেরেরা তাকে ধরে নির্যাতন শুরু করলো। এবারও আব্বাস (রাঃ) তাকে উদ্ধার করে বললেন : এ কোন গোত্রের লোক জানো? এ হচ্ছে ডাকাত, যুদ্ধবাজ, রক্তপিপাসু গিফার গোত্রের লোক। তোমরা যদি তাকে মেরে ফেলো তাহলে তোমাদের বাণিজ্যিক কাফেলা চলাচল চিরতরে বন্ধ হয়ে যাবে। গিফারীদের সঙ্গে খামাখা শত্রুতা কেন কিনে নিচ্ছে! এতে কাফেরেরা বুঝতে পারলো এবং তাকে

নির্যাতন করা থেকে সরে গেল।

আবু যার বুঝতে পারলেন যে, মক্কায তার কথায় কোন আসর হবে না। তাই তিনি স্বদেশে রওয়ানা দেন এবং নিজ গোত্রে পৌঁছে সর্বপ্রথম দুই ভাই এবং মা'কে তাওহীদের দাওয়াত দিলে তারা তিনজনই মুসলমান হয়ে যায়। অতঃপর তিনি নিজ কবिलाকে ইসলামের আহবান জানালে অর্ধেক গোত্র তখনই মুসলমান হয়ে যায় এবং বাকী অর্ধেক মহানবী (সাঃ) এর হিজরাতের পর ঈমান আনে।

মৃত্যুঃ হযরত উসমান (রাঃ) এর খিলাফত কালে আবু যারের সাথে (কউর ধ্যান-ধারণার কারণে) তাঁর মতানৈক্য হলে তিনি তাকে রাবযাহ নামক নির্জন স্থানে গিয়ে বসবাসের পরামর্শ দেন। তিনি সেই পরামর্শ মোতাবেক পরিবার নিয়ে সেখানে বসবাস শুরু করেন। ৩১ অথবা ৩২ হিজরীতে আবু যার গিফারী (রাঃ) কঠিন রোগে আক্রান্ত হয়ে পড়েন এবং এই বীরান ভূমিতেই একাকী নিজ স্ত্রী এবং মেয়ের সামনে ইন্তেকাল করেন।

হাদীস বর্ণনার সংখ্যা : হযরত আবু যার (রাঃ) রাসূলুল্লাহ (সাঃ) এর খুব কাছের লোক হলেও তাঁর বর্ণিত হাদীসের সংখ্যা খুব বেশী নয়। তার বর্ণিত হাদীসের সংখ্যা- মাত্র ২৮১টি। (আসহাবে রাসূলের জীবন কথা)।

ব্যাখ্যা : প্রিয় ভায়েরা/বোনেরা! এতক্ষণ পর্যন্ত আপনাদেরকে হাদীসের অনুবাদ সহ প্রাথমিক ধারণা দেয়া হলো। এখন আপনাদের সামনে হাদীসটির প্রয়োজনীয় ব্যাখ্যা পেশ করছি।

একদা রাবী হযরত আবু যার গেফারী (রাঃ) রাসূলুল্লাহ (সাঃ) এর খেদমতে হাজির হয়ে কিছু নসিহত বা উপদেশ প্রদানের আবেদন জানালে রাসূলুল্লাহ (সাঃ) নিম্নের গুরুত্বপূর্ণ উপদেশগুলো পর পর দিতে থাকেন। আর প্রায় প্রতিটি উপদেশের প্রভাবের কথাও উল্লেখ করেন। হযরত আবু যার (রাঃ) আবেদন করেন : يَا رَسُولَ اللَّهِ (ص) أَوْصِنِي হে আল্লাহর রাসূল (সাঃ) আমাকে কিছু উপদেশ দিন। রাসূলুল্লাহ (সাঃ) তার আবেদনের প্রেক্ষিতে কতিপয় গুরুত্বপূর্ণ উপদেশ দেন।

প্রথম উপদেশ : أَوْصِيكَ بِتَقْوَى اللَّهِ আমি তোমাকে উপদেশ দিচ্ছি যে, প্রত্যেকটি বিষয়ে অন্তরে আল্লাহর ভয় রাখবে। রাসূলুল্লাহ (সাঃ) এর প্রথম উপদেশটি এমন এক গুরুত্বপূর্ণ যা একজন মুমিনের ঈমান আনার পরই থাকা উচিত।

তাকওয়া কি ? **تَقْوَى** আরবী শব্দটি **وَقَايَةُ** শব্দ থেকে উৎপত্তি হয়েছে। যার অর্থ- ভয় করা, বিরত থাকা, আত্মরক্ষা করা, সাবধান হওয়া, আত্মশুদ্ধি, পরহেযগারী, নিজেকে কোন বিপদ থেকে বাঁচিয়ে রাখা বা কোন অনিষ্ট হতে নিজেকে দূরে রাখা ইত্যাদি। সাধারণ অর্থে আল্লাহর ভয় বা ভীতিকে তাকওয়া বলা হয়। ফারসী ভাষায় তাকওয়াকে বলা হয় পরহেজগারী। ইসলামী পরিভাষায় ব্যক্তি ও সামষ্টিক জীবনে ইসলামী বিধানে নিষিদ্ধ সকল প্রকার কথা, কাজ ও চিন্তা পরিহার করে কুরআন ও সুন্নাহর নির্দেশ মতো জীবন যাপনের মাধ্যমে আল্লাহকে প্রতিনিয়ত প্রেমমাখা ভয় করে চলাকে তাকওয়া বলা হয়।

তাকওয়া সম্পর্কে প্রচলিত ধারণা : আমাদের সমাজে অধিকাংশের মধ্যে ইসলামের সঠিক জ্ঞান না থাকার কারণে তাকওয়া বা পরহেজগারী সম্পর্কে ধারণা হলো বাহ্যিক বেশভূষা। যার মুখে লম্বা দাড়ি, মাথায় পাগড়ী, হাতে তসবীহ এবং গায়ে লম্বা জামা থাকে তাকেই মুত্তাকী বা পরহেজগার বলে মনে করে থাকে। অথচ শরীয়তে তাকওয়ার ব্যাখ্যা দিতে গিয়ে বাহ্যিক দিকের প্রতি তেমন গুরুত্ব দেয়নি। প্রকৃত পক্ষে তাকওয়া হলো অন্তরে বা দেলে আল্লাহর ভয়। আল্লাহর নবী (সাঃ) সাহাবাদের সামনে প্রায়ই তাকওয়ার ওয়াজ করতে গিয়ে তিনি তাঁর বুকের দিকে ইশারা করে বলতেনঃ **اَتَّقُوا ۚ هَاهُنَا**

তাকওয়া হলো এখানে। অর্থাৎ দেলের মধ্যে। অত্র হাদীসেও উল্লেখ করা হয়েছে তুমি সব সময় অন্তরে আল্লাহর ভয় রাখবে।

তাকওয়ার প্রভাব : মহানবী (সাঃ) তাকওয়া বা অন্তরে আল্লাহর ভয় রাখার নসিহতের সাথে সাথে তার প্রভাবের কথাও উল্লেখ করে বলেন :

كَيْفَ কেননা ঐ একটা কথা বা গুণের কারণে তোমার সমস্ত আমল সৌন্দর্যমন্ডিত হয়ে যাবে। এটা একটা বিজ্ঞচিত এবং ব্যাপক অর্থবোধক কথা। কেননা দেলের মধ্যে যদি ‘খওফে এলাহী’ বা ‘আল্লাহর ভয়’ থাকে তাহলে তার মন-মগজ, অন্যায় বা পাপ কাজের কোন চিন্তা বা পরিকল্পনা করতে পারে না। তার চোখ কু-দৃষ্টি নিক্ষেপ করতে পারে না বা কূপথে চলার জন্য পথ দেখাতে পারে না। তার জিহ্বা বা জবান কোন কটু এবং অশ্লীল কথা বা শব্দ উচ্চারণ করতে পারে না। তার হাত কোন অন্যায় বা পাপ কাজে বাড়াতে পারে না। তার পা কোন অন্যায়, অপকর্ম এবং পাপ কাজের দিকে এক কদমও চলতে পারে না। তার দেহ কোন অন্যায় ভোগ-

বিলাসে লিপ্ত হতে পারে না। তার যৌন চাহিদা অন্যায় এবং অবৈধ পথে মিটাতে পারে না। তার অন্যান্য ঋপুগুলো অন্যায় ও অবৈধ পথ থেকে বিরত থাকে। সুতরাং দেখা যাই এই একটা তাকুওয়ার গুণের কারণে তার দেহের প্রতিটি অঙ্গ-প্রত্যঙ্গ এমন ভাবে দ্বীন তথা আল্লাহর বিধি-বিধান মানার জন্য অনুগত হয়ে যায়, যা অন্য কোন বিষয় দ্বারা সম্ভব নয়। তাই আল্লাহর রাসূল (সাঃ) তাকুওয়ার উপদেশ দিয়ে তার ব্যাপক প্রভাবের কথা বলতে গিয়ে বলেন, এর জন্য তোমার সকল আ'মল সৌন্দর্যমন্ডিত হয়ে যাবে।

দ্বিতীয় উপদেশ : অত্র হাদীসে রাবী আবু যার গিফারী (রাঃ) আল্লাহর নবীকে আরও নসিহত বা উপদেশ দেবার জন্য আবেদন জানালে তিনি বললেন :

عَلَيْكَ بِتِلَاوَةِ الْقُرْآنِ وَذِكْرِ اللَّهِ عَزَّ وَجَلَّ-

তুমি কুরআন তিলাওয়াত (অধ্যয়ন) এবং আল্লাহর যিকির (স্মরণ) করতে থাকো। এই উপদেশ বাণীতে দু'টো আ'মল বা কাজের কথা বলা হয়েছে। একটি হলো কুরআন তিলাওয়াত এবং অপরটি হলো আল্লাহর যিকির।

কুরআন তিলাওয়াত : আমাদের সমাজে কুরআন তিলাওয়াত অর্থ বুঝে থাকে কুরআন সূর দিয়ে পড়া। আসলে এতে কুরআন তিলাওয়াতের সঠিক অর্থ বুঝায় না। কুরআন তিলাওয়াত অর্থ হলো কুরআন অধ্যয়ন করা। অর্থাৎ কুরআনের অর্থ ও ভাব বুঝে সুন্দরভাবে পড়া এবং তার সাথে শিক্ষা গ্রহণ করা। তার কারণ হলো, কুরআন আরবীতে আরব দেশে নাথিল হয়। তারা আরবীর অর্থ জানার কারণে কুরআন পড়লেই তারা অর্থ এবং ভাব বুঝে ফেলতো। এই জন্য তিলাওয়াত অর্থই হলো কুরআন পড়ার সাথে সাথে তার অর্থ এবং ভাব অনুধাবন করা। আর এটাকেই বলা হয় কুরআন অধ্যয়ন, যার মাধ্যমে কুরআনের সঠিক জ্ঞান এবং বুঝ সৃষ্টি হয়।

আল্লাহর যিকির : আমাদের সমাজে এক শ্রেণীর মানুষ যিকির অর্থ বুঝে থাকে খানকায় বা মসজিদে কোন এক বিশেষ সময়ে জমায়েত হয়ে চোখ বন্ধ করে, মাথা নীচু করে, মুরাকাবা-মুশাহাদার মাধ্যমে কলব জারি করে বিকট শব্দে ٱللَّهُ-ٱللَّهُ বলা। আসলে যিকির অর্থ এটা নয়। যিকির অর্থই হলো আল্লাহর স্মরণ। আল্লাহকে সকল সময় সকল অবস্থায় হাজির নাজির জানা। চলা-ফেরায়, উঠা-বসায়, শয়নে, কাজে-কামে সকল অবস্থায় আল্লাহকে স্মরণ রাখা। তবে হ্যাঁ, স্বরবে বা উচ্চারণের মাধ্যমেও যিকির করা যায়। কেননা যিকির

দু'প্রকার : (i) যিকিরে ক্বালবী বা অন্তরের যিকির এবং (ii) যিকিরে লিসানী বা জিহ্বা কিষা মুখের যিকির। অর্থাৎ একজন মুমিন সদা-সর্বদা আল্লাহর কথা মনের মধ্যে স্মরণ রাখবে, কোন সময়েই ভুলে যাবে না। তাছাড়াও মাঝে মাঝে এবং অবসর সময়ে **سُبْحَانَ اللَّهِ** (আল্লাহ পবিত্র) **الْحَمْدُ لِلَّهِ** (সব প্রশংসা আল্লাহর) **اللَّهُ أَكْبَرُ** (আল্লাহ মহান বড়) **سُبْحَانَ اللَّهِ** (আল্লাহ পবিত্র এবং সব প্রশংসা তারই) **وَبِحَمْدِهِ** (মহান আল্লাহর পবিত্রতা) ইত্যাদি বাক্য উচ্চারণ করে যিকির করা যায়। তবে মাইক লাগিয়ে একই সাথে বসে বিভিন্ন অঙ্গ-ভঙ্গির মাধ্যমে যিকির করা যাবে না। এটা সুন্নতের খেলাপ। কেননা এর দ্বারা রিয়া পয়দা হয়। মহান আল্লাহ নীরবে এবং স্বরবে যিকির করার তাগাদা এবং পদ্ধতি উল্লেখ করে বলেন :

وَإِذْكُرْ رَبَّكَ فِي نَفْسِكَ تَضَرَّعًا وَخِيفَةً وَدُؤُنَ الْجَهْرِ مِنَ الْقَوْلِ بِالْغُدُوِّ وَالْآصَالِ وَلَا تَكُنْ مِنَ الْغَافِلِينَ-

আর যিকির (স্মরণ) করতে থাকো নিজ মনিবকে মনে মনে, কাঁদো কাঁদো ও ভীত-সন্ত্রস্ত অবস্থায় এবং অনুচ্চ স্বরে সকাল-সন্ধ্যায় (অর্থাৎ সারাদিন-রাত)। আর (যিকির না করে) গাফেলদের দলভুক্ত হয়ে যেওনা। (সুরা আ'রাফ-২০৫)

কুরআন তিলাওয়াত ও যিকিরের প্রভাব : অত্র হাদীসে মহানবী (সাঃ) কুরআন তিলাওয়াত এবং আল্লাহর যিকিরের প্রভাব এর কথা উল্লেখ করে বলেনঃ

فَإِنَّهُ يَذْكُرُكَ فِي السَّمَاءِ وَنُورُكَ فِي الْأَرْضِ-

কেননা এই আ'মলের কারণে আসমানে তোমার কথা আলোচিত হবে এবং যমীনে তুমি সম্মান লাভ করবে।

(i) আসমানে তোমার কথা আলোচিত হবে এর দু'টি অর্থ হতে পারে।

এক. যারা কুরআন তিলাওয়াত (অধ্যয়ন) এবং যিকির (স্মরণ) করবে তাদের এই অভ্যাস বা আ'মলের কারণে আল্লাহ নিজেই গর্ববোধ করে আসমানের ফেরেশতাদের বলবেন, দেখ দেখ আমার বান্দারা কুরআন তিলাওয়াত এবং

যিকিরের মাধ্যমে আমাকে স্মরণ করছে এবং গুণগান করছে।

হাদীসে আছে বান্দা যখন কোন ভাল কাজ করে তখন আল্লাহ প্রথমে নিজেই তার প্রশংসা করেন এবং তার পরে ফেরেশতাদেরকে অবহিত করেন। এজন্য নিজেই নিজের আ'মল প্রকাশ না করা উচিত।

দুই. দ্বিতীয় অর্থ এও হতে পারে, আসমানের ফেরেশতারা নিজেরাই নিজেদের মধ্যে উক্ত ব্যক্তির এই আ'মলের জন্য আলোচনা করবে, প্রশংসা করবে এবং তার জন্য কল্যাণের দোআ করবে।

(ii) কুরআন তিলাওয়াত ও আল্লাহর যিকিরের দ্বিতীয় প্রভাব হলো যমীনে অর্থাৎ পৃথিবীতে সম্মান-শ্রদ্ধা লাভ করবে। কেননা যখন কোন বান্দা কুরআন তিলাওয়াত বা অধ্যায়নের মাধ্যমে তার প্রকৃত জ্ঞান এবং শিক্ষা অর্জন করে বাস্তব জীবনে আ'মল করবে তখন সে একজন ভাল এবং উত্তম মানুষে পরিণত হবে। আর যিকির বা সার্বক্ষণিক আল্লাহকে স্মরণের মাধ্যমে যখন সে তার প্রতিটি কাজকে সুন্দর করবে, তার আ'মল আখলাক সুন্দর হবে, চরিত্র এবং নীতি নৈতিকতা সৃষ্টি হবে তখন সে সমাজে উত্তম মানুষ হিসেবে আবির্ভূত হবে। আর তার এই উত্তম আ'মল এবং চরিত্রের কারণে মানুষ তাকে সম্মান এবং শ্রদ্ধা করবে। যেমন রাসূলুল্লাহ (সাঃ) কে তাঁর দুঃখমনেরাও সম্মান করতে বাধ্য হয়েছিলো।

তৃতীয় উপদেশ : বর্ণনাকারী আরও নসিহতের জন্য আরয করলে আল্লাহর নবী

(সাঃ) বললেন : عَلَيْكَ بِكُؤُلِ الصَّامِتِ -

তুমি প্রায়ই চুপ-চাপ অবস্থায় জীবন যাপন করবে। এই উপদেশের মধ্যেও দু'টি অর্থ হতে পারে—

এক. নিশ্চুপ অবস্থায় জীবন যাপন অর্থ বেশী-বেশী বা অতিরঞ্জিত কথাবার্তা না বলা। অহেতুক এবং অপ্রয়োজনীয় কথাবার্তায় জড়িয়ে না পড়া। মেপে মেপে কথা বলা। কেননা কথা বেশী বললে বেশী ভুল হয়।

দুই. নিশ্চুপ জীবন যাপন মানে সাদা-সিঁদে, চুপ-চাপ জীবন যাপন করা। বেশী আড়ম্বরপূর্ণ জাক-জমক জীবন যাপন না করা। বরং স্বাভাবিক জীবন যাপন করা। এমন জীবন যাপন যে জীবন-যাপনে কোন রীয়া বা অহমিকা পয়দা হয় না।

চুপ-চাপ জীবন যাপনের প্রভাব : অধিক সময় চুপ-চাপ জীবন যাপন করলে তার ফায়দা বা প্রভাব বলতে গিয়ে রাসূলুল্লাহ (সাঃ) দু'টি প্রভাবের কথা উল্লেখ করেছেন।

প্রথম প্রভাব : **فَإِنَّهُ مَطْرَدَةٌ لِالشَّيْطَانِ** কেননা এ অভ্যাস শয়তানকে কাছে ঘেঁষতে দেয় না। শয়তানের কাজ বা কৌশল হলো বান্দাকে অন্যায় এবং পাপের পথে নিয়ে আসা। সুতরাং যখন কেউ চুপ-চাপ জীবন যাপন করে তখন সে বেশী সতর্ক থাকে, ভাল-মন্দ কথা-কাজের পার্থক্য করতে পারে, শয়তান অস্বাভাবিক দেবার সুযোগ পায় না। যার ফলে সে কোন অশ্লীল, পাপ এবং অন্যায় কথায় জড়িয়ে পড়ে না। আর বান্দার এই অভ্যাসের কারণে শয়তান কাছে ঘেঁষার সুযোগই পায় না। তাছাড়া কেউ চুপ-চাপ অনাড়ম্বরপূর্ণ জীবন যাপন করলে তার মধ্যে রীয়া বা অহংকার পয়দা হয় না। শয়তানের তো বড় দোষ হলো সে মহা অহংকারী এবং দাষ্টিক। সুতরাং এই গুণের কারণে শয়তান কাছে ঘেঁষতে সুযোগ পায় না। ফলে শয়তানেরও কোন ফায়দা হয় না। আর মানুষ যদি বেশী চুপ-চাপ থাকে, কম কথা বলে, মেপে মেপে কথা বলে, তখন কথায় কম ভুল হয়। অশ্লীল কথা বের হয় না। গীবত, পরনিন্দা, পরচর্চার মতো অন্যায় ও পাপ কথার চর্চা হয় না। ফলে শয়তানের যে মিশন তা ব্যর্থ হয়ে যায়।

দ্বিতীয় প্রভাব : **وَعَوْنٌ لَّكَ عَلَى أَمْرِ دِينِكَ** আর তোমার ধর্মের সব কাজে সহায়তা করে। কেউ যদি প্রায়ই সময় চুপ-চাপ জীবন যাপন করে, তবে তার ধর্মের কাজে তা সহায়ক হয়। এই অভ্যাসের জন্য ধর্ম তথা জীবন বিধান ইসলামের প্রতিটি কাজের চিন্তা-ভাবনা করতে পারে। পরিকল্পনা নিতে পারে। আবেগমুক্ত হয়ে ইসলামের প্রতিটি কাজ আঞ্জাম দিতে পারে। তাড়াহুড়া করে না। অস্থিরতা সৃষ্টি হয় না। সুতরাং ধর্মের প্রতিটা কাজ সুন্দর এবং সূচারু রূপে বাস্তবায়ন করতে পারে।

চতুর্থ উপদেশ : আবু যার আরো উপদেশের জন্য আবেদন করলে রাসূলুল্লাহ্

(সাঃ) বললেনঃ **وَإِيَّاكَ وَكَثْرَةَ الضَّحْكِ -**

তুমি বেশী বেশী হাসা-হাসি করবে না। এখানে উপদেশ দিতে গিয়ে রাসূলুল্লাহ্ (সাঃ) বেশী বেশী হাসা-হাসি করতে নিষেধ করেছেন। কেননা মুমিনদের জন্য দুনিয়ার এই জীবন হাসি-তামাসার জন্য নয়। বরং আখেরাতে নাযাতের জন্য প্রস্তুতির জায়গা। যেমন কোন ব্যক্তি যখন কোন গন্তব্যে পৌঁছার জন্য প্রস্তুতি নেয়, যেই গন্তব্যে ঝুঁকি আছে। তখন সে অত্যন্ত আনন্দ-ফুটির সাথে প্রস্তুতি গ্রহণ করে না। বরং অত্যন্ত পেরেশানী নিয়ে চিন্তা-ভাবনা এবং

সতর্কতার সাথে প্রস্তুতি গ্রহণ করে। অনুরূপভাবে দুনিয়ার এই জীবন হলো মানুষের চূড়ান্ত টার্গেটে পৌঁছার প্রস্তুতির জায়গা। আল্লাহর রাসূল বলেনঃ **الدُّنْيَا هَلْوَ آخِرَاتِهِ (প্রস্তুতির) ক্ষেত** বা জায়গা। মানুষ যদি দুনিয়ার এই জীবনে সঠিকভাবে প্রস্তুতি গ্রহণ করতে পারে তা হলে আখেরাতের জীবনের সফলতা লাভ করে চির সুখে জান্নাতে স্থায়ীভাবে বসবাস করবে। আর যদি এখানে প্রস্তুতি নিতে ভুল হয়ে যায়, তাহলে পরকালের কঠিন শাস্তির জায়গা জাহান্নামে যেতে হবে। তাইতো নবী পাক (সাঃ) তার সাহাবাদেরকে হাসা-হাসির প্রসঙ্গে উপদেশ দিতে গিয়ে বলেনঃ তোমরা যদি দোষের শাস্তি স্বচক্ষে দেখতে তাহলে কম হাসতে এবং বেশী বেশী কাঁদতে। বেশী বেশী হাসার প্রভাব : মহানবী (সাঃ) বেশী বেশী হাসার প্রভাব বা পরিণতি সম্পর্কে বলতে গিয়ে বলেনঃ

كَانَ يَمِيتُ الْقَلْبَ وَيَذْهَبُ بِنُورِ الْوَجْهِ কেননা তাতে অন্তরের মৃত্যু ঘটে এবং চেহারার উজ্জ্বলতা লোপ পেতে থাকে। এখানে বেশী বেশী হাসা-হাসির প্রভাবের কারণে দু'টি ক্ষতির কথা বলা হয়েছে।

প্রথম ক্ষতি : অন্তরের মৃত্যু ঘটে। অর্থাৎ বেশী বেশী হাসা-হাসির কারণে অন্তর মরে যায়। অন্তরে ধারণ ক্ষমতা থাকে না। পরকালের কথা মনে পড়ে না। অন্তরে জাহান্নামের ভয় সৃষ্টি হয় না। সব সময় যদি হাসা-হাসি এবং আনন্দ-ফুর্তিতে থাকে তাহলে তার জীবন সম্পর্কে চিন্তা-ভাবনা করার সুযোগ করতে পারে না। যার ফলে সে আত্মভোলা ও আত্মহারা হয়ে অন্যায়-অপকর্মে জড়িয়ে পড়ে এবং দুনিয়াদারীতে ব্যস্ত হয়ে যায়। যার ফলে তাকে জাহান্নামে যেতে হয়।

দ্বিতীয় ক্ষতি : বেশী বেশী হাসা-হাসির কারণে চেহারার উজ্জ্বলতা কমে যায়। এটা একটা তাত্ত্বিক কু-প্রভাব। বেশী বেশী হাসা-হাসির কারণে মানুষের চেহারার যে লাবণ্য বা উজ্জ্বলতা থাকে তা মলিন হয়ে যায়। যে আল্লাহকে বেশী বেশী স্মরণ করে তার চেহারায় নূরের একটা উজ্জ্বলতা ফুটে উঠে। কিন্তু যখন সে হাসা-হাসির মধ্যে জীবনকে অতিবাহিত করে তখন সে আল্লাহর স্মরণ থেকে গাফেল হয়ে পাপাচারে জড়িয়ে পড়ে। ফলে তার চেহারায় যে নূর বা উজ্জ্বলতা থাকে তা লোপ পেয়ে যায়।

পঞ্চম উপদেশ : আবু যার গিফারী (রাঃ) আবারও নসিহতের জন্য আরয করলে রাসূলুল্লাহ্ (সাঃ) বললেন : **قُلِ الْحَقُّ وَإِنْ كَانَ مُرًّا**

তিক্ত বা কটু হলেও সदा-সর্বদা হক বা সত্য কথা বলবে। এটি একটি অত্যন্ত গুরুত্বপূর্ণ নসিহত, যা মানুষ অনেক সময় অনেক ক্ষেত্রে সত্য বলতে চায় না। সেটা ভয়ের কারণে হতে পারে, অথবা চক্ষু লজ্জার কারণে হতে পারে, আবার ব্যক্তি স্বার্থের কারণেও হতে পারে। এ জন্যই কিন্তু আল্লাহর রাসূল (সাঃ) সত্যের উপদেশ দিতে গিয়ে বলেনঃ তিক্ত বা অসন্তুষ্টির কারণ হলেও সত্যকথা বলবে। প্রবাদ আছে **قُلِ الْحَقُّ مُرًّا** হক বা সত্য কথা তিতো।

কেননা হক বা সত্য কথা বা সত্য ঘটনা বর্ণনা করলে মানুষের স্বার্থে বা সম্মানে আঘাত লাগে। ফলে সে অসন্তুষ্ট হয়ে যায়। কিন্তু রাসূলুল্লাহ্ (সাঃ) স্বার্থবাজদের এই অসন্তুষ্টিকে উপেক্ষা করে নির্দিধায় সত্য কথা, সত্য বিবৃতি, সত্য ভাষণ, সত্য স্বাক্ষী, সত্য ঘটনা বর্ণনা করতে নির্দেশ দিয়েছেন।

সত্যবাদিতা মুমিনের একটা বিশেষ গুণ। কেননা সত্যবাদিতা মানুষকে জান্নাতে পৌঁছিয়ে দেয়। এই মর্মে মহানবী (সাঃ) অপর এক হাদীসে বলেন :

عَلَيْكُمْ بِالصِّدْقِ فَإِنَّ الصِّدْقَ يَهْدِي إِلَى الْبِرِّ وَإِنَّ الْبِرَّ يَهْدِي إِلَى الْجَنَّةِ-

তোমরা সदा সত্য বলবে। কেননা সত্যবাদিতা নেকী'র দিকে নিয়ে যায় এবং নেকী জান্নাতে পৌঁছিয়ে দেয়। (বুখারী মুসলিম)

ষষ্ঠ উপদেশ : রাবী পুনরায় নসিহতের জন্য আবেদন করলে রাসূলুল্লাহ্ (সাঃ) বললেন :

لَا تَخَفْ فِي اللَّهِ لَوْ مَآ لَأَيِّم

তুমি আল্লাহর কাজে কোন তিরস্কারকারীর তিরস্কারকে ভ্রঞ্জেপ বা পরওয়া করবে না। আল্লাহর কাজ তথা আল্লাহর দ্বীনের কাজ। আল্লাহর দ্বীন পালন বা প্রতিষ্ঠার কাজ করতে গেলেই কেবলমাত্র বিরোধীরা তিরস্কার বা ঠাট্টা-বিদ্রূপ করে থাকে। যেমন রাসূলুল্লাহ্ (সাঃ)কে কাফের-মুশরেকরা যাদুকর, কবি, গনক ইত্যাদি বলে বিদ্রূপ করেছিলো। আবার 'আবতার' বা লেজকাটা-বংশহীন বলে তিরস্কার করেছিলো। কিন্তু আল্লাহর নবী (সাঃ) তাদের এই তিরস্কার এবং ঠাট্টা-বিদ্রূপকে উপেক্ষা করে আল্লাহর দ্বীনের কাজ চালিয়ে গিয়েছিলেন।

অনুরূপভাবে আমাদের এই দেশেও আল্লাহর কাজ তথা দীন প্রতিষ্ঠার কাজ করতে গেলে ইসলাম বিরোধীরা বিভিন্ন প্রকার উক্তি করে থাকে। যেমন বলে- রেজাকার, আলবদর, তালেবান, হারকাতুল জিহাদ, আল কায়েদা, সন্ত্রাসী ইত্যাদি বলে বিদ্রূপ বা তিরস্কার করে। এসব বিদ্রূপ ও কটুক্তির পেছনে মূল কারণই হলো আল্লাহর দীন প্রতিষ্ঠার কাজ থেকে সরিয়ে দেয়া। মন ভাঙ্গা করে নিষ্ক্রিয় করে দেয়া। মহানবী (সাঃ) অত্র হাদীসে উল্লেখ করেছেন “তোমাদেরকে যেন এসব তিরস্কারকারীদের তিরস্কার আল্লাহর কাজ থেকে বিরত করতে না পারে”। সুতরাং এটাকে আল্লাহর দীন প্রতিষ্ঠার কাজে পরীক্ষা মনে করে আন্দোলনের কাজকে তীব্র থেকে আরো তীব্রতর করতে হবে। এই কাজের জন্য ভয় করা যাবে না ও মন ভাঙ্গা হয়ে নিষ্ক্রিয়ও হওয়া যাবে না। বরং এসব কিছুকে উপেক্ষা করে সামনের দিকে এগিয়ে যেতে হবে।

সপ্তম উপদেশ : রাবী আবু যার (রাঃ) রাসূলের কাছে উপদেশের জন্য সর্বশেষ আবেদন করলে রাসূলুল্লাহ (সাঃ) বললেনঃ

لِيَحْجُزَكَ عَنِ النَّاسِ مَا تَعْلَمُ مِنْ نَفْسِكَ.

তোমার মধ্যে যে দোষ-ত্রুটি আছে বলে তুমি জানো অন্যের সেই দোষ-ত্রুটি নিয়ে সমালোচনা করো না।

অত্র হাদীসে এক থেকে ছয় পর্যন্ত যে সব উপদেশ দেয়া হয়েছে তা হলো আল্লাহর হক বা অধিকার সংক্রান্ত। আর এই সপ্তম এবং সর্বশেষ উপদেশটি হলো বান্দার হক বা অধিকার সংক্রান্ত।

প্রতিটা মানুষের মধ্যে কম হোক বেশী হোক কিছু না কিছু ত্রুটি-বিচ্যুতি আছে। কেউই ত্রুটি মুক্ত নয়। একমাত্র রাসূলুল্লাহ (সাঃ)-ই ত্রুটিমুক্ত ছিলেন। তিনি মানুষ হিসেবে ভুল করলে সাথে সাথে আল্লাহ তায়ালা অহী দ্বারা তা সংশোধন করে দিয়েছেন। সুতরাং আমাদের সকলেরই কোন না কোন ত্রুটি আছে। রাসূলুল্লাহ (সাঃ) এখানে উপদেশ দিচ্ছেন নিজের মধ্যে যে ত্রুটি-বিচ্যুতি আছে তা অন্যের মধ্যে থাকলে তা নিয়ে সমালোচনা-পর্যালোচনা না করার। কেননা তা যদি করা হয়, তাহলে সেই ভাই এর সাথে সম্পর্ক নষ্ট হবে এবং নিজের ত্রুটি বিচ্যুতি আরো বেড়ে যাবে। কেননা পরের দোষ খুঁজতে খুঁজতেই তার সময় পার হয়ে যাবে, নিজের দোষ খোঁজার সময় তার হবে না। ফলে তার ত্রুটি লোপ পাবে না বরং বৃদ্ধি হতেই থাকবে। বরং অন্যের দোষ-ত্রুটি

খোঁজাখুঁজি না করে নিজের দোষ-ত্রুটি সংশোধন করার জন্য প্রতিনিয়ত আত্মবিচার, আত্মসমালোচনা করে নিজের ত্রুটিগুলো দূর করার চেষ্টা করা। আর অন্য ভাই এর ত্রুটিগুলো মুহাসাবার মাধ্যমে গঠনমূলক সমালোচনা করে সংশোধনের ব্যবস্থা করা। এটা পরস্পর পরস্পরের অধিকার। কেননা মুহাসাবা দ্বারা যেমন গীবতের মতো কঠিন গুনাহ থেকে ব্যক্তি নিজে বাঁচতে পারে, তেমনি অন্য ভাইও সংশোধনের সুযোগ পেয়ে গুনাহ থেকে বেঁচে জাহান্নাম থেকে মুক্তি পায়।

প্রিয় ভায়েরা/বোনেরা! হাদীসে হযরত আবু যার গিফারী (রাঃ) রাসূলুল্লাহ (সাঃ) এর কাছে যেভাবে একের পর এক নসিহত বা উপদেশের জন্য আবেদন জানাচ্ছিলেন, তাতে তিনি যদি আরো আরো আরয় করতেন তাহলে হয়তো আল্লাহর নবী (সাঃ) আরও উপদেশ দিতেন। যা হোক আবু যার (রাঃ) রাসূলুল্লাহ (সাঃ) কে এখানে সাতবার আবেদন জানানোর পরিপ্রেক্ষিতে আল্লাহর রাসূল (সাঃ) মোট আটটি উপদেশ দিয়েছেন এবং সাথে সাথে সেই সব আ'মলের বা অভ্যাসের প্রভাবগুলোও উল্লেখ করে দিয়েছেন। যা আমাদের সকলের জীবনের জন্য অত্যন্ত শিক্ষণীয়, গ্রহণীয় এবং আ'মলযোগ্য।

শিক্ষা : প্রিয় ভায়েরা/বোনেরা! উপরে বর্ণিত হাদীসের ব্যাখ্যা বিশ্লেষণের পর আমাদের জন্য যে সব শিক্ষণীয় বিষয় রয়েছে তা হলো :

✱ দ্বীন তথা ইসলামের আ'মল বা কাজ জানা এবং মানার জন্য তীব্র আকাংখা থাকা। যেভাবে আবেদনকারী রাবী আবু যার গিফারী (রাঃ) এর মধ্যে দেখা গিয়েছে।

✱ সদা-সর্বদা আল্লাহকে ভয় করে চলা। মনের মধ্যে আল্লাহর ভয় রাখা। আল্লাহর ভয়েই তাঁর নির্দেশিত কাজগুলো করা এবং নিষিদ্ধ কাজ থেকে দূরে থাকা। আর আল্লাহর ভয় তথা তাকওয়ার গুণের মাধ্যমে গোটা জীবন অর্থাৎ ব্যক্তিগত, পারিবারিক, সামাজিক, অর্থনৈতিক এবং রাষ্ট্রীয় জীবনকে সৌন্দর্যমন্ডিত করে তোলা।

✱ প্রতিদিন পবিত্র কোরআনের কিছু অংশ নিজের ভাষায় বুঝে তিলাওয়াত বা অধ্যয়ন করা এবং তার শিক্ষা অনুযায়ী জীবন গঠন ও পরিচালনা করা।

✱ সকল সময় সকল অবস্থায় তথা- চাকরী-বাকরী, ব্যবসা-বাণিজ্য, চাষ-বাস, লেখা-পড়া, উঠা-বসা, চলা-ফেরা, শোয়া-বসায় আল্লাহকে স্মরণ রাখা এবং মাঝে মাঝে আল্লাহর তাহলীল, তাহমীদ এবং তাসবীহর মাধ্যমে মুখে

অনুচ্ছব্বরে যিকির করা। আর এরই মাধ্যমে আল্লাহর একজন খাঁটি বান্দা হিসেবে সমাজের কাছে পেশ করা।

✱ স্বাভাবিক এবং চুপ-চাপ গাম্ভীর্যপূর্ণ জীবন যাপন করা। বেশী বেশী এবং অপ্রয়োজনীয় কথা না বলা, যাতে মানুষ বাচাল হিসেবে আখ্যায়িত না করে। আড়ম্বরপূর্ণ জীবন, গর্ব-অহংকার এবং প্রদর্শনেচ্ছা থেকে মুক্ত থাকা। কেননা এতে শয়তানের আক্রমণ থেকে রক্ষা পাওয়া যায় এবং দ্বীনি কাজ করতে সহায়ক হয়।

✱ বেশী বেশী হাসা-হাসি না করা। অউহাসি না দেয়া। কেননা আল্লাহর রাসূল (সাঃ) এই হাসি হাসতে নিষেধ করেছেন। তবে তিনি মানুষের সাথে হাসি মুখে কথা বলতে আদেশ করেছেন। বেশী বেশী হাসা-হাসি করলে আল্লাহর স্মরণ থেকে দেল মরে যায়।

✱ সদা-সর্বদা সত্য কথা বলা, সততার সাথে কাজ করা, সত্য ভাষণ, বিবৃতি এবং স্বাক্ষ্য দেয়া। জীবনের ঝুঁকি থাকলেও এবং মানুষের স্বার্থে আঘাত লাগলেও সত্য বলা। নিজেকে সততার পরিচয় দেয়া, যাতে মানুষ সত্যবাদি হিসেবে জানে এবং আল্লাহও এই সত্যবাদিতার জন্য তাকে জান্নাত দান করেন।

✱ সকল প্রকার ঠাট্টা-বিদ্রূপ, তিরস্কার এবং ভয়-ভীতিকে উপেক্ষা করে দ্বীন তথা ইসলামের কাজ অর্থাৎ ইসলামী আন্দোলনের কাজ চালিয়ে যাওয়া। কারো কোন কটু কথা বা কাজে পরওয়া না করা। বরং আল্লাহর উপর ভরসা করে এটাকে পরীক্ষা এবং নবীর সুন্নত মনে করে আন্দোলনের গতিকে তীব্র থেকে আরো তীব্রতর করা।

✱ অন্যের দোষ খোঁজা-খোঁজি এবং সমালোচনা না করে নিজের দোষ-ত্রুটি অনুসন্ধান করা এবং সেইসব দোষ-ত্রুটিকে আত্ম সমালোচনার মাধ্যমে দূর করা। অপর পক্ষে অন্যের দোষ গোপন রাখা। আর যদি এর দ্বারা ব্যক্তি ও সমাজ ক্ষতিগ্রস্ত হয় তবে সংশ্লিষ্ট ব্যক্তিকে গঠনমূলক ভাবে দরদী মন নিয়ে মুহাসাবার মাধ্যমে ত্রুটি মুক্ত করার চেষ্টা করা। আর নিজের এবং অন্যের দোষ-ত্রুটি মুক্ত হওয়ার জন্য আল্লাহর কাছে দোয়া করা।

আহবান : প্রিয় দ্বীনি ভায়েরা/বোনেরা! এতক্ষণ পর্যন্ত আপনাদের সামনে হাদীসটির যে ব্যাখ্যা এবং শিক্ষা পেশ করলাম এতে যদি আমার অজান্তে এবং অজ্ঞাতে কোন ভুল-ত্রুটি হয়ে যায় তার জন্য মহান আল্লাহর কাছে ক্ষমা চাচ্ছি। আর আমরা সবাই যেন হাদীস থেকে যে সব শিক্ষা লাভ করলাম তা বাস্তব জীবনে আ'মল করতে পারি তার তাওফীক কামনা করে দারস শেষ করছি। আসসালামু আলাইকুম ওয়া রাহমাতুল্লাহ।

দুই

ইসলামী আন্দোলন না করার পরিণতি

نَحْمَدُهُ وَنُصَلِّي عَلَى رَسُولِهِ الْكَرِيمِ

بِسْمِ اللَّهِ الرَّحْمَنِ الرَّحِيمِ

عَنْ حُذَيْفَةَ ابْنِ الْيَمَانِ قَالَ قَالَ رَسُولُ اللَّهِ صَلَّى
اللَّهُ عَلَيْهِ وَسَلَّمَ لَتَأْمُرَنَّ بِالْمَعْرُوفِ وَلَتَنْهَوْنَ عَنِ
الْمُنْكَرِ وَلَتَحَاضُنَّ عَلَى الْخَيْرِ أَوْ لَيَسْحَبَنَّكُمُ اللَّهُ
جَمِيعًا بِعَذَابٍ أَوْ لَيُؤْمِرَنَّ عَلَيْكُمْ شَرَارَكُمْ ثُمَّ يَدْعُو
خِيَارَكُمْ فَلَا يَسْتَجَابَ لَهُمْ- (مُسْنَدُ أَحْمَد)

অনুবাদ : হযরত হুযাইফা ইবনে ইয়ামান (রাঃ) থেকে বর্ণিত আছে, তিনি বলেন, রাসূলুল্লাহ (সাঃ) বলেছেনঃ অবশ্য অবশ্যই তোমরা সৎ কাজের আদেশ দেবে এবং অসৎ কাজে বাধা দেবে। আর উত্তম কল্যাণকর কাজ করার জন্য উৎসাহ উদ্দীপনা দেবে। তা না হলে আল্লাহ তাআলা যে কোন আযাব দিয়ে তোমাদেরকে ধ্বংস করে দেবেন। অথবা তোমাদের মধ্য থেকে সবচেয়ে বেশী পাপী ও জালেম লোককে তোমাদের শাসক বানিয়ে দেবেন। এমতাবস্থায় তোমাদের মধ্যে নেককার লোকেরা (এসব থেকে) মুক্তি পাবার জন্য আল্লাহর কাছে দোআ করবে। কিন্তু তাদের দোআ কবুল করা হবে না। (মুসনাদে আহমদ)

বিশেষ বিশেষ শব্দার্থ : عَنْ - থেকে বা হতে। ابْن - ছেলে বা বেটা।

قَالَ - বলা বা বলেন। لَتَأْمُرَنَّ - অবশ্যই তোমরা আদেশ দেবে।

لَتَنْهَوْنَ - অবশ্যই তোমরা নিষেধ

করবে বা বাধা দেবে। بِالْمَعْرُوفِ - সৎ বা উত্তম কাজের। الْمُنْكَرُ - অসৎ বা অন্যায় কাজের।

وَلَتَحَاضُنَّ - এবং অবশ্যই উৎসাহ উদ্দীপনা দেবে। عَلَى - উপর এখানে ব্যাপারে।

الْخَيْر - উত্তম বা কল্যাণকর। أَوْ - অথবা এখানে তা না হলে
 لَيَسْحَبَنَّكُمْ اللَّهُ - অবশ্যই আল্লাহ্ তোমাদেরকে ধ্বংস করে দেবেন।
 لَيُؤْمَرَنَّ - অথবা। أَوْ - অথবা। بِعَذَابٍ - আযাব দিয়ে। جَمِيعًا - সবাইকে।
 -তোমাদের উপর। عَلَيْكُمْ - তোমাদের উপর।
 يَدْعُونَ - অতঃপর। ثُمَّ - অতঃপর। شَرَارَكُمْ - তোমাদের মধ্যে নিকৃষ্ট বা পাপীকে
 তোমরা দোআ করবে। خِيَارَكُمْ - তোমাদের উত্তম বা নেককার লোকেরা।
 فَلَ - অতঃপর করা হবে না। يُسْتَجَابَ لَهُمْ - তাদের (দোআর) জবাব
 দেয়া বা গ্রহণ করা।

সম্বোধন : দারসে হাদীস প্রোগ্রামে/অনুষ্ঠানে উপস্থিত প্রিয় দ্বীনি/ইসলামী
 আন্দোলনের কর্মী ভায়েরা/বোনেরা! আসসালামু আলাইকুম। আমি আপনাদের
 সামনে ইমাম আহমদ ইবনে হাম্বলের সংকলিত বিশুদ্ধ হাদীসের গ্রন্থ ‘আহমদ’
 থেকে বিশিষ্ট সাহাবী হযরত হুযাইফা (রাঃ) এর বর্ণিত হাদীসটি পাঠ এবং
 অনুবাদ পেশ করেছি। আল্লাহ্ রাক্বুল আ’লামীন যেন আমাকে অত্র হাদীসটির
 সঠিক ব্যাখ্যা এবং শিক্ষা তুলে ধরার তাওফীক দান করেন। আমীন।

রাবী বা বর্ণনাকারীর পরিচয় : নাম-হুযাইফা। কুনিয়াত-আবু আবদুল্লাহ্।
 লকব- “সাহিবুস সিরারি রাসূলুল্লাহ্।” এই লকব দানের কারণ হলো রাসূলুল্লাহ্
 (সাঃ) তাঁকে মুনাফিকদের নাম বলে দিয়েছিলেন। আর তিনি সেসব নাম
 বিশ্বস্ততার সঙ্গে হেফাজত করতেন।

পিতার নাম- হুসাল অথবা হুসাইল ছিল। তবে তিনি আল ইয়ামান নামে
 মশহুর (পরিচিত) ছিলেন। এই নামে তিনি এত পরিচিত ছিলেন যে, লোকজন
 তার আসল নাম ভুলেই গিয়েছিলো।

মাতার নাম- রুবাব বিনতে কা’ব। তিনি আউস গোত্রের মহিলা ছিলেন।

ইসলাম গ্রহণ- পিতা-পুত্র উভয়ে তখন ইয়াসরীবে (মদীনার পূর্ব নাম) বসবাস
 করতেন। ইয়াসরীব থেকেই তারা মক্কায় নবী আগমনের খবর পান এবং তারা
 কুরাইশদের অত্যাচারের খবরও শুনেছিলেন। তারা উভয়েই সৎ স্বভাবের লোক
 ছিলেন। তাদের অন্তরে সাড়া দিলো নবীর দাওয়াত কবুল করার। এজন্য তারা

দেৱীতে দাওয়াত কবুল করা ক্ষতির কারণ হবে চিন্তা করে পিতা-পুত্র উভয়ে সকল ভয়-ভীতিকে উপেক্ষা করে মক্কায় গমন করেন এবং আল্লাহর রাসূলের খেদমতে হাজির হয়ে ইসলাম কবুল করেন। হযরত হুযাইফার পিতা হুসাইন (রাঃ) ওহুদের যুদ্ধে মুসলমানদের চরম বিশৃঙ্খলার সময় ভুলক্রমে মুসলমানদের হাতেই শহীদ হন।

হুযাইফা (রাঃ) রাসূলুল্লাহ (সাঃ) এর একজন সহযোদ্ধা ছিলেন। তিনি পরবর্তী খেলাফতের যুগেও বিভিন্ন দায়-দায়িত্ব পালন করেন। হযরত উমর ও ওসমান (রাঃ) এর যুগেও মাদায়েনের গভর্ণরের দায়িত্ব পালন করেন। তিনি ৩০ হিজরীতে গভর্ণরের দায়িত্ব থেকে অব্যাহতি নেন এবং বিভিন্ন যুদ্ধে অংশ গ্রহণ করেন। হযরত ওসমান (রাঃ) এর খেলাফতের শেষ দিকে তিনি পুনরায় মাদায়েনের গভর্ণরী পদে ফিরে আসেন এবং এখানেই ৩৫ হিজরীতে হযরত ওসমান (রাঃ) এর শাহাদাতের ৪০ দিন পর ইন্তেকাল করেন। হযরত হুযাইফা (রাঃ) যুদ্ধ এবং রাষ্ট্রীয় কাজে ব্যস্ত থাকার কারণে খুব বেশী হাদীস বর্ণনা করার সুযোগ পাননি। তার পরেও জানা যায় তিনি প্রায় ১০০ টিরও বেশী হাদীস বর্ণনা করেন।

বর্ণিত হাদীস গ্রন্থের পরিচয় : বর্ণিত হাদীসটি ‘মুসনাদে আহমদ’ কিতাবে সংকলিত হয়েছে। কিতাবটি ইমাম আহমদ ইবনে হাম্বলের সংকলিত সহীহ কিতাব। যদিও এটি “সিহাহু সিভার” অন্তর্ভুক্ত নয়।

হাদীসটি বর্ণনার সময়কাল : আল্লাহর নবী (সাঃ) হাদীসটি কখন বর্ণনা করেছেন নির্দিষ্ট করে বলা না গেলেও হাদীসটির বিষয়বস্তু থেকে মনে হয়, তিনি মাদানী জীবনে বর্ণনা করেছেন। কেননা, হাদীসে আদেশ-নিষেধের কথা এবং আমীর বা শাসকের কথা উল্লেখ রয়েছে। যা মাদানী জীবন থেকে আরম্ভ করে পরবর্তী সকল যুগের জন্য প্রযোজ্য ছিলো এবং থাকবে।

ব্যাখ্যা : প্রিয় ভায়েরা/বোনেরা! এতক্ষণ পর্যন্ত আমি আপনাদের সামনে পঠিত হাদীসটির অনুবাদ এবং প্রাথমিক কিছু পরিচয় তুলে ধরলাম। এখন হাদীসটির প্রয়োজনীয় ব্যাখ্যা পেশ করছি। হাদীসের প্রথমে রাসূলুল্লাহ (সাঃ) সকল মুসলমানদের করণীয় সম্পর্কে বলতে গিয়ে বলেন :

لَتَأْمُرَنَّ بِالْمَعْرُوفِ وَلَتَنْهَوْنَ عَنِ الْمُنْكَرِ وَلَتَحَاضُنَّ عَلَى الْخَيْرِ

তোমরা অবশ্য অবশ্যই মানুষকে ভাল ও উত্তম কাজের প্রতি আদেশ দেবে এবং অন্যায় ও পাপ কাজ থেকে বারণ করবে। আর ভাল ও কল্যাণকর কাজ করার জন্য উৎসাহ-উদ্দীপনা দেবে। হাদীসের এই অংশে রাসূলুল্লাহ (সাঃ) তিনটি গুরুত্বপূর্ণ কাজের কথা বলেছেন। যার মধ্যে দু'টো হা বোধক অর্থাৎ আদেশ সূচক এবং একটা না বোধক অর্থাৎ নিষেধ সূচক কাজের কথা সকলকেই করার জন্য তাগাদা দিয়েছেন। যা না করলে পরবর্তী অংশে সামগ্রিক ক্ষতির কথাও উল্লেখ করেছেন। কাজ তিনটি হলো :

এক. لَتَأْمُرَنَّ بِالْمَعْرُوفِ-অবশ্য অবশ্যই তোমরা নেক বা উত্তম কাজের আদেশ দেবে।

দুই. وَلَتَنْهَوْنَ عَنِ الْمُنْكَرِ-এবং অবশ্য অবশ্যই তোমরা অন্যায় বা অসৎ কাজ থেকে বারণ করবে।

তিন. وَلَتَحَاضُنَّ عَلَى الْخَيْرِ-আর অবশ্যই তোমরা উত্তম ও কল্যাণকর কাজের জন্য লোকদেরকে উৎসাহ-উদ্দীপনা দেবে।

অত্র হাদীসে আল্লাহর রাসূল (সাঃ) মুসলমানদের করণীয় সম্পর্কে যে তিনটি কাজের কথা বলেছেন তা আল্লাহ তাআলাও আল কুরআনে অসংখ্য জায়গায় উল্লেখ করেছেন। যেমন- সূরা আলে ইমরানের ১০৪ নম্বর আয়াতে আল্লাহ পাক বলেন -

وَلَتَكُنْ مِنْكُمْ أُمَّةٌ يَدْعُونَ إِلَى الْخَيْرِ وَيَأْمُرُونَ بِالْمَعْرُوفِ وَيَنْهَوْنَ عَنِ الْمُنْكَرِ وَأُولَئِكَ هُمُ الْمُفْلِحُونَ-

তোমাদের মধ্যে এমন এক দল লোক থাকা উচিত, যারা মানুষকে ভাল কাজের দিকে ডাকবে এবং আদেশ দিবে উত্তম কাজের প্রতি এবং বারণ করবে অন্যায় কাজ থেকে। আর যারা এসব কাজ করে তারাই হলো সফলকামী।

আল্লাহপাক একই সূরার ১১০ নম্বর আয়াতে উল্লেখ করে বলেন :

كُنْتُمْ خَيْرَ أُمَّةٍ أُخْرِجَتْ لِلنَّاسِ تَأْمُرُونَ بِالْمَعْرُوفِ
وَتَنْهَوْنَ عَنِ الْمُنْكَرِ -

তোমরাই হলে (মানুষের মধ্যে) সর্বোত্তম দল, মানুষের কল্যাণের জন্যই তোমাদের আগমন। সুতরাং তোমরা সৎ কাজের আদেশ দেবে এবং অন্যায় ও পাপ কাজে বাধা দেবে।

উপরোক্ত আয়াত দু'টোতে বলা হয়েছে উম্মতে মুহাম্মাদির মধ্যে এমন একটা দল থাকবে যারা হবে অতি উত্তম এবং মধ্যমপন্থী। আর তাদের কাজ কি হবে তাও বাতলিয়ে দেওয়া হয়েছে।

হাদীসে রাসূলুল্লাহ (সাঃ) এর আদেশ এবং আয়াতে আল্লাহ তাআলার নির্দেশের মাধ্যমে এটাই বুঝা যায় যে, মুসলমানেরা সদা-সর্বদা মানুষকে ভাল ও নেক কাজের আদেশ দেবে এবং মন্দ ও পাপ কাজ থেকে নিষেধ করবে। আর ভাল কাজ করার পরিবেশ দেবে এবং উত্তম ও নেক কাজ করার জন্য উৎসাহ-উদ্দীপনা দেবে। সুতরাং উম্মতে মুহাম্মাদীর কাজই হবে সদা-সর্বদা নিজে উত্তম, নেক ও ভাল ভাল কাজ করা এবং অন্যদেরকেও তা পালন করার জন্য নির্দেশ দেয়া, উৎসাহ-উদ্দীপনা দেয়া। আর নিজে অন্যায় ও পাপ কাজ থেকে বিরত থাকা এবং অন্যদেরকেও তা থেকে বাধা দেয়া, নিষেধ বা বারণ করা। কেননা ঈমানের দাবীদারদের ঈমানের দাবীই হলো এটি।

অন্য হাদীসে ঈমানের দাবীদারদের ঈমানের ক্যাটাগরী উল্লেখ করে রাসূলুল্লাহ (সাঃ) বলেন :

مَنْ رَأَى مِنْكُمْ مُنْكَرًا فَلْيُغَيِّرْهُ بِيَدِهِ فَإِنْ لَمْ يَسْتَطِعْ
فَبِلِسَانِهِ فَإِنْ لَمْ يَسْتَطِعْ فَبِقَلْبِهِ وَذَلِكَ أَضْعَفُ
الْإِيْمَانِ (مُسْلِمٌ)

তোমাদের কেউ যখন কোন অন্যায় বা অপরাধমূলক কাজ হতে দেখবে তখন সে যেনো তার হাত (ক্ষমতা) দিয়ে তা প্রতিহত করে। যদি সে

একাজ করার পরিবেশ না পায়, তবে সে যেনো তার যবান (বক্তৃতা, বিবৃতি ও আলাপ-আলোচনার) দ্বারা তা প্রতিহত করে। এতেও যদি সে সক্ষম না হয়, তবে সে যেনো তার অন্তর দ্বারা ঘৃণা করে। (অর্থাৎ তাতে ঘৃণা পোষণ করবে এবং পরিকল্পনা করে তা প্রতিহতের চেষ্টা করবে।) আর এই পর্যায় হচ্ছে ঈমানের দুর্বলতম পর্যায়। (মুসলিম) অত্র হাদীসে প্রথম শ্রেণী বা ক্যাটাগরীর ঈমানদার হলো তারাই যারা ক্ষমতা দ্বারা অন্যায় কাজকে প্রতিহত করে। ক্ষমতা দ্বারা অন্যায় এবং অপরাধ প্রতিহত করতে হলে রাষ্ট্রীয় ক্ষমতার প্রয়োজন। আর রাষ্ট্রীয় ক্ষমতা অর্জনের জন্য প্রয়োজন সংঘবদ্ধ বা দলবদ্ধ ভাবে জিহাদ করা আন্দোলন করা। প্রকৃত মুসলমান হিসেবে বেঁচে থাকতে হলে ইসলামী রাষ্ট্র হোক অথবা ইসলামী রাষ্ট্র না হোক সকল অবস্থায় ভাল কাজের আদেশ এবং অন্যায় কাজে নিষেধের কাজ চালিয়ে যেতে হবে। আর এটাই হলো ঈমানের দাবী। কেননা ঈমানদার ব্যক্তি কোন সময়ের জন্য দু'টো কাজ বন্ধ করবে না। তার একটা হলো ভাল কাজের আদেশ এবং অন্যটা হলো অন্যায় ও পাপ কাজে নিষেধ। আর যদি কোন সমাজের লোক এ দু'টো কাজ থেকে উদাসীন হয়ে বিরত থাকে তা হলে যে সব ক্ষতি হবে তার কথা উল্লেখ করে হাদীসের শেষ অংশে মহানবী (সাঃ) বলেন :

أَوْ لَيَسْجِزَنَّكُمْ اللَّهُ جَمِيعًا بِعَذَابٍ أَوْ لَيُؤْمِرَنَّ عَلَيْكُمْ
شَرَارَكُمْ-

তা না হলে অবশ্যই আল্লাহ্ যে কোন আযাব দিয়ে তোমাদেরকে ধ্বংস করে দেবেন। অথবা তোমাদের মধ্য থেকে সবচেয়ে বেশী পাপী ও যালেম লোককে তোমাদের নেতা বা শাসক বানিয়ে দেবেন।

হাদীসের এই অংশে জিহাদ বা ইসলামী আন্দোলন না করার পরিণতি সম্পর্কে বলা হয়েছে। যদি কোন সমাজ অন্যায়, অপকর্ম ও পাপাচারে পরিপূর্ণ হয়ে যায়। আর সেই সমাজের লোকেরা গাফেল এবং উদাসীন থাকে। আর তা থেকে সমাজকে বাঁচার জন্য চেষ্টা না করে, জিহাদ ও আন্দোলন না করে। তাহলে আল্লাহ্ তাআলা তাদেরকে দু'ধরনের আযাব দিয়ে শাস্তি দেবেন।

এক. এই অপরাধের কারণে আল্লাহ্ অসন্তোষ হয়ে এক সামগ্রিক আযাব দিয়ে সেই সমাজকে ধ্বংস করে দেবেন। যেভাবে পূর্বের নবীদের অবাধ্য উম্মতদের

ধ্বংস করে দিয়েছিলেন। যেমন- মাদইয়ান বাসীদের ধ্বংস করে দিয়েছিলেন। লুৎ কওমকে ফেরেশতা দিয়ে ধ্বংস করে দিয়েছিলেন। সামুদ জাতিকে ধ্বংস করে দিয়েছিলেন। নূহ এর জাতিকে প্লাবন দিয়ে ধ্বংস করে দিয়েছিলেন। তবে হ্যাঁ নবীর উম্মতকে সেই ভাবে (রাসূলের দোআর কারণে) সমূলে ধ্বংস করে না দিলেও বিভিন্ন আযাব-গযব দিয়ে শাস্তি দেবেন। যেমন-অতি বৃষ্টি, অনাবৃষ্টি, টর্নেডো, ঝড়, জলোচ্ছ্বাস, হ্যারিকেন, বন্যা, ভূকম্পন, মহামারী এবং সর্বোপরি সামাজিক অশান্তি দিয়ে শাস্তি দেবেন।

দুই. ন্যায়ের প্রতিষ্ঠা এবং অন্যায়ের প্রতিরোধ করার জন্য যদি কেউ চেষ্টা না করে, জিহাদ বা আন্দোলন না করে, তাহলে আল্লাহ্ তায়ালা শাস্তি হিসেবে দ্বিতীয় যেই আযাবটি দেবেন তা হলো- সমাজের মধ্যে সবচেয়ে বেশী পাপাচারী এবং যালেম লোককে সেই সমাজের নেতা বা শাসক বানিয়ে দেবেন। আর সেই পাপী ও জালেম নেতা বা শাসক সেই জাতির ঘাড়ের উপর সওয়ার হয়ে অত্যাচারের স্ত্রীম রোলার চালাবে। জাতিকে পাপাচারে লিপ্ত করে অতিষ্ঠ করে তোলবে। সমাজের মধ্যে যারা একটু সৎ এবং নেককার তাদেরকে জেল, যুলুম, অত্যাচার-নির্যাতনের মাধ্যমে দমন করে রাখবে। সমাজের অপরাধী ও পাপাচারী লোকদের দৌরাত্ম বেড়ে যাবে। খুন, হত্যা, রাহাজানিতে সমাজ অতিষ্ঠ হয়ে উঠবে। যার কারণে মানুষ অসহায় ও নিরাপত্তাহীন হয়ে কঠিন হতাশার মধ্যে নিমজ্জিত হবে।

এই অবস্থা সৃষ্টির জন্য আল্লাহ্ তাআলা দায়ী নন বরং সেই সমাজের লোকেরাই দায়ী। এই সম্পর্কে মহান আল্লাহ বলেন-

ظَهَرَ الْفَسَادُ فِي الْبَرِّ وَالْبَحْرِ بِمَا كَسَبَتْ أَيْدِ النَّاسِ .

জলে ও স্থলে যে বিপর্যয় সৃষ্টি হয়, তা সেই জাতিরই নিজেদের অর্জিত কর্মের প্রতিফল। (সূরা রুম-৪০)

হাদীসে উল্লেখিত তিনটি কাজ জাতির লোকেরা বন্ধ করে দেয়ার ফলে আল্লাহ্ পক্ষ থেকে সেই জাতির উপর যেসব গযব-আযাব এবং শাস্তি নেমে আসবে তা থেকে উদ্ধার পাবার জন্য সমাজে যারা নিজেদেরকে নেককার ও পরহেযগার এবং ভাল মানুষ হিসেবে মনে করে তারা দোআ করবে, কিন্তু আল্লাহ্ তাদের সেই দোআ কবুল করবেন না। এই মর্মে হাদীসের সর্বশেষ অংশে মহানবী (সাঃ) বলেন :

ثُمَّ يَدْعُوْا خِيَارَكُمْ فَلَا يَسْتَجَابُ لَهُمْ-

অতঃপর এমতাবস্থায় তোমাদের মধ্যে নেককার লোকেরা এসব থেকে মুক্তি পাবার জন্য আল্লাহর কাছে দোআ করবে। কিন্তু তাদের দোআ কবুল করা হবে না।

আল্লাহ্ এসব লোকদের দোআকে প্রত্যাখ্যান করবেন। তার কারণ হলো এরা পাপাচারি সমাজে বসবাস করে নিজেদেরকে মসজিদ ও খানকায় সীমাবদ্ধ রেখে নেককার, পরহেযগার ও ভাল মানুষ মনে করে। যারা অপকর্ম এবং পাপাচারে লিপ্ত থাকে তাদেরকে তারা বাধা দেয় না। তাদেরকে সেই অন্যায় কাজ থেকে মুক্ত করার জন্য পরিকল্পনা গ্রহণ করে না। তারা নিজেদেরকে সমাজ বিচ্যুত রেখে ভাল মানুষ সাজে। তাস্বীহ-তাহলীল, মুরাকাবা-মুশাহাদা, যিকির-আযকারের মাধ্যমে সময় অতিবাহিত করে। কিন্তু আল্লাহ্ এবং রাসূলের দৃষ্টিতে এই সমাজের পাপাচারী এবং ভাল মানুষের দাবীদারেরা একই রকম, একই অপরাধী। বুখারী শরীফে আল্লাহর রাসূল (সাঃ) এর এই সম্পর্কে একটি চমৎকার হাদীস বর্ণনা রয়েছে। উক্ত হাদীসটি হলো- “মহানবী (সাঃ) একদা তার সাহাবাদের সামনে সমাজের উদাহরণ টেনে বর্ণনা করেন, মনে করো একটা দ্বোতলা কিস্তী বা জাহাজ। সেই জাহাজে আরোহনের জন্য কোরার (লটারীর) মাধ্যমে একদল লোক দ্বোতলায় সুযোগ পেল এবং আর একদল লোক নীচতলায় আরোহন করলো। নীচতলার লোকেরা পানির জন্য বার বার দ্বোতলায় যেতে লাগলো। এতে দ্বোতলার আরোহীরা বিরক্ত বোধ করলো। ফলে নীচতলার লোকেরা ক্ষিপ্ত হয়ে কুড়াল হাতে নিলো এবং জাহাজের তলা ছিদ্র করে পানি নিতে উদ্যোগ হলো। (রাসূলুল্লাহ্ (সাঃ) সাহাবাদের প্রশ্ন করলেন) এখন দ্বোতলার লোকদের কাজ কি হবে, তারা কি চেয়ে চেয়ে দেখবে, না কুড়াল ধারীদের হাতকে চেপে ধরে জাহাজ ছিদ্র করা থেকে বিরত রাখার জন্য চেষ্টা করবে?” (রাসূলুল্লাহ্ সাঃ) এই হাদীস দ্বারা বুঝাতে চান যে, সমাজের মধ্যে দু’শ্রেণীর লোক থাকবে। এক শ্রেণীর লোক হলো কুড়াল হাতে নিয়ে জাহাজ ছিদ্র করে পানিতে ডুবিয়ে ধ্বংসকারীর মতো অন্যায়, অপকর্ম এবং পাপাচারে লিপ্ত থেকে সমাজ ধ্বংসকারী লোক। আর অপর শ্রেণীর লোক হলো দ্বোতলার আরোহীদের মতো। যারা নিজেদেরকে নিরাপদ মনে করে অর্থাৎ নেককার, পরহেযগার এবং ভাল মানুষ হিসেবে মনে

করে। কিন্তু রাসূলুল্লাহ্ (সাঃ) দৃষ্টিতে এরা উভয়ই একই রকম অপরাধী। নীচ-তলার আরোহীদেরকে যদি দ্বোতলার আরোহীরা জাহাজ ছিদ্র করা থেকে বাধা না দেয়, তাহলে যেমন জাহাজ পানিতে নিমজ্জিত হয়ে নীচতলার লোকেরা যেমন ধ্বংস হয়ে যাবে, তেমনি দ্বোতলার লোকেরাও তাদের সাথে ধ্বংস হয়ে যাবে। অনুরূপ ভাবে সমাজ ধ্বংসকারী বদকার, অপরাধী, পাপাচারী লোকেরা যেমন আল্লাহর গযবে-আযাবে ধ্বংস হয়ে যাবে তেমনি ভাল মানুষের দাবীদারেরাও ধ্বংস হয়ে যাবে। রাসূলুল্লাহ্ (সাঃ) এখানে জাহাজকে সমাজের সাথে তুলনা করেছেন। জাহাজের নীচতলার লোকদেরকে সমাজের মধ্যে পাপাচার, বদকার লোকদের সাথে তুলনা করেছেন এবং দ্বোতলার ভদ্র লোকদেরকে সমাজের নেককার, পরহেজগার ভাল মানুষের দাবীদারদের সাথে তুলনা করেছেন। রাসূলুল্লাহ্ (সাঃ) এই উদাহরণ দ্বারা সাহাবাদের মাধ্যমে গোটা উম্মতকে বুঝানোর চেষ্টা করেছেন।

সমাজের মধ্যে যারা নিজেদের বড় বুয়র্গ পরহেজগার বলে মনে করে, অথচ যারা অপরাধ করে পাপাচারে লিপ্ত থাকে তাদেরকে বাধা দেয় না। আল্লাহ্ রাসূল (সাঃ) তাদেরকে বেশী অপরাধী বলে উল্লেখ করে বলেনঃ ‘একদা আল্লাহ্ পাক এক যালেম, পাপাচারী ও দূর্বৃত্ত জাতিকে ধ্বংস করার জন্য ফেরেশতা পাঠালেন। কিন্তু ফেরেশতা সেই জাতির মধ্যে আল্লাহ্ র যিকির-আযকারে লিপ্ত কিছু বুয়র্গ ব্যক্তিকে দেখে ধ্বংস না করে ফিরে গেলেন। আল্লাহ্ তার কাছে জানতে চাইলেন সেই জাতিকে ধ্বংস করা হয়েছে কি না? উত্তরে ফেরেশতা বললেনঃ হে রাক্বুল আলামীন! সেই দূর্বৃত্ত জাতির মধ্যে তোমার এমন কিছু বুয়র্গ বান্দা বসবাস করেছে যাদের বুয়র্গানী দেখে আমি আর সেই জাতিকে ধ্বংস করতে পারিনি ফিরে এসেছি। আল্লাহ্ বললেন : তুমি আগে সেই বুয়র্গ ব্যক্তিদের ধ্বংস করবে। তার পর জাতির অন্যদেরকে ধ্বংস করবে। কেননা তারা নিজেরা যিকির আযকার এবং এবাদত বন্দেগী করেছে কিন্তু জাতির অন্যদেরকে দাওয়াত দেয়নি এবং অপরাধ, পাপাচার থেকে মুক্ত করার জন্য কোন জিহাদ চেষ্টা-তদবীর করেনি। সুতরাং তারাই বড় অপরাধী। তাদের এবাদত-বন্দেগী এবং বুয়র্গানী আমার কাছে কোন মূল্য নেই। (খোৎবাতুল আহকাম)।

প্রিয় ভায়েরা/বোনেরা! আমরা যদি আমাদের সমাজের দিকে একবার চোখ বুলায় তাহলে উপরোক্ত হাদীসের মতো একই অবস্থা দেখতে পাই। এক শ্রেণীর

লোক সকল প্রকার অন্যায়, অপকর্ম এবং পাপাচারে লিপ্ত থেকে সমাজকে ধ্বংসের দিকে নিয়ে যাচ্ছে। আর এক শ্রেণীর লোক নিজেকে আল্লাহর অলী-পীর, বুয়র্গ, পরহেজগার, নেককার বান্দা সেজে এবং সমাজের ফেৎনা-ফাসাদ থেকে নিজেকে মুক্ত মনে করে মসজিদে-খানকায় বসে বসে তাসবীহ, তাহলীল এবং যিকির আয্কারে ব্যস্ত থেকে সওয়াবের হেসাব কসছে। এরা কি হাদীসে বর্ণিত জাহাজের দ্বোতলা আরোহীদের মতো নয়? এরা কি দুর্বৃত্ত সমাজের মধ্যে যিকির আয্কারে ব্যস্ত আল্লাহর অভিশপ্ত বুয়র্গ বান্দার মতো নয়?

অন্যায়ের প্রতিরোধ এবং ন্যায়ের প্রতিষ্ঠার জন্য আন্দোলন-সংগ্রাম না করার জন্য তাদের উপর যখন আল্লাহর পক্ষ থেকে গযব-আযাব এবং দুঃশাসন চেপে বসবে তখন তা থেকে বাঁচার জন্য ঐ বুয়র্গ নেককার লোকেরা দোআ করলে কি আল্লাহ তাআলা তাদের সেই দোআ কবুল করবেন না ছুড়ে ফেলবেন? অথচ সমাজ আজ অন্যায়, অপকর্ম, জেনা-ব্যভিচার, হত্যা-ধর্ষণ, রাহাজানি থেকে গুরু করে যত প্রকার পাপাচার অপরাধ আছে যা আইয়্যামে জাহেলিয়াতকেও ছাড়িয়ে গেছে। সেই সমাজকে পরিবর্তনের চেষ্টা না করে, অন্যায়-অপরাধকে প্রতিরোধ না করে বরং এক শ্রেণীর লোক মসজিদে মসজিদে ঘুরে বেড়াচ্ছে আর সওয়াবের হেসাব কসছে। খানকায় ও পীরের দরবারে বসে যিকির-আয্কার এবং তাসবীহ-তাহলীলে মশগুল আছে। আর এর কারণে যদি আল্লাহর গযব, শাস্তি নামে এবং তা থেকে বাঁচার জন্য হাজারো দোআ করতে থাকে তাহলে হাদীস অনুযায়ী তাদের দোআ তো কবুল হবেই না বরং আল্লাহ তাআলা তাদেরকে সমাজের অপরাধী, পাপাচারী, যালেমদের দলভুক্ত করে জাহান্নামে নিক্ষেপ করবেন। প্রকৃত পক্ষে আল্লাহ তাআলা তো কেবলমাত্র তাদেরকেই দুনিয়া এবং আখেরাতে নাযাত দেবেন যারা **تَأْمُرُونَ بِالْمَعْرُوفِ وَتَنْهَوْنَ عَنِ الْمُنْكَرِ** নেক কাজের আদেশ দেবে এবং অন্যায় ও পাপ কাজ থেকে বাধা দেবে। অর্থাৎ ন্যায়ের প্রতিষ্ঠা ও অন্যায়ের প্রতিরোধের জন্য আত্মনিয়োগ করবে। চেষ্টা তদবীর করবে। নিজের জান-মাল দিয়ে সংগঠিত হয়ে আন্দোলন-সংগ্রাম চালিয়ে যাবে।

কুরআন-হাদীসে দুনিয়া এবং আখেরাতে বাঁচার উপায় জিহাদ ছাড়া আর বিকল্প কোন পথ দেখা যায় না। যারা একাজ না করবে তাদের মৃত্যু মুনাফেকের মৃত্যু

বলে গণ্য হবে। আল্লাহর রাসূল (সাঃ) বলেনঃ

مَنْ مَاتَ وَلَمْ يَغْزُ وَلَمْ يُحَدِّثْ بِهِ نَفْسَهُ مَاتَ عَلَى
شُعْبَةٍ مِّنَ النِّفَاقِ - (مُسْلِمٌ)

যে ব্যক্তি মৃত্যু বরণ করলো অথচ জীবনে জিহাদ বা ইসলামী আন্দোলন করলো না এমনকি ইসলামী আন্দোলন করার চিন্তাও (পরিকল্পনা) করলো না। সে যেন মুনাফেকীর অবস্থায় মৃত্যুবরণ করলো (মুসলিম)

আল্লাহ তাআলা আমাদেরকে এই করুণ মৃত্যু থেকে বাঁচার তাওফীক দান করুন। আমীন।

শিক্ষা : প্রিয় ভায়েরা/বোনেরা! অত্র হাদীসের ব্যাখ্যা-বিশ্লেষণের মাধ্যমে যেসব শিক্ষণীয় বিষয় পাওয়া গেল তা হলো :

✳ সকল অবস্থায় নিজে ন্যায় ও নেকীর কাজ করতে হবে এবং অন্যদেরকে ন্যায় ও নেকীর কাজ করার আদেশ এবং উৎসাহ-উদ্দীপনা দিতে হবে।

✳ সকল সময় এবং সকল অবস্থায় নিজে অন্যায়, অপকর্ম এবং পাপ কাজ থেকে বিরত থাকতে হবে এবং অন্যদেরকেও অন্যায়, অপকর্ম ও পাপ কাজ থেকে বারণ করতে হবে এবং প্রয়োজনে প্রতিরোধ গড়ে তোলতে হবে।

✳ এ কাজ একাকী করা সম্ভব নয়। সুতরাং জামায়াতবদ্ধ হয়ে আন্দোলন-সংগ্রাম পরিচালনা করতে হবে।

✳ যারা ন্যায়ের প্রতিষ্ঠা এবং অন্যায়ের প্রতিরোধের কাজ করে না তারা নিজেদেরকে যতই নেককার এবং ভাল মানুষ মনে করুক না কেন আল্লাহর দৃষ্টিতে সমাজ বিদ্বংসী অপরাধী থেকে তাদের কোন পার্থক্য নেই।

✳ সৎ কাজের আদেশ এবং অন্যায় কাজে প্রতিরোধের জন্য রাষ্ট্রীয় ক্ষমতার প্রয়োজন। এই জন্য জামায়াত বা দলবদ্ধ হয়ে নিজের জান এবং মাল দিয়ে ইসলামী রাষ্ট্র প্রতিষ্ঠার জন্য জিহাদ বা আন্দোলন চালিয়ে যেতে হবে।

✳ দুনিয়া এবং আখেরাতে আল্লাহর আযাব থেকে বাঁচার জন্য অন্যায়ের প্রতিরোধ এবং ন্যায়ের প্রতিষ্ঠার জন্য সর্বাত্মক প্রচেষ্টা চালাতে হবে।

দারসে হাদীস দ্বিতীয় খন্ড-৩৪

✱ সমাজে অন্যায়, অপকর্ম এবং পাপাচার নির্বিঘ্নে চালু থাকা অবস্থায় কেউ যদি আল্লাহর কাছে এই গযব-আযব থেকে বাঁচার জন্য দোআ করে তাহলে আল্লাহ তাআ'লা তার দোআকে কবুল করবেন না বরং প্রত্যাখ্যান করবেন। সুতরাং আল্লাহর আযাব থেকে মুক্তি এবং দোআ কবুলের একমাত্র উপায় হলো ন্যায় কাজের আদেশ এবং অন্যায় কাজের প্রতিরোধ।

আহবান : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটির যে দারস পেশ করলাম এতে যদি আমার অজান্তে বাড়াবাড়ি এবং ত্রুটি হয়ে যায় তার জন্য মহান আল্লাহর কাছে ক্ষমা প্রার্থনা করছি। আর হাদীস থেকে আমরা যেসব শিক্ষণীয় বিষয় জানতে পারলাম তা যেন বাস্তব জীবনে আমল করে ইহলৌকিক ও পারলৌকিক অভয় জগতে আল্লাহর শাস্তি থেকে বাঁচতে পারি সেই তাওফীক কামনা করে দারস শেষ করছি। মাআস সালাম।

তিন

জামায়াতবদ্ধ জীবন-যাপনের গুরুত্ব

الْحَمْدُ لِلَّهِ وَكَفَى وَسَلَّمْ عَلَى عِبَادِهِ الَّذِينَ اصْطَفَى
 آمَّا بَعْدُ-بِسْمِ اللَّهِ الرَّحْمَنِ الرَّحِيمِ-
 عَنِ الْحَارِثِ الْأَشْعَرِيِّ قَالَ قَالَ رَسُولُ اللَّهِ صَلَّى اللَّهُ
 عَلَيْهِ وَسَلَّمَ أَنَا أَمْرُكُمْ بِخُمُسِ اللَّهِ أَمَرَنِي بِهِنَا
 بِالْجَمَاعَةِ وَالسَّمْعِ وَالطَّاعَةِ وَالْهَجْرَةِ وَالْجِهَادِ فِي
 سَبِيلِ اللَّهِ وَإِنَّهُ مَنْ خَرَجَ مِنْ الْجَمَاعَةِ قَيْدَ شِبْرٍ فَقَدْ
 خَلَعَ رِبْقَةَ الْإِسْلَامِ مِنْ عُنُقِهِ إِلَّا أَنْ يَرْجِعَ-وَمَنْ دَعَا
 بِدَعْوَى الْجَاهِلِيَّةِ فَهُوَ مِنْ جُشَىءٍ جَهَنَّمَ وَإِنْ صَامَ
 وَصَلَّى وَزَعَمَ أَنَّهُ مُسْلِمٌ-(أَحْمَدُ تَرْمِذِي)

অনুবাদ : হযরত হারেসুল আশআরী (রাঃ) হতে বর্ণিত আছে, তিনি বলেনঃ
 রাসূলুল্লাহ (সাঃ) বলেছেন : আমি তোমাদেরকে পাঁচটি কাজের নির্দেশ
 দিচ্ছি, আল্লাহ আমাকে যে পাঁচটি কাজের নির্দেশ দিয়েছেন। তা হলো : ১)
 জামায়াত বা দলবদ্ধ হবে। ২) নেতার আদেশ মন দিয়ে শোনবে। ৩) তার
 আদেশ মেনে চলবে। ৪) হযরাত করবে এবং ৫) আল্লাহর পথে জেহাদ
 করবে। যে ব্যক্তি জামায়াত বা সংগঠন ত্যাগ করে এক বিঘত পরিমাণ দূরে
 সরে গেল, সে যেন নিজের কাঁধ থেকে ইসলামের রশি বা বাঁধন খুলে
 ফেললো। যতক্ষণ না সে সংগঠনে ফিরে আসবে। আর যে ব্যক্তি
 জাহেলিয়াতের নিয়ম-নীতির দিকে লোকদেরকে দাওয়াত দেবে, সে
 জাহান্নামের জ্বালানী হবে। যদিও সে রোজা রাখে, নামায পড়ে এবং
 নিজেকে মুসলমান বলে দাবি করে। (আহমদ, তিরমিযী)

বিশেষ বিশেষ শব্দার্থ : **عَنْ** -থেকে বা হতে। **قَالَ** -বলেন বা বলেছেন।
خَمْسٍ -পাঁচ। **أَمْرُكُمْ** -তোমাদেরকে আদেশ দিচ্ছি। **أَنَا** -আমি।
بِالْجَمَاعَةِ -জামায়াতের বা **أَمْرِنِي** -আমাকে আদেশ করা হয়েছে।
وَالطَّاعَةِ -এবং আনুগত্যের। **السَّمْعِ** -শোনার। **و-** এবং।
وَالْجِهَادِ فِي سَبِيلِ اللَّهِ -এবং হিজরাত বা পরিত্যাগের। **وَالْهَجْرَةِ** -
مَنْ -যে কেউ। **وَإِنَّهُ** -এবং নিশ্চয় উহার।
مِنَ الْجَمَاعَةِ -বের হলো বা বের হয়ে গেল বা দূরে সরে গেল। **خَرَجَ** -
قَيْدَ شَبِيرٍ -এক বিঘত বা অর্ধ হাত **و-** জামায়াত বা সংগঠন থেকে।
فَقَدْ خَلَعَ -অতঃপর সে খুলে ফেললো বা মুক্ত হয়ে গেল। **رَبْقَةٍ** -
مِنْ -থেকে বা হতে। **عُنُقِهِ** -তার **أَلَا سَلَامٌ** -ইসলামের রজ্জু বা বন্ধন।
أَيُّرْجَعُ -সে ফিরে **أَلَا** -ছাড়া এখানে যতক্ষণ না।
وَمَنْ -এবং যে কেউ। **دَعَا** -ডাকা বা আহবান করা।
جَشَى -অতঃপর সে হবে। **فَهُوَ** -জাহেলিয়াত বা মূর্খতা। **أَلْجَاهِلِيَّةِ** -
وَإِنْ -এবং যদিও। **صَامَ** -সে রোজা **جَهَنَّمَ** -জাহান্নামের ইন্ধন বা জ্বালানী।
وَزَعَمَ -এবং দাবী করে বা মনে **وَصَلَّى** -এবং নামায পড়ে।
أَنَّهُ مُسْلِمٌ -নিশ্চয় সে মুসলমান।

সম্বোধন : প্রিয় দ্বীনি/ইসলামী আন্দোলনের কর্মী ভায়েরা/বোনেরা! আস্‌সালামু
 আলাইকুম। আমি আপনাদের সামনে দারসে হাদীস পেশ করার জন্য বিশিষ্ট
 বর্ণনাকারী হারেসুল আশআরীর বর্ণিত জামায়াত বা সংগঠনের গুরুত্ব সংক্রান্ত
 হাদীস পাঠ এবং অনুবাদ পেশ করেছি। আল্লাহ্‌পাক যেন আমাকে হাদীসটির
 সঠিক ব্যাখ্যা এবং শিক্ষা তুলে ধরার তাওফীক দান করেন। আমীন।
 হাদীসটি বর্ণনার সময়কাল : যদিও আল কুরআন নাযিলের মতো হাদীস

বর্ণনার সময়কাল নির্দিষ্ট করে বলা কঠিন। তার পরেও হাদীসের বিষয়বস্তু দেখে মনে হয় হাদীসটি রাসূলুল্লাহ (সাঃ) মাদানী জীবনে বর্ণনা করেছেন। তার কারণ হলো হাদীসের সর্বশেষে উল্লেখ রয়েছে যদিও সে রোজা রাখে এবং নামায পড়ে। নামায মাক্কী জীবনের শেষের দিকে ফরজ হলেও রোজা ফরজ হয়েছে মাদানী জীবনের প্রথম দিকে অর্থাৎ হিজরাতের প্রায় এক-দেড় বছর পরে। অতএব বলা যায় হাদীসটি মাদানী জীবনে রাসূলুল্লাহ (সাঃ) বর্ণনা করেছেন। তার পরেও আল্লাহ পাকই ভাল জানেন।

হাদীসের কেতাব দু'টির পরিচয় : উল্লেখিত হাদীসটি অত্যন্ত সুপরিচিত দু'টি বিশুদ্ধ কিতাব ইমাম আহমদ বিন হাম্বলের 'আহমদ' এবং ইমাম তিরমিযীর 'তিরমিযী' কিতাবে স্থান পেয়েছে। আহমদ এবং তিরমিযীর হাদীস বিশুদ্ধ হলেও তিরমিযী শরীফ 'সেহাহ্ সেত্তাহ্' কেতাবের অন্তর্ভুক্ত কিন্তু 'আহমদ' এর অন্তর্ভুক্ত নয়।

ব্যাখ্যা : প্রিয় ভায়েরা/বোনেরা! এতক্ষণ পর্যন্ত আপনাদের সামনে পঠিত হাদীসটির অনুবাদ সহ প্রাথমিক কিছু পরিচয় তুলে ধরলাম। এখন আমি হাদীসটির প্রয়োজনীয় ব্যাখ্যা পেশ করছি।

আমি তোমাদেরকে আদেশ করছি **أَنَا أَمْرُكُمْ بِخَمْسٍ** **اللَّهُ أَمَرَنِي بِهِمَا** পাঁচটি জিনিসের বা কাজের যে পাঁচটি কাজের নির্দেশ আল্লাহ আমাকেও করেছেন।

এখানে রাসূলুল্লাহ (সাঃ) আল্লাহ আমাকে যে পাঁচটি কাজের নির্দেশ দিয়েছেন। এই রিফারেন্স এই জন্যই টেনেছেন যে যাতে করে উম্মতে মুহাম্মদী তার গুরুত্ব বেশী বেশী উপলব্ধি করে এবং তা বাস্তবায়নের জন্য আত্মাণ প্রচেষ্টা চালায়।

মূলতঃ নিম্নের পাঁচটি কাজ রাসূলুল্লাহ (সাঃ) এর মুখ দিয়ে বলা হলেও প্রকৃত পক্ষে কথাগুলো আল্লাহ তাআ'লার। যাকে হাদীসের পরিভাষায় হাদীসে কুদুসী বলা হয়।

প্রিয় ভায়েরা বোনেরা! এখন আমি আপনাদের সামনে পাঁচটি গুরুত্বপূর্ণ কাজের নির্দেশগুলো পর পর আলোচনা করছি—

এক. **بِالْجَمَاعَةِ** জামায়াত বা সংগঠনভুক্ত থাকবে। অর্থাৎ জামায়াত বা সংঘবদ্ধ জীবন যাপন করবে। হাদীসের এই নির্দেশ মতে সর্বপ্রথম যে

গুরুত্বপূর্ণ কাজটি উন্নতে মুহাম্মদিকে করতে হবে তা হলো জামায়াত বা সংগঠনভুক্ত থাকা। এটা একটা মুসলমানদের অত্যন্ত গুরুত্বপূর্ণ কাজ। যার সম্পর্কে বলতে গিয়ে হযরত উমরে ফারুক (রাঃ) বলেন : لَا إِسْلَامَ إِلَّا بِجَمَاعَةٍ জামায়াত বা সংগঠন ছাড়া ইসলাম নেই। অর্থাৎ জামায়াত বা সংঘবদ্ধ জীবন যাপন ছাড়া ইসলামের অস্তিত্ব কল্পনা করা যায় না। মহান আল্লাহ পাক কালামে হাকীম সূরা আলে ইমরানের ১০৩ নম্বর আয়াতে উল্লেখ করে বলেন :

وَاَعْتَصِمُوا بِحَبْلِ اللَّهِ جَمِيعًا وَلَا تَفَرَّقُوا

তোমরা সকলে আল্লাহর রজ্জু তথা দ্বীন ইসলামকে জামায়াতবদ্ধ হয়ে মজবুত ভাবে আঁকড়ে ধরো এবং পরস্পর বিচ্ছিন্ন হয়ে যেয়ো না। সুতরাং দ্বীন ইসলামের উপর টিকে থাকতে হলে এবং দ্বীন ইসলামকে কায়েম করতে হলে জামায়াতবদ্ধ হয়েই করতে হবে, বিকল্প কোন পথে নয়।

জামায়াতবদ্ধ বা সংগঠনভুক্ত থাকা একজন মুসলমানের ঈমানী দায়িত্ব এবং কর্তব্য। যদি সে তার এই দায়িত্ব না পালন করে তবে তার পরিণতি সম্পর্কে বলতে গিয়ে মহানবী (সাঃ) অন্য এক হাদীসে বলেন :

فَعَلَيْكَ بِالْجَمَاعَةِ فَإِنَّمَا يَأْكُلُ الذِّئْبُ الْقَائِصِيَّةَ

জামায়াতবদ্ধ হয়ে থাকা তোমাদের কর্তব্য। কেননা পাল হতে বিচ্ছিন্ন ছাগলকে নেকড়ে বাঘ সহজেই খেয়ে ফলে। অর্থাৎ নেকড়ে বাঘ দলছুট ছাগলকে যেমন সহজেই খেয়ে ফেলে, তেমনি জামায়াত বহির্ভূত ব্যক্তিকে শয়তান সহজেই তার জালে আবদ্ধ করে জাহান্নামে পৌঁছিয়ে দেয়।

এই জামায়াত বা সংগঠন বলতে আমাদের সমাজে পাড়ায়-মহল্লায় এবং গ্রামে গঞ্জে যে জামায়াত আছে সেই জামায়াত বা পঞ্চায়েত নয়। এই জামায়াত হলো ইসলাম পালন এবং প্রতিষ্ঠার জন্য যে জামায়াত বা সংগঠন তাকেই বুঝান হয়েছে। পাড়া-মহল্লার জামায়াত হলো একটা সামাজিকতা, এতে কিছু সামাজিক নিরাপত্তা পাওয়া যায় মাত্র।

দুই. السَّمْعُ নেতার আদেশ মন দিয়ে শোনাবে। একটি জামায়াত বা সংগঠনের দু'টা পার্ট বা অংশ থাকে। একটা পার্ট হলো নেতা এবং অপর পার্ট

হলো কর্মী বাহিনী। সংগঠনের দ্বিতীয় পার্ট বা অংশের অর্থাৎ কর্মী বাহিনীর যে কাজ হবে তা হলো সংগঠনের আমীর বা দায়িত্বশীলের কথা বা নির্দেশকে ভালভাবে মন দিয়ে শ্রবণ করা। কেননা নেতা যা নির্দেশ করবে তা যদি ভাল ভাবে মন দিয়ে শোনা না হয়, তা হলে নেতার সেই নির্দেশটি সুন্দরভাবে সম্পন্ন করা সম্ভব হয় না। অথবা কিছু হলেও পুরোপুরিভাবে বাস্তবায়িত হয় না।

সুতরাং নেতার কোন কথা বা নির্দেশকে সুন্দর-এবং সূচারুরূপে বাস্তবায়ন করতে হলে নেতার নির্দেশটি পালন করার আগে তার কথা বা নির্দেশ ভাল ভাবে মন দিয়ে শোনতে হবে। প্রয়োজনে বুঝতে না পারলে জিজ্ঞাসার মাধ্যমে যাচাই-বাচাই করে নিয়ে ভালভাবে বুঝে নিতে হবে। তারপর সেই কাজটি আন্তরিকতার সাথে পালন করতে হবে। এটা হলো ইসলামী আন্দোলন বা সংগঠনের কর্মীদের প্রথম গুরুত্বপূর্ণ কাজ বা কর্তব্য।

তিন. **وَالطَّاعَةِ** এবং নেতার আনুগত্য করবে বা আদেশ মান্য করবে। অত্র হাদীসের তিন নম্বরে এই নির্দেশে উল্লেখ করা হয়েছে যে, সংগঠনের কর্মী বাহিনীর নেতার নির্দেশ মন দিয়ে শোনার পর দ্বিতীয় যে গুরুত্বপূর্ণ কাজ হবে তা হলো সেই নির্দেশ যথাযথ ভাবে পালন করা। নেতার কথা বা নির্দেশ মন দিয়ে শ্রবণ করে থেকে গেলেই চলবে না। বরং সেই নির্দেশ অনুযায়ী কাজ করতে হবে। আর একেই বলা হয় এতায়াত বা আনুগত্য।

ইসলামী সংগঠন বা আন্দোলনের কর্মীদের আনুগত্য করা অবশ্য কর্তব্য। সংগঠন বা আন্দোলনের শৃঙ্খলা রক্ষা এবং লক্ষ্যে পৌঁছার জন্য আনুগত্য হচ্ছে অপরিহার্য শর্ত। তাই আল্লাহ পাক মুমিনদেরকে আনুগত্যের তাগাদা দিয়ে সূরা নিসা-এর ৫ম নম্বর আয়াতে উল্লেখ করেনঃ

يَا أَيُّهَا الَّذِينَ آمَنُوا أَطِيعُوا اللَّهَ وَأَطِيعُوا الرَّسُولَ وَأُولِي
الْأَمْرِ مِنْكُمْ

হে মুমিনগণ তোমরা আল্লাহ এবং তাঁর রাসূলের আনুগত্য করো এবং তোমাদের নেতা বা দায়িত্বশীলের আনুগত্য করো। এই আয়াতে ইঙ্গিত দেয়া হয়েছে যে আল্লাহ এবং রাসূলের নির্দেশের আনুগত্য বিনা শর্তে করতে হবে এবং **أُولِي الْأَمْرِ** বলে আমীর বা নেতার আনুগত্য শর্তসাপেক্ষে করতে হবে। কেননা নেতার আনুগত্য হবে কেবল উত্তম এবং নেক-কল্যাণকর কাজের

ক্ষেত্রে। কোন অন্যায় বা পাপের কাজে অথবা নেতার কোন খামখেয়ালী কাজের আনুগত্য করা যাবে না। এই সম্পর্কে মহানবী (সাঃ) স্পষ্টভাবে উল্লেখ করে বলেন :

السَّمْعُ وَالطَّاعَةُ عَلَى الْمَرْءِ الْمُسْلِمِ فِيمَا أَحَبَّ وَكَرِهَ
مَا لَمْ يُؤْمَرْ بِمَعْصِيَةٍ فَإِذَا أُمِرَ بِمَعْصِيَةٍ فَلَا سَمْعَ وَلَا
طَاعَةَ-

নেতার নির্দেশ শোনা ও মানা প্রত্যেক মুসলিমের জন্য অবশ্য কর্তব্য। সে নির্দেশ তার মন মতো হোক আর না হোক। তবে এই শর্তে যে, তা যেন আল্লাহর নাফরমানীমূলক কাজের জন্য না হয়। আর যখন কোন নাফরমানীমূলক কাজের আদেশ তাকে দেয়া হবে তখন তা শোনাও যাবে না এবং মানাও যাবে না। (বুখারী মুসলিম)

চার. وَالْهِجْرَةُ এবং হিজরাত করবে। রাসূলের চতুর্থ নম্বর যে নির্দেশ তা হলো প্রয়োজনে হিজরাত করা।

হিজরাত অর্থ : هِجْرَةٌ আরবী শব্দটির অর্থ হলো ত্যাগ করা। এর দ্বারা মুহাদ্দীসগণ দু'টো অর্থ করেছেন।

i) هِجْرَةٌ (হিজরাত) অর্থ-আল্লাহর নিষিদ্ধ জিনিস পরিত্যাগ করা। বুখারী শরীফে এ সম্পর্কে হাদীসে উল্লেখ রয়েছে-

وَالْمُهَاجِرُ مَنْ هَاجَرَ مَا نَهَى اللَّهُ عَنْهُ

মুহাজির ঐ ব্যক্তি যে আল্লাহর নিষিদ্ধ জিনিস পরিত্যাগ করে। তাছাড়া একবার রাসূলুল্লাহ (সাঃ) কে জিজ্ঞেস করা হয়েছিল- مَا الْهِجْرَةُ أَفْضَلُ - হে আল্লাহর রাসূল (সাঃ) কোন হিজরাত উত্তম? প্রতি উত্তরে রাসূলুল্লাহ (সাঃ) বলেছিলেন : أَنْ تَهْجُرَ مَا كَرِهَ رَبُّكَ

তোমার রব যা অপছন্দ করেন তা ত্যাগ করাই হলো উত্তম হিজরাত। এটি হলো হিজরাতের ব্যাপক অর্থ যা কেবলমাত্র একটি কাজের মধ্যেই সীমাবদ্ধ নয়।

ii) هِجْرَةٌ (হিজরাত) এর দ্বিতীয় অর্থ কেউ কেউ নিয়েছেন দেশ ত্যাগ।

আল্লাহর যমীনে আল্লাহর দীন কায়েম করতে গিয়ে প্রয়োজনে নিজের দেশ ত্যাগ করা। এ হিজরাতের তখনই সুযোগ আছে যখন আল্লাহর বিধান মেনে চলার কোন সুযোগই থাকেনা। তবে এই হিজরাত হতে হবে বিশুদ্ধ নিয়্যতে, দুনিয়ার কোন সুযোগ-সুবিধার জন্য নয়। যেমন রাসূলুল্লাহ (সাঃ) তাঁর সঙ্গী-সাথীদের নিয়ে মক্কা থেকে মদীনায়ে হিজরাত করেছিলেন।

সুতরাং হাদীসে উল্লেখিত রাসূলুল্লাহ (সাঃ) এর চতুর্থ যে নির্দেশ তা হলো আল্লাহ যা অপছন্দ করেন, তিনি যা হারাম করেছেন, যে কাজ এবং কথা থেকে বারণ করেছেন তা পরিহার করা। আর জামায়াতবদ্ধ হয়ে আল্লাহর দীন প্রতিষ্ঠা করতে গিয়ে আল্লাহর পক্ষ থেকে যে সব পরীক্ষা আসবে তার মধ্যে একটা হলো হিজরাত বা দেশ ত্যাগ। ফলে প্রয়োজন হলে মহান আল্লাহর সন্তুষ্টির জন্য দীন পালনের উদ্দেশ্যে নিজের দেশ বা বাড়ি-ঘর ত্যাগ করা।

পাঁচ. وَأَلْجِهَادِ فِي سَبِيلِ اللَّهِ এবং আল্লাহর পথে জিহাদ করবে।

রাসূলুল্লাহ (সাঃ) হাদীসে পঞ্চম যে নির্দেশ দিয়েছেন তা হলো আল্লাহর যমীনে আল্লাহর দীন তথা ইসলাম প্রতিষ্ঠার জন্য জিহাদ করা। আন্দোলন-সংগ্রাম করা।

আল্লাহ এবং আল্লাহর রাসূল সর্বশেষ যে নির্দেশ দিয়েছেন তা পালনের জন্য উপরে উল্লেখিত চারটি জিনিসের প্রয়োজন হয়। যেমন—

আল্লাহর দীন প্রতিষ্ঠার জন্য প্রয়োজন জিহাদ বা ইসলামী আন্দোলনের। আর আন্দোলন পরিচালনার জন্য প্রয়োজন জামায়াত বা সংগঠনের। আর সংগঠন পরিচালনার জন্য প্রয়োজন আমীর বা নেতার এবং একদল সুশৃঙ্খল কর্মীবাহিনীর। সেই কর্মী বাহিনী সংগঠনের নেতার কথা বা নির্দেশকে মন দিয়ে শোনবে এবং সেই অনুযায়ী আনুগত্য করবে, কাজ করবে। আর দীন কায়েমের স্বার্থে প্রয়োজনে হিজরাত করবে।

জিহাদ ফী সাবিলিল্লাহ বা ইসলামী আন্দোলন করা ঈমানের অপরিহার্য দাবী। কেননা যে সমাজ বা রাষ্ট্র ইসলামী আইন বা বিধি-বিধান দ্বারা পরিচালিত হয় না, সেই সমাজে একজন মুমিন চুপ করে বসে থাকতে পারে না। এতে তার ঈমানের দাবী পূর্ণ হয় না। ঈমানের প্রথম এবং প্রধান দাবীই হলো দীন তথা ইসলামী সমাজ ব্যবস্থা প্রতিষ্ঠার জন্য জানমাল দিয়ে আল্লাহর পথে জিহাদ

করা। কেননা এটা হলো সব ফরজের বড় ফরজ। তার কারণ জিহাদের এই ফরজটি পালন করতে পারলে অন্যান্য ফরজগুলো পালন করা সহজ হয়ে যায়। জিহাদ ফী সাবিলিল্লাহর কথা আল্লাহ্ পাক আল-কুরআনে এবং রাসূল (সাঃ) হাদীসে অসংখ্য জায়গায় উল্লেখ করে এর গুরুত্ব তুলে ধরেছেন।

অতঃপর রাসূলুল্লাহ (সাঃ) অত্র হাদীসে জামায়াত থেকে বিচ্ছিন্ন হয়ে যাবার পরিণতি সম্পর্কে বলতে গিয়ে বলেন :

وَأِنَّهُ مَنْ خَرَجَ مِنَ الْجَمَاعَةِ قَيْدَ شِبْرٍ فَقَدْ خَلَعَ رِبْقَةَ
الْإِسْلَامِ مِنْ عُنُقِهِ- إِلَّا أَنْ يَرْجِعَ

আর যে কেউ জামায়াত বা সংগঠন ত্যাগ করে এক বিষত বা অর্ধ হাত পরিমাণ দূরে সরে গেল সে যেন তার গলদেশ থেকে ইসলামের রশি বা বাঁধন খুলে ফেললো। যতক্ষণ না সে সংগঠনে ফিরে আসবে।

এখানে রাসূলুল্লাহ (সাঃ) জামায়াতবদ্ধ জীবন যাপনের গুরুত্ব তুলে ধরেছেন। জামায়াতভুক্ত জীবন যাপন এমনই এক গুরুত্বপূর্ণ বিষয় যে ইসলামের মধ্যে থাকা না থাকা এরই উপর নির্ভর করে। যদি কেউ জামায়াত বা ইসলামী সংগঠন থেকে দূরে সরে যায় তাহলে সে ইসলামের দায়-দায়িত্ব থেকে মুক্ত হয়ে যায়। অর্থাৎ সে ইসলাম থেকে দূরে সরে যায়। অন্য হাদীসে রাসূলুল্লাহ (সাঃ) এর ব্যবস্থা হিসেবে বলেন :

مَنْ أَرَادَ أَنْ يَفْرُقَ أَمْرَ هَذِهِ الْجَمَاعَةِ وَهِيَ جَمِيعٌ
فَأَضْرِبُوهُ بِالصَّيْفِ كَأَنَّ مَنْ كَانَ-

কোন জামায়াত বা সংগঠন ঐক্যবদ্ধ থাকা অবস্থায় যে ব্যক্তি এর ঐক্য বিচ্ছিন্ন করতে চায়, তার চূড়ান্ত ব্যবস্থা হিসেবে তাকে তলোয়ার দিয়ে আঘাত করো অর্থাৎ হত্যা করো। সে যেই হোক না কেন। (মুসলিম)

হত্যা তো তখনই করা যায় যখন সে মুরতাদ তথা ইসলাম ত্যাগকারী হয়ে যায়। সুতরাং জামায়াত ত্যাগকারী বা ভাদ্দার চেষ্টাকারী হলো ইসলাম ত্যাগকারী। অতএব তার শাস্তিই হলো তাকে হত্যা করা। তবে এই জামায়াত বলতে রাসূলুল্লাহ (সাঃ) এর জামায়াতকেই বুঝানো হয়েছে। কেননা রাসূলুল্লাহ (সাঃ) এর জামায়াত ছিলো الجماعة (আল জামায়াত) বা একমাত্র জামায়াত। রাসূলুল্লাহ (সাঃ) এর ওফাতের পর আর কোন একক জামায়াত

নেই। সমাজে জামায়াত বা ইসলামী দল একাধিক থাকতে পারে। সুতরাং যে কোন মুসলমান যে কোন জামায়াত বা ইসলামী সংগঠনের মধ্যে অন্তর্ভুক্ত থাকতে পারে। তবে শর্ত হলো সেই জামায়াতের লক্ষ্য উদ্দেশ্য হবে আল্লাহর যমীনে আল্লাহর দীন কায়েমের চেষ্টা করার মাধ্যমে আল্লাহর সন্তুষ্টি অর্জন। বর্তমানে আমাদের দেশে যে জামায়াত বা ইসলামী দল আছে তার কোনটিই একক বা একমাত্র জামায়াত নয়। তবে যে দলের লক্ষ্য-উদ্দেশ্য হবে আল্লাহর যমীনে আল্লাহর দীন প্রতিষ্ঠার মাধ্যমে আল্লাহর সন্তুষ্টি অর্জন এবং কর্মসূচী হবে রাসূল (সাঃ)-এর কর্মসূচীর অনুরূপ। কেবলমাত্র সেই দলের অন্তর্ভুক্ত থেকেই দীন প্রতিষ্ঠার কাজ চালিয়ে যেতে হবে। এই জন্য অবশ্য তাকে দল বাছাই করার যোগ্যতা অর্জন করতে হবে। তবে হ্যাঁ একাধিক ইসলামী দলের বাহানা দিয়ে সংগঠন থেকে দূরে থাকা যাবে না। কোন না কোন ইসলামী জামায়াত বা সংগঠনের সাথে তাকে সম্পৃক্ত থাকতে হবে। জামায়াত বা সংগঠন ত্যাগ করা তখনই যাবে যখন দেখা যাবে যে আমি যেই সংগঠনে আছি সেই সংগঠনের চেয়ে কুরআন সুন্নাহ এবং কৌশলের দিক থেকে অন্য একটি সংগঠন উত্তম। কেবল মাত্র তখনই স্থায়ী দল ত্যাগ করে সেই উত্তম দলে যাওয়া যাবে। সুতরাং মুসলমানিত্ব রক্ষা করতে হলে তাকে অবশ্যই কোন না কোন একটা ইসলামী সংগঠনের মধ্যে সংপৃক্ত থাকতে হবে।

অতঃপর রাসূলুল্লাহ (সাঃ) জাহান্নামী ‘দায়ী’ (আহবানকারীদের) কথা উল্লেখ করে বলেন :

وَمَنْ دَعَا بِدَعْوَى الْجَاهِلِيَّةِ فَهُوَ مِنْ جُشَىٰ جَهَنَّمَ۔

আর যে ব্যক্তি জাহেলিয়াতের নিয়ম-নীতির দিকে লোকদেরকে দাওয়াত দেবে সে জাহান্নামের জ্বালানী হবে।

প্রিয় ভায়েরা/বোনেরা! রাসূলুল্লাহ (সাঃ) এখানে জাহেলী বা তাগুতি মতবাদের দিকে আহবানকারীর পরিণতি সম্পর্কে বলতে গিয়ে বলেনঃ যে ব্যক্তি জাহেলি দল বা মতবাদের দিকে মানুষকে দাওয়াত দেবে, ডাকবে বা আহবান জানাবে সে জাহান্নামী হবে। আল্লাহর মতবাদ বা নিয়ম-নীতি ছাড়া আর যতো মতবাদ বা নিয়ম-নীতি আছে সবই জাহেলী মতবাদ বা নিয়ম-নীতি। তা যে নামেই ডাকা হোক না কেন। চাই তা সমাজতান্ত্রিক মতবাদ হোক, পুঁজিবাদ অথবা ধর্ম নিরপেক্ষ মতবাদ হোক বা জাতীয়তাবাদই হোক। সকল মতবাদই হলো জাহেলী মতবাদ বা তাগুতি মতবাদ। এগুলো সবই মানব রচিত তাগুতি

মতবাদ। কেননা আল্লাহর দৃষ্টিতে দুটো দল রয়েছে। একটা হলো هَزْبُ اللَّهِ - আল্লাহর দল এবং অন্যটা হলো هَزْبُ الشَّيْطَانِ বা শয়তানের দল।

সুতরাং যে কেউ জাহেলী তথা তাগুতি মতবাদ বা নিয়ম-নীতির দিকে মানুষকে দাওয়াত দেবে, সেই মতবাদে নিজে জড়িত থাকবে এবং প্রতিষ্ঠার জন্য চেষ্টা করবে, সে জাহান্নামের জ্বালানী হবে অর্থাৎ জাহান্নামী হবে।

পবিত্র কালামে হাকীমে সর্বোত্তম দাওয়াতের কথা বলতে গিয়ে আল্লাহ পাক বলেন :

وَمَنْ أَحْسَنَ قَوْلًا مِّمَّنْ دَعَا إِلَى اللَّهِ وَعَمِلَ صَالِحًا
وَقَالَ إِنِّي مِنَ الْمُسْلِمِينَ-

তার কথা অপেক্ষা আর কার কথা উত্তম হতে পারে, যে মানুষকে আল্লাহর দিকে দাওয়াত বা আহ্বান করে, নিজে সৎ কাজ করে এবং বলে আমি একজন মুসলমান? (হা-মীম, সীজদাহ-৩৩)

অত্র আয়াতে বুঝা যায় যে, আল্লাহর দিকে দাওয়াত দেওয়া বা ডাকা হলো সর্বোত্তম কথা। আর এটাই হলো একজন মুমিনের সর্বোত্তম কথা ও কাজ। এরাই সৎ এবং নেক কাজ করতে পারে। আর এরাই একমাত্র মুসলমানের দাবীদার হতে পারে, অন্য কেউ নয়। হাদীসের সর্বশেষ অংশে বলা হয়েছে-

وَإِنْ صَامَ وَصَلَّى وَزَعَمَ أَنَّهُ مُسْلِمٌ-

আর যদিও সে রোজা রাখে, নামায পড়ে এবং নিজেকে মুসলমান হিসেবে দাবী করে।

হাদীসের সর্বশেষ অংশে বলা হয়েছে যারা জাহেলিয়াত বা শয়তানী মতবাদ এবং নিয়ম-নীতির দিকে দাওয়াত দেবে, জাহেলী মতবাদের সাথে জড়িত থাকবে, তারা জাহান্নামী হবে। যদিও এসব লোক রোজার মাসে রোজা রাখে, নিয়মিত নামায পড়ে এবং নিজেকে দাবী করে মুসলমান বলে।

অত্র হাদীস দ্বারা এটাই বুঝা যায় যে, যারা জাহেলী মতবাদ তথা শয়তানী দলে জড়িত থেকে সেই দলের মতবাদ বা নিয়ম-নীতিকে প্রতিষ্ঠার জন্য চেষ্টা করে এবং অন্যদেরকেও সেই দলে অংশগ্রহণের আহ্বান করে। অথচ তারা নামায পড়ে, রোজা রাখে এবং মুসলমানের দাবীও করে, এদের সব কিছুই বিফল।

আসলে তাদের এসব কাজ এবং দাবী কোন কল্যাণে আসবে না। এসব আ'মল এবং দাবী আল্লাহর কাছে কোন মূল্য নেই। যেহেতু তারা কুফরী মতবাদের সাথে জড়িত।

প্রিয় ভায়েরা/বোনেরা! আমাদের সমাজে অসংখ্য রোজাদার, নামাযী, নামধারী মুসলমান আছে যারা জীবনভর জাহেলী তথা মানব রচিত মতবাদ প্রতিষ্ঠার জন্য চেষ্টা চালিয়ে যাচ্ছে, এমন, মার খাচ্ছে, জেল-জুলুম-নির্যাতন ভোগ করছে। অনেক ত্যাগ কুরবানীও করছে। হাদীসের ভাষ্য অনুযায়ী তাদের এই নামায, রোজা, হজ্ব, যাকাত, নেক কাজ, ত্যাগ-কুরবানী এবং জুলুম-নির্যাতন ভোগ আল্লাহর কাছে কি কোন মূল্য আছে? তাদের মুসলমানিত্বের এই অসার দাবী কি আল্লাহর কর্ণপাত হবে? আসলে সবই বিফলে যাবে। তাদের পরিণতি অত্যন্ত ভয়াবহ। আল্লাহর অসন্তোষ এবং জাহান্নামে যাওয়া ছাড়া তাদের আর কোন গত্যন্তর থাকবে না। আল্লাহর কাছে তো কেবলমাত্র তাদেরই নামায, রোজা, হজ্ব, যাকাত, নেক আমল গ্রহণযোগ্য হবে। জেল-জুলুম-নির্যাতন ভোগ এবং ত্যাগ-কুরবানী তো কেবল তাদেরই আল্লাহর কাছে মূল্য আছে। মুসলমানিত্বের দাবী তো কেবলমাত্র তারাই করতে পারে, যারা মানুষকে আল্লাহর দিকে তথা আল্লাহর দ্বীনের দিকে দাওয়াত দেয়, নিজেরাও সেই দ্বীন প্রতিষ্ঠার আন্দোলনে শরীক থাকে এবং জান-মাল দিয়ে জিহাদ করে, সংগ্রাম-লড়াই করে। এসব আমলের অধিকারীদের জন্যই রয়েছে সফলতা। এদের জন্যই রয়েছে পরিভ্রাণ। এদের জন্যই রয়েছে আল্লাহর সন্তোষ এবং অফুরন্ত নিয়ামতে ভরা জান্নাত। যেখানে তারা চিরকাল অবস্থান করবে।

শিক্ষা : প্রিয় ভায়েরা/বোনেরা! এতক্ষণ পর্যন্ত আপনাদের সামনে অত্র হাদীসের যে ব্যাখ্যা-পেশ করা হলো তা থেকে আমাদের জন্য যেসব শিক্ষণীয় বিষয় রয়েছে তা হলো—

✱ হাদীসে রাসূলের এই নির্দেশকে আল্লাহরই নির্দেশ মনে করতে হবে।

✱ দ্বীন ইসলাম প্রতিষ্ঠার সংগ্রামে রতো একটা উত্তম জামায়াত বা দলের সাথে জড়িত থাকতে হবে এবং মৃত্যুর পূর্বক্ষণ পর্যন্ত সেই দলে টিকে থাকতে হবে।

✱ সংগঠন বা দলের যিনি আমীর বা দায়িত্বশীল থাকবেন তার কথা বা নির্দেশ ভাল ভাবে মন দিয়ে আন্তরিকতার সাথে শোনতে হবে। প্রয়োজনে বুঝতে না পারলে বা ব্যাখ্যার প্রয়োজন হলে তা জিজ্ঞাসার মাধ্যমে বুঝে নিতে হবে।

✱ আমীর বা দায়িত্বশীলের নেতৃত্ব মেনে নিতে হবে এবং তার আনুগত্য করতে হবে। তার আদেশ মন দিয়ে শোনার পর সে অনুযায়ী কাজটা নিষ্ঠা এবং আন্তরিকতার সাথে বাস্তবায়ন করতে হবে।

✱ আল্লাহ্ এবং আল্লাহ্র রাসূলের আদেশকে বিনা শর্তে প্রশ্ন ছাড়াই মেনে নিতে হবে। তবে আমীর বা দায়িত্বশীলের আদেশ শর্ত সাপেক্ষে মানতে হবে। কেবলমাত্র মা'রুফ বা উত্তম ও কল্যাণকর কাজের ক্ষেত্রে নির্দেশ মানতে হবে। ব্যক্তির খামখেয়ালী এবং নাফরমানীমূলক কোন কথা বা নির্দেশ শোনা যাবে না এবং মানাও যাবে না।

✱ হারাম এবং নিষিদ্ধ সকল আ'মল বা কাজ পরিহার করে চলতে হবে। এমনকি যদি কাজে কোন সন্দেহ থাকে তাও পরিত্যাগ করতে হবে। এটা হবে তাকওয়ার গুণ।

✱ আল্লাহ্র দীন প্রতিষ্ঠা করতে গিয়ে যদি দীন পালনের কোন পরিবেশ বা সুযোগ না থাকে তা হলে একমাত্র দীনের স্বার্থে প্রয়োজনে ঘর-বাড়ী অথবা দেশ ত্যাগ করার জন্য প্রস্তুত থাকতে হবে।

✱ আল্লাহ্র যমীনে আল্লাহ্র দীন প্রতিষ্ঠার জন্য জিহাদ ফী সাবিলিল্লাহ বা ইসলামী আন্দোলনে জড়িত থেকে সর্বাতক ত্যাগ ও কুরবানী করতে হবে।

✱ ইসলামী সংগঠন থেকে যেমন নিজে বের হতে পারবে না, তেমনি অন্যকেও বের করার জন্য চেষ্টা করা যাবে না এবং সংগঠনের মধ্যে কোন বিশৃঙ্খলা সৃষ্টি করা যাবে না।

✱ ইকামাতে দীনের কাজে নিয়োজিত যদি কোন দল বা সংগঠনের কার্যক্রম নিজের দলের থেকে উত্তম দেখা যায় তাহলেই কেবলমাত্র নিজের দল ত্যাগ করে সেই দলে যোগ দেয়া যাবে। তবে যাচাই এর যোগ্যতা থাকতে হবে।

✱ যেই দলের মধ্যে দীন প্রতিষ্ঠার কোন কর্মসূচী নেই এবং উদ্দেশ্য ও লক্ষ্যের মধ্যে আল্লাহ্র সন্তুষ্টি নেই। বরং দুনিয়ায় যাদের টার্গেট। এমন কোন দল বা সংগঠনের সাথে জড়িত থাকা যাবে না। সেই দলের দিকে অন্যদের ডাকা যাবে না এবং সেই দলকে সাহায্য-সহযোগীতাও করা যাবে না। সে দল যে নামেই হোক না কেন।

✱ নামায, রোজা, হজ্ব, যাকাত, নেক আ'মল আল্লাহ্র কাছে গ্রহণযোগ্য তখনই হবে এবং মুসলমানিত্বের দাবী তখনই করা যাবে, যখন তার কার্যক্রম এবং মানুষকে ডাকার কাজ আল্লাহ্র দিকে হবে। আর কেবলমাত্র তখনই জাহান্নাম থেকে পরিত্রাণ পেয়ে জান্নাতে যাওয়া যাবে।

আহবান : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটির যে দারস পেশ করলাম এতে যদি আমার অজান্তে কোন বাড়াবাড়ি বা ভুল হয়ে যায় তার জন্য আল্লাহ্র কাছে ক্ষমা চাচ্ছি। আর এই হাদীসটি থেকে আমরা যেসব শিক্ষা লাভ করলাম তা যেন বাস্তব জীবনে আ'মল করতে পারি সেই তাওফীক কামনা করে দারস শেষ করছি।

দান কারীর প্রতিদান এবং কৃপণব্যক্তির পরিণতি :

نَحْمَدُهُ وَنُصَلِّي عَلَى رَسُولِهِ الْكَرِيمِ أَمَّا بَعْدُ

بِسْمِ اللَّهِ الرَّحْمَنِ الرَّحِيمِ

عَنْ أَبِي هُرَيْرَةَ قَالَ قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ السَّخِيُّ قَرِيبٌ مِّنَ اللَّهِ وَقَرِيبٌ مِّنَ الْجَنَّةِ قَرِيبٌ مِّنَ النَّاسِ بَعِيدٌ مِّنَ النَّارِ - وَالْبَخِيلُ بَعِيدٌ مِّنَ اللَّهِ بَعِيدٌ مِّنَ الْجَنَّةِ بَعِيدٌ مِّنَ النَّاسِ قَرِيبٌ مِّنَ النَّارِ - وَالْجَاهِلُ سَخِيٌّ أَحَبُّ إِلَى اللَّهِ مِنْ عَابِدٍ بَخِيلٍ - (ترمذی)

অনুবাদ : হযরত আবু হুরাইরা (রাঃ) থেকে বর্ণিত আছে, তিনি বলেন : রাসূলুল্লাহ (সাঃ) বলেছেন : দাতা বা দানকারী আল্লাহর নিকটতম, বেহেশতের নিকটতম এবং মানুষের নিকটতম হয়ে থাকে। আর দূরে থাকে জাহান্নাম থেকে। অপর পক্ষে কৃপণ ব্যক্তি দূরে থাকে আল্লাহ হতে, বেহেশত হতে এবং মানুষ হতে। আর জাহান্নামের নিকটে থাকে। অবশ্য অবশ্যই একজন জাহেল দাতা একজন বখিল আবেদের তুলনায় আল্লাহর কাছে বেশী প্রিয়। (তিরমিযী)

বিশেষ বিশেষ শব্দার্থ : عَنْ - হতে বা থেকে। قَالَ - বলা বা বলেছেন। مِّنَ - দাতা বা দানকারী। قَرِيبٌ - নিকটতম বা নিকটবর্তী। السَّخِيُّ - হতে বা থেকে। النَّاسِ - মানুষ। بَعِيدٌ - দূরে। وَ - এবং। بَخِيلٌ - বখিল বা কৃপণ। الْجَاهِلُ - মূর্থ। أَحَبُّ - প্রিয়। إِلَى - দিকে বা কাছে। عَابِدٍ - আবেদ বা ইবাদাতকারী।

সম্বোধনঃ প্রিয় দীনদার/ইসলামী আন্দোলনের কর্মী ভায়েরা/বোনেরা! আসসালামু আলাইকুম। আমি আপনাদের সামনে দারসে হাদীস পেশ করার জন্য বিশিষ্ট সাহাবী ও রাবী হযরত আবু হুরাইরা (রাঃ) থেকে বর্ণিত হাদীসটি পাঠ ও অনুবাদ পেশ করেছি। আল্লাহ পাক যেন আমাকে আপনাদের সামনে হাদীসটির সঠিক ব্যাখ্যা এবং শিক্ষা তুলে ধরার তাওফীক দান করেন। আমীন।

হাদীসটি বর্ণনার সময়কাল : হাদীসটি বর্ণনার সময়কাল সম্পর্কে আমাদের কাছে কোন সুনির্দিষ্ট তথ্য নেই। তার পরেও হাদীসটির বিষয়বস্তু দেখে মনে হয় বর্ণনার সময়কাল মাদানী জীবনে হতে পারে। কেননা মাদানী জীবনে রাসূলুল্লাহ (সাঃ) এর হাতে সমাজ পরিচালনার দায়িত্ব ছিলো। তাছাড়া যুদ্ধ-জিহাদও তিনি সেখান থেকেই পরিচালনা করেছিলেন। সামাজিক অধিকার হিসেবে এবং যুদ্ধ জিহাদ পরিচালনার জন্য তিনি দানের ব্যাপারে বেশী বেশী তাগাদা দিতেন। সুতরাং এর ভিত্তিতে বলা যায় যে, হাদীসটি রাসূলুল্লাহ (সাঃ) মাদানী জীবনে বর্ণনা করেছিলেন। তার পরেও আল্লাহ পাকই ভাল জানেন।

রাবী বা বর্ণনাকারীর পরিচয় : নাম- আবদুর রহমান। বংশীয় নাম- আবদি শামস (অরুণ দাস)। লকব বা পদবী নাম- আবু হুরাইরা। পিতার নাম- আমের বিন আবদে জিশ্শারা। তিনি দাওস গোত্রের ইয়েমেনের অধিবাসী ছিলেন। আবু হুরাইরা মদীনায় ইসলাম গ্রহণ করেন। আবু হুরাইরার নামকরণ সংক্রান্ত অনেকগুলো বর্ণনা পাওয়া যায়। কেউ বলেন যে, তিনি ছোট থেকে বিড়াল খুব ভাল বাসতেন এজন্য তার সঙ্গী-সাথীরা আবু হুরাইরা (বিড়াল ওয়ালা) বলে ডাকতো। সহীহ বুখারীতেও বর্ণিত আছে যে, নবী (সাঃ) বিড়াল ভালবাসার কারণে তাকে আবুহার বা আবু হুরাইরা বলে ডাকতেন। হযরত আবু হুরাইরা (রাঃ) আসহাবে সুফ্ফার একজন সদস্য এবং রাসূলুল্লাহ (সাঃ) এর সার্বক্ষণিকের সাথী ছিলেন। তিনি কয়েকবার মদীনার গভর্ণরের দায়িত্ব পালন করেন এবং হযরত মুয়াবিয়া (রাঃ) এর শাসন আমলে মাঝে-মধ্যে ভারপ্রাপ্ত আমীরের দায়িত্বও পালন করেন। তিনি ৫৯ হিজরীতে ইন্তেকাল করেন। তাঁর বর্ণিত হাদীসের সংখ্যা ৫,৩৭৪টি। তিনি সর্বাধিক হাদীসের বর্ণনাকারী ছিলেন।

ব্যাখ্যা : প্রিয় ভায়েরা/বোনেরা! এতক্ষণ পর্যন্ত আমি আপনাদের সামনে হাদীসটির প্রাথমিক ধারণা পেশ করলাম। এখন প্রয়োজনীয় ব্যাখ্যা পেশ করছি। রাসূলুল্লাহ (সাঃ) বলেন :

السَّخِيُّ قَرِيبٌ مِنَ اللَّهِ قَرِيبٌ مِنَ الْجَنَّةِ قَرِيبٌ مِنَ النَّاسِ - بَعْدُ مِنَ النَّارِ

দাতা বা দানকারী আল্লাহর নিকটবর্তী, জান্নাতের নিকটবর্তী, মানুষের নিকটবর্তী এবং জাহান্নাম থেকে দূরে থাকে।

রাসূলুল্লাহ (সাঃ) হাদীসের এই অংশে সাখী বা দানকারীর মর্যাদা এবং অবস্থান উল্লেখ করেছেন।

السَّخِيُّ (সাখীর) অর্থ দাতা বা দানকারী। যার হাত খোলা, যিনি দ্বীন প্রতিষ্ঠা এবং মানবতার সেবার জন্য মুক্ত হস্তে দান করেন। যিনি অন্যায় পথে খরচ করেন না। যিনি অপচয় অপব্যয় করেন না। যেই কাজে কোন কল্যাণ এবং উপকার নেই, যেই দানে আল্লাহর সন্তুষ্টি নেই, সেই সমস্ত ক্ষেত্রে তিনি দান করেন না। পক্ষান্তরে যেই কাজে মানুষের কল্যাণ এবং উপকার আছে, সেই সমস্ত ক্ষেত্রে খরচ করতে তিনি দ্বিধা করেন না। যিনি দ্বীন প্রতিষ্ঠার সংগ্রামে এবং আল্লাহর সন্তুষ্টির কাজে দ্বিধা-সংকোচহীন ভাবে মুক্ত হস্তে দান করেন। এক্ষেত্রে তিনি কোন কার্পণ্য করেন না। দুনিয়ার কোন মোহ এবং শয়তানী কোন অসুওয়াসাও তাকে দান করা থেকে প্রতিবন্ধকতা সৃষ্টি করতে পারে না। যিনি কত দান করলেন বড় করে দেখার জন্য বার বার তা গুনে গুনে দেখেন না। কেননা রাসূলুল্লাহ (সাঃ) বলেছেন :

أَنْفَقْ وَلَا تَحْصِيَ فَيُحْصِيَ اللَّهُ عَلَيْكَ

তুমি খরচ করো, কত খরচ করলে তা বড় করে দেখার জন্যে হেসাব কসতে যেও না, তাহলে আল্লাহও তোমার বিপক্ষে হেসাব কসবেন। (বুখারী মুসলিম)

তিনি এমনই সাখী, যিনি দান বন্ধ করে দিয়ে মাল-সম্পদ জমা করার প্রতি আত্ম নিয়োগ করেন না। কেননা রাসূল (সাঃ) বলেছেনঃ

وَلَا تُؤْعَى فَيُؤْعَى اللَّهُ عَلَيْكَ

তোমরা (মাল-সম্পদ) জমা করার প্রতি বেশী মনোযোগী হবে না, তাহলে আল্লাহও তোমার বিপন্নের জমা ভাল করে সংরক্ষণ করবেন। (বুখারী মুসলিম) যিনি দীন প্রতিষ্ঠার আন্দোলনে, নিজের পরিবারের জন্য, মানবতার সেবার কাজে সাধ্যমত খরচ এবং ব্যয় করেন। হাদীসে তাকেই সাখী, দাতা বা দানকারী বলা হয়েছে। যিনি বা যারা এ ধরনের দানের অধিকারী তাদের বিশেষ মর্যাদা এবং কয়েকটি প্রতিদানের কথা উল্লেখ করে অত্র হাদীসে রাসূলুল্লাহ (সাঃ) বলেনঃ

প্রথম প্রতিদান : **قَرِيبٌ مِّنَ اللَّهِ** সে আল্লাহর নিকটতম হয়। তার মানে হলো আল্লাহ যেহেতু শ্রেষ্ঠ দাতা সেই জন্য তিনি দাতাদেরকে বেশী ভাল-বাসেন। তাদের এই কাজে সন্তুষ্ট হয়ে যান। আল্লাহ হচ্চেন উদার, তাঁর অফুরান্ত নিয়ামতের ভান্ডার থেকে তিনি প্রতিনিয়ত তাঁর সৃষ্টি জীবের জন্য দান করে যাচ্ছেন। আর তাঁর এই দানের মাধ্যমে মানুষ সহ সকল সৃষ্টি জীব জীবন ধারণ করছে এবং বেঁচে থাকছে। সুতরাং যার মধ্যে এই গুণ থাকবে স্বাভাবিক ভাবেই সে আল্লাহর নিকটবর্তী ব্যক্তি হয়ে যাবে। অর্থাৎ আল্লাহর সন্তুষ্টি অর্জন করে প্রিয় পাত্র হয়ে যাবে।

দ্বিতীয় প্রতিদান : **قَرِيبٌ مِّنَ الْجَنَّةِ** সে জান্নাতের কাছাকাছি থাকে। অর্থাৎ মুক্ত হস্তে দানের কারণে সে জান্নাতের অধিবাসী হয়ে যায়। দাতার জন্য এটা একটা বিরাট প্রতিদান। এর চেয়ে বড় আর কোন প্রতিদান হতে পারে না। তার কারণ মানুষের চূড়ান্ত টার্গেটই তো হলো আল্লাহর সন্তুষ্টি অর্জন করে জান্নাত লাভ। সুতরাং যে ব্যক্তি আল্লাহর দ্বীনের জন্য এবং মানব সেবার জন্য নিজের ধন-সম্পদ একমাত্র আল্লাহরই রাজি-খুশির উদ্দেশ্যে মুক্ত হস্তে দান করে তার প্রতিদান হলো আল্লাহর সন্তুষ্টি এবং জান্নাত। আর এটাই হলো মানুষের চূড়ান্ত এবং স্থায়ী সফলতা। তার কারণ হলো, দান করার মতো মহান কাজটি হলো আল্লাহ এবং জান্নাতের কাছাকাছি অবস্থানকারী লোকদের কাজ। আল্লাহর সন্তুষ্টি অর্জনের কাজ। জান্নাতি লোকদের কাজ।

তৃতীয় প্রতিদান : **قَرِيبٌ مِّنَ النَّاسِ** সে মানুষের নিকতম থাকে। দাতা বা দানকারীর তৃতীয় যে মর্যাদা বা প্রতিদান তা হলো সে মানুষেরও কাছাকাছি থাকে। তার মানে হলো, দাতা যখন দান করে সেই দান পরিবারের হোক,

অথবা দীন প্রতিষ্ঠার কাজেই হোক, কিম্বা মানব সেবার কাজেই হোক, সকল ক্ষেত্রে মানুষই উপকৃত হয়ে থাকে। কেননা মানুষের কল্যাণের জন্যই পরিবারের খরচ হয়। মানুষের কল্যাণের জন্যই দীন প্রতিষ্ঠা করা হয় এবং মানুষের কল্যাণের জন্যই মানব সেবার কাজে দান করা হয়। সকল ক্ষেত্রে মানুষই কল্যাণ প্রাপ্ত এবং উপকৃত হয়। আর এই উপকৃত হবার কারণেই মানুষ দাতাকে ভালবাসে, তাকে শ্রদ্ধা করে এবং তার প্রতি সন্তুষ্টি হয়ে তার জন্য কল্যাণের দোআ করে। মোট কথা দাতা মানুষের খুব কাছের এবং অন্তরের লোক হয়ে যায়। সে সকলের ভালবাসার পাত্র হয়ে যায়। তারা দাতার কল্যাণ ছাড়া অকল্যাণ কামনা করে নয়। শুধু যে মানুষেরই ভালবাসার পাত্র হয়ে হয়ে যায় তা না। বরং ফেরেশতারাও তার জন্য কল্যাণের দোআ করে। এ সম্পর্কে রাসূল (সাঃ) বলেন :

مَا مِنْ يَوْمٍ يُصْبِحُ الْعِبَادُ إِلَّا مَلَكَانِ يُنْزِلَانِ - فَيَقُولُ أَحَدُهُمَا اللَّهُمَّ آتِنَا خَيْرَ مَا نَسْأَلُ وَالْآخَرَ خَيْرَ مَا نَسْأَلُ -

যখনই বান্দারা ভোর বেলায় বিছানা থেকে ওঠে, তখনই দু'জন ফেরেশতা অবতীর্ণ হয়। তার মধ্যে একজন দোআ করতে থাকে হে আল্লাহ! তুমি দাতাকে প্রতিদান দাও। আর অন্যজন দোআ করতে থাকে, হে আল্লাহ! তুমি কৃপণকে লোকসান দাও। (বুখারী মুসলিম)

চতুর্থ প্রতিদান : بَعِيْتُ مِنَ النَّارِ জাহান্নাম থেকে দূরে থাকে। অর্থাৎ দাতার দানের কারণে সে দোযখে তো যায় না বরং দোযখের ধারে কাছেও যায় না। যেহেতু দান করা নেকী এবং আল্লাহর সন্তুষ্টির কাজ। সে হেতু তার এই অবদান তথা এই কাজের নেকী এবং আল্লাহর সন্তুষ্টির জন্য সে জাহান্নাম থেকে অনেক দূরে অবস্থান করে। জাহান্নামের ধারে কাছেও ঘেঁষে না। অর্থাৎ আল্লাহর সন্তুষ্টি এবং নেকী মানুষকে জান্নাতেই নিয়ে যায়, জাহান্নামে নয়।

পক্ষান্তরে যারা বখিল তাদের সম্পর্কে বলতে গিয়ে রাসূলুল্লাহ (সাঃ) অত্র হাদীসে বলেন :

وَالْبَخِيلُ بَعِيدٌ مِّنَ اللَّهِ بَعِيدٌ مِّنَ الْجَنَّةِ بَعِيدٌ مِّنَ
النَّاسِ قَرِيبٌ مِّنَ النَّارِ -

আর বখিল বা কৃপণ ব্যক্তি থাকে-আল্লাহ হতে দূরে, জান্নাত হতে দূরে, মানুষ হতে দূরে এবং জাহান্নামের নিকটে। হাদীসের এই অংশে পূর্বের অংশের সম্পূর্ণ বিপরীত কথা বলা হয়েছে। অর্থাৎ যারা বখিল বা কৃপণ, তারা তাদের কৃপণতার কারণে আল্লাহ হতে দূরে সরে যায়। জান্নাত হতে দূরে থাকে। মানুষের কাছ থেকেও দূরে সরে যায় এবং জাহান্নামের কাছাকাছি থাকে অর্থাৎ জাহান্নামে চলে যায়। অত্র হাদীসে কৃপণদের কয়েকটি ক্ষতির কথা উল্লেখ করে মহানবী (সাঃ) বলেন :

প্রথম ক্ষতি : **اللَّهُ** তারা আল্লাহ থেকে দূরে থাকে। অর্থাৎ যারা অর্থ-সম্পদ থাকার পরেও আল্লাহর দীন প্রতিষ্ঠার জন্য খরচ করে না। নিজের পরিবারের নূন্যতম চাহিদা পূরণের জন্য ব্যয় করে না। যারা মানবতার কল্যাণে দান করে না, তারা আল্লাহর অসন্তুষ্টির পাত্রে পরিণত হয়। কেননা আল্লাহ দাতা-কৃপণ নন। তিনি কৃপণতাকে পছন্দ করেন না। কৃপণতা হলো তাঁর বৈশিষ্ট্যের বিপরীত। ফলে তিনি কৃপণদের প্রতি অসন্তুষ্ট হয়ে যান। আর এই জন্যই কৃপণ ব্যক্তি আল্লাহ থেকে অনেক দূরে সরে যায়।

মহান আল্লাহ কৃপণদের সম্পর্কে বলেন :

هَآأَنَآتُمْ هَؤُلَآءِ تَدْعُونَ لِنُفَقَّوْا فِى سَبِيلِ اللَّهِ فَمِنْكُمْ
مَّنْ يَّأْخُلُ وَمِنْ يَّأْخُلُ فَإِنَّمَا يُبْخَلُ عَنْ نَفْسِهِ ط وَاللَّهُ
الْغَنِىُّ وَأَنْتُمْ الْفُقَرَاءُ -

শোন, তোমরাই তো তারা, যাদেরকে আল্লাহর পথে ব্যয় করার আহবান জানানো হচ্ছে, অতঃপর কেউ কেউ কৃপণতা করছে। যারা কৃপণতা করছে তারা নিজেদের প্রতিই কৃপণতা করছে। আর জেনে রাখ, আল্লাহ অভাবমুক্ত এবং তোমরাই হলে অভাবী। (মুহাম্মদ-৩৮)। অর্থাৎ কেউ যদি কৃপণতা করে তাহলে তার নিজের জন্যই কৃপণতা করে। অর্থাৎ নিজেই ক্ষতিগ্রস্ত হয়। কেননা

আল্লাহর কোন অভাব নেই, বরং মানুষেরাই অভাবী।

দ্বিতীয় ক্ষতি : **بَعِيدٌ مِّنَ الْجَنَّةِ** তারা জান্নাত থেকে দূরে থাকে। অর্থাৎ তাদের বোখালতী বা কৃপণতার কারণে তারা আল্লাহর অসন্তুষ্টির পাত্র হয়ে গোনাহুগার হয়ে যায়। আর আল্লাহর এই অসন্তুষ্টি ও গোনাহুর কারণে তারা জান্নাতের ধারে কাছে যেতে পারে না। তারা জান্নাত থেকে অনেক দূরে থাকে।

তৃতীয় ক্ষতি : **بَعِيدٌ مِّنَ النَّاسِ** তারা মানুষ থেকেও দূরে থাকে। অর্থাৎ কৃপণদের কৃপণতার কারণে তার পরিবার, আত্মীয়-স্বজন এবং অভাবগ্রস্থ মানুষ তাদের প্রাপ্ত থেকে বঞ্চিত হয়ে যাবার কারণে তার প্রতি অসন্তুষ্ট হয়ে তার পাশ থেকে দূরে সরে যায়। তার জন্য কল্যাণের দোআ করে না। তার দিকে সূদৃষ্টি দেয় না। তার বিপদ-আপদেও কাছে আসে না। কৃপণদের কৃপণতার কারণে শুধু মানুষই অসন্তুষ্ট হয়-তা নয়। বরং ফেরেশতারা পর্যন্ত বদদোআ করতে থাকে। রাসূলুল্লাহ (সাঃ) বলেন : **وَيَقُولُ الْآخِرُ اَعْطِ مُمْسِكًا ثَلَاثًا** - এবং অন্য ফেরেশতা বলতে থাকে, হে আল্লাহ তুমি কৃপণ ব্যক্তিকে লোকসান দাও। (বুখারী মুসলিম)

চতুর্থ ক্ষতি : **قَرِيبٌ مِّنَ النَّارِ** জাহান্নামের নিকটে থাকে। কৃপণ ব্যক্তির জন্য সবচেয়ে বড় এবং মারাত্মক যে ক্ষতি তা হলো, তার এই কৃপণতার কারণে সে জাহান্নামের ধারে পৌঁছে যায় অর্থাৎ জাহান্নামে চলে যায়। কৃপণতা এমন এক মারাত্মক ব্যাধি যে, কৃপণতার ফল হিসেবে সে আল্লাহর অপ্রী় হয়ে যায়। মানুষের অপ্রী় হয়ে যায়। এমনকি ফেরেশতাদেরও অপ্রী় হয়ে যায়। যার ফলে তারা তার জন্য বদদোআ পর্যন্ত করে বসে। মানুষের পারলৌকিক মুক্তি বা সফলতাই হলো আসল মুক্তি বা সফলতা। সুতরাং যারা বখিল তারা দুনিয়ার জীবনে যেমন সম্মান এবং শ্রদ্ধা পায় না, তেমনি তারা আল্লাহর অসন্তুষ্টি এবং ফেরেশতাদেরও লানতের পাত্র হয়ে যায়। পরিণতিতে তাকে জাহান্নামে যেতে হয়। আল্লাহ আমাদেরকে কৃপণতা থেকে হেফাজত করুন।

অতঃপর রাসূলুল্লাহ (সাঃ) হাদীসের সর্বশেষ অংশে বর্ণান করেন :

وَالْجَاهِلُ سَخِيٌّ أَحَبُّ إِلَى اللَّهِ مِنْ عَابِدٍ بَخِيلٍ -

আর একজন জাহেল দাতা একজন কৃপণ আবেদের তুলনায় আল্লাহর কাছে বেশী প্রিয়।

হাদীসের সর্বশেষ এই অংশে দাতা এবং কৃপণ ব্যক্তির মধ্যে আল্লাহর কাছে তুলনামূলক গ্রহণযোগ্যতার কথা উল্লেখ করা হয়েছে। একজন দাতা, কিন্তু সে জাহেল-মুর্থ, এবাদত-বন্দেগী তেমন বোঝে না এবং করেওনা। কিন্তু সে সাখী, দাতা, এবং দানের ব্যাপারে সে মুক্ত হস্ত। আল্লাহর জন্য, তার নিজের পরিবার এবং মানবতার সেবার জন্যে সে খোলা হাতে দান করে। এসব ক্ষেত্রে খরচের ব্যাপারে কোন কিছু তাকে ঠেকাতে পারে না। এমন দাতাই আল্লাহর কাছে বেশী প্রিয় এবং ভালবাসার পাত্র একজন কৃপণ ব্যক্তির তুলনায়। অর্থাৎ কৃপণ ব্যক্তি জ্ঞানী, এবাদত-বন্দেগীতে তৎপর হওয়ার পরও সে আল্লাহর জন্যে, নিজের পরিবার এবং মানবতার সেবার জন্যে কোন খরচ বা দান করে না। দানের ক্ষেত্রে সে মুষ্টিবদ্ধ। ফলে সে আল্লাহর কাছে অপ্রিয় অপছন্দনীয় হয়ে যায়। তার কারণ হলো আল্লাহ্ নিজে দাতা কৃপণ নন। তিনি কৃপণতাকে পছন্দ করেন না। কৃপণতা আল্লাহ্ তাআলার বৈশিষ্ট্যের পরিপন্থী। যেহেতু তিনি সাখী, দাতা। তাই তিনি সাখী, দাতা বা দানকারীকে বেশী পছন্দ করেন। কেননা দানের মধ্যে আল্লাহর অনেক ইবাদত বন্দেগী নিহিত রয়েছে। দান করাই হলো একটা বড় ইবাদত। কৃপণতা হলো শয়তানী কাজ। কেননা শয়তান কৃপণতার ব্যাপারে নির্দেশ দেয়। মহান আল্লাহ্ আল কুরআনে সূরা বাকারার ২৬৮ নম্বর আয়াতে উল্লেখ করেন-

الشَّيْطَانُ يَعِدُكُمُ الْفَقْرَ وَيَأْمُرُكُمْ بِالْفَحْشَاءِ

শয়তান তোমাদেরকে অভাব-অনটনের ভয় দেখায় এবং অশ্লীলতার অর্থাৎ কার্পণ্যের নির্দেশ দেয়। আয়াতে এখানে কৃপণতাকে অশ্লীলতার সাথে তুলনা করা হয়েছে। আর অশ্লীল কাজ তো মানুষের দুশমন শয়তানেরই কাজ। সুতরাং যত বড়ই আবেদ হোক না কেন, শয়তানের এই অশ্লীল কাজ কৃপণতার কারণে সে আল্লাহর কাছে অত্যন্ত অপ্রিয় হয়ে যায়। আল্লাহ্ তার এই কাজকে মোটেই পছন্দ করেন না। কিন্তু তিনি একজন জাহেল দাতাকে পছন্দ করেন। কেননা দান করার মধ্যে আল্লাহর হক এবং বান্দাহর হক উভয় আদায় হয়ে যায়।

অপরপক্ষে কৃপণতার কারণে আল্লাহ্ এবং বান্দা উভয়রই হক বা অধিকার নষ্ট হয়ে যায়। আর এই জন্যেই আল্লাহ্‌র কাছে একজন জাহেল দাতা একজন কৃপণ আবাদের তুলনায় অনেক উত্তম এবং প্রিয়।

শিক্ষা : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটির যে ব্যাখ্যা পেশ করা হলো। এতে যেসব শিক্ষণীয় বিষয় রয়েছে তা আপনাদের সামনে তুলে ধরছি।

০ ধনী অথবা গরীব হোক, সকল অবস্থায় দান করতে হবে।

০ স্বচ্ছল অবস্থায় হোক, আর অস্বচ্ছল অবস্থায় হোক, নিজের রুযি থেকেই আল্লাহ্‌র দীন প্রতিষ্ঠা এবং অভাবী পাড়া-প্রতিবেশী, আত্মীয়-স্বজনের জন্য খরচ করতে হবে।

০ দান বেহিসাব করতে হবে। কত দান করলাম তা বার বার হেসাব কষা যাবে না। কেননা দানের হেসাব কষতে আল্লাহ্‌র রাসূল (সাঃ) নিষেধ করেছেন।

০ দান-আল্লাহ্‌র সন্তুষ্টি, নেকী অর্জন এবং জান্নাত পাবার আশায় করতে হবে।

০ আল্লাহ্‌র অসন্তুষ্টি, গোনাহ্‌ এবং জাহান্নামের আগুন থেকে বাঁচার জন্য দান করতে হবে।

০ কৃপণতাকে ঘৃণা করতে হবে কৃপণতা থেকে দূরে থাকতে হবে। কেননা কৃপণতা হলো শয়তানী কাজ। আর এই শয়তানী কাজ মানুষকে আল্লাহ্‌, জান্নাত এবং মানুষ থেকে দূরে ঠেলে দেয়।

০ আল্লাহ্‌র অন্যান্য বন্দেগী করবো অথচ দান করবো না কৃপণতা করবো এটা করা যাবে না। এই আচরণ আল্লাহ্‌র কাছে খুবই অপছন্দনীয়।

০ সর্বপরি সকল অবস্থায় এবং সকল প্রকারের দান বা খরচ আল্লাহ্‌র সন্তুষ্টির জন্যই করতে হবে। লোক দেখানোর উদ্দেশ্যে খরচ করা যাবে না।

আহবান : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটির যে ব্যাখ্যা এবং শিক্ষা পেশ করলাম এতে যদি আমার অজান্তে কোন ভুল-ত্রুটি হয়ে যায়, তার জন্য আল্লাহ্‌র কাছে ক্ষমা চেয়ে নিচ্ছি। আর এতে আমাদের জন্য যেসব শিক্ষণীয় বিষয় রয়েছে তা যেন বাস্তব জীবনে কার্যকরী করতে পারি সেই তাওফীক কামনা করে দারস শেষ করছি।

দুনিয়া ভোগীদের প্রতিফল এবং দুনিয়া ত্যাগীদের প্রতিদান

نَحْمَدُهُ وَنُصَلِّي عَلَى رَسُولِهِ الْكَرِيمِ أَمَّا بَعْدُ

بِسْمِ اللَّهِ الرَّحْمَنِ الرَّحِيمِ

مَنْ أَبِي هُرَيْرَةَ قَالَ قَالَ رَسُولُ اللَّهِ صَلَّى اللَّهُ عَلَيْهِ
وَسَلَّمَ تَعِسَ عَبْدُ الدِّينَارِ وَعَبْدُ الدِّرْهَمِ وَعَبْدُ
الْخَمِيصَةِ إِنْ أُعْطِيَ رَضِيَ وَإِنْ لَمْ يُعْطَ سَخِطَ تَعِسَ
وَإِنْ تُكِسَ وَإِذَا شَيْئَكَ فَلَا أَنْتُقِشَ طُوبَى بِعَبِيدٍ أَخِظَ
بِعَنَانٍ فَرَسِهِ فِي سَبِيلِ اللَّهِ أَشَعَتْ رَأْسُهُ مُغْبَرَّةً فَقَدْ
مَاهُ إِنْ كَانَ فِي الْحِرَاسَةِ كَانَ فِي الْحِرْسَةِ وَإِنْ كَانَ
فِي السَّاقَةِ كَانَ فِي السَّاقَةِ إِنْ إِسْتَأْذَنَ لَمْ يُؤْذَنَ لَهُ
وَإِنْ شَفَعَ لَمْ يُسَفَّعَ (بُخَارِي)

অনুবাদ : হযরত আবু হুরাইরা (রাঃ) থেকে বর্ণিত আছে। তিনি বলেন :
রাসূলুল্লাহ (সাঃ) বলেছেন : ঐ ব্যক্তি ধ্বংস হোক যে দীনারের (স্বর্ণ মুদ্রা) দাস,
দিরহামের (রৌপ্য মুদ্রা) দাস এবং কম্বলের দাস। তার হীনমন্যতার অবস্থা এই
যে, যদি তাকে কোন কিছু দান করা হয় তাহলে সে আনন্দিত হয়, আর যদি
তাকে কিছু না দেয়া হয় তবে সে বিগড়ে যায়। আল্লাহ যেন এমন কাপুরুষকে
ধ্বংস ও লাঞ্চিত করে। যদি তার দেহে কাঁটা বিধে তবে যেন তা বের না হয়।
আর ঐ ব্যক্তি ভাগ্যবান, যে আল্লাহর পথে নিজ ঘোড়ার লাগাম লাগিয়ে সদা
(জীহাদের জন্য) প্রস্তুত থাকে। তার মাথার চুলগুলো উস্কো-খুস্কো এবং তার
পা দু'টো ধুলি মলিন থাকে। (তার নম্রতা ও সরলতার অবস্থা এই যে) যদি
তাকে সেনাবাহিনীর অগ্রভাগের রক্ষক (সেনাপতি) হিসেবে নিয়োগ করা হয়,

তবে সে সূচারূপে তা পালন করে। আর যদি তাকে সেনাবাহিনীর পেছনে ফেলে রাখা হয়, তবুও সে সানন্দে স্বীয় দায়িত্ব পালন করে। মোট কথা, সে হবে অত্যন্ত বাধ্য। শুধু দীনেরই খেদমত হবে তার উদ্দেশ্য ও লক্ষ্য। (বুখারী)

বিশেষ বিশেষ শব্দার্থ : **عَنْ** -হতে বা থেকে। **قَالَ** -বলেন। **تَعَسَى** -ধ্বংস হোক। **وَ** -এবং। **دِرْهَمٌ** -আরবীয় স্বর্ণ মুদ্রা। **عَبْدٌ** -দাস বা গোলাম। **الْخِمِيصَةُ** -মোটা জাতীয় কাপড় (কম্বল)। **دِرْهَمٌ** -আরবীয় রৌপ্য মুদ্রা। **رَضِيَ** -খুশি বা আনন্দিত হয়। **أُعْطِيَ** -তাকে দেয়া হয়। **إِنْ** -যদি। **لَمْ** -না। **تَعَسَى** -দেয়া না হয়। **سَخِطَ** -বিগড়ে যায় বা অসন্তুষ্ট হয়ে যায়। **فَلَا** -না। **وَإِنْ تُكْسَ** -এবং লাঞ্ছিত করে। **إِذَا شِئْتَ** -যখন কাঁটা বিধে। **أَخِظَ** -ধরে। **طُوبَى** -ভাগ্যবান। **أَنْتَقِشَ** -প্রস্তুত থাকে। **بِعَنْانٍ فَرَسِهِ** -তার ঘোড়ার লাগাম লাগিয়ে। **رَأْسُهُ** -তার মাথার চুল। **أَشْعَتْ** -উস্কো-খুস্কো। **كَانَ** -যদি। **إِنْ** -যদি। **فَقَدْ** -যদি। **مُغْبِرَةً** -ধুলো মলিন। **أَلْحَرَسَةُ** -সেনাবাহিনীর অগ্রগামী (সেনাপতি)। **فِي** -মধ্যে। **إِشْتَأَزْنَ** -যদি। **إِنْ** -যদি। **أَلَسَّاقَةَ** -সেনাবাহিনীর পেছনে। (সাধারণ সৈনিক)। **لَمْ يُؤْذَنَ لَهُ** -অনুমতি বা আদেশ। **سَفَعَ** -বাধ্য বা অনুগত।

সম্বোধন : প্রিয় ভায়েরা/বোনেরা! আস্সালামু আলাইকুম। আমি আপনাদের সামনে দারস পেশ করার জন্য বিশিষ্ট সাহাবী এবং সর্বাধিক্য হাদীস বর্ণনাকারী হযরত আবু হুরাইরা (রাঃ) এর বর্ণিত হাদীসটি পাঠ এবং অনুবাদ পেশ করেছি। আল্লাহ পাক যেন আমাকে আপনাদের সামনে হাদীসটির ব্যাখ্যা এবং শিক্ষা সঠিক ভাবে তুলে ধরার তাওফীক দান করেন। আমীন।

হাদীসটি বর্ণনার সময়কাল : আল কুরআনের আয়াত নাযিলের সময়কাল যেভাবে নির্দিষ্ট ভাবে উল্লেখ করা যায়, হাদীসের ক্ষেত্রে তা নির্দিষ্ট করে বলা সম্ভব না হলেও হাদীসের বিষয়বস্তুর দিকে লক্ষ্য করলে মনে হয়, হাদীসটি রাসূলুল্লাহ (সাঃ) মাদানী জীবনে বর্ণনা করেছিলেন। কেননা হাদীসের মধ্যে জিহাদের কথা বলা হয়েছে। তাছাড়া বৈষয়িক চাহিদার কথাও বলা হয়েছে যা মাদানী জীবনের জন্যই প্রযোজ্য, মাক্কী জীবনের জন্য নয়। তাছাড়া আব্বাহ পাকই ভাল জানেন।

রাবী বা বর্ণনাকারীর পরিচয় : রাবী হযরত আবু হুরাইরা (রাঃ) এর সংক্ষিপ্ত পরিচয় তিন নম্বর হাদীসে উল্লেখ করা হয়েছে। সেখানে দেখার অনুরোধ রইলো।

হাদীসটি গ্রহণকারী কিতাবের পরিচয় : সিহাহ-সিত্তা বা বিশুদ্ধ ছয়টি হাদীসের কিতাবের মধ্যে বুখারীর স্থান হলো সর্বোচ্চে। মুহাদ্দেসীনে কেরাম বলেন : আসমানের নীচে এবং যমীনের উপরে পবিত্র কুরআনের পরে আর যদি কোন বিশুদ্ধ কিতাব থাকে তবে সেটা হলো সহীহ আল বুখারী। হাদীসের কেতাবের মধ্যে এটা হলো সবচেয়ে বেশী গ্রহণযোগ্য হাদীসের কেতাব।

ব্যাখ্যা : প্রিয় ভায়েরা/বোনেরা! এতক্ষণ পর্যন্ত আমি আপনাদের সামনে হাদীসটির প্রাথমিক কিছু তথ্য প্রদান করলাম। এখন আমি মূল হাদীসের ব্যাখ্যা পেশ করছি। রাসূলুল্লাহ (সাঃ) দুনিয়াদার স্বার্থবাজদের সম্পর্কে বলেন :

تَعِسَ عَبْدُ الدِّينَارِ وَعَبْدُ الدِّرْهَمِ وَعَبْدُ الْخَمِيسَةِ
إِنْ أُعْطِيَ رَضِيَ وَإِنْ لَمْ يُعْطَ سَخِطَ-

ঐ ব্যক্তি ধ্বংস হোক যে দ্বীনারের দাস, দেবহামের দাস, কব্বলের দাস। যদি তাকে কোন কিছু দেয়া হয় বা দান করা হয়, তবে সে খুশি হয়ে যায়। আর যদি তাকে কোন কিছু দেয়া না হয়, তাহলে সে ব্যাজার হয়ে যায় বা বিগড়ে যায়।

হাদীসের এই অংশে রাসূলুল্লাহ (সাঃ) সেইসব দুনিয়া লোভী স্বার্থবাজদের জন্য বদদোআ করেছেন, যারা দুনিয়ার স্বার্থ পূরণ হলে মহা খুশী হয়ে যায়। আর স্বার্থ পূরণ না হলে অথবা স্বার্থের ক্ষতি হলে ব্যাজার হয়ে যায়, মন খারাপ করে

বিগড়ে যায় এবং আবোল-তাবোল মন্তব্য করতে শুরু করে দেয়।

তারা টাকা-পয়সা, ধন-সম্পদের জন্য এতো নীচে নেমে যায় যে, তারা তা পেলেই খুশী হয়ে যায়। টাকা-পয়সা-অর্থ-সম্পদের লোভ তাদেরকে এমন ভাবে গ্রাস করে ফেলেছে যে, তারা এছাড়া আর কিছুই বোঝে না। এজন্যই রাসূলুল্লাহ (সাঃ) তাদেরকে টাকা-পয়সা অর্থ-সম্পদের দাস বা গোলাম বলে মন্তব্য করেছেন। দাস বা চাকর যেমন মনিবের অনুগত হয়ে থাকে। তেমনি এসব স্বার্থবাজ, দুনিয়ালোভীরা যেন টাকা-পয়সা, অর্থ-সম্পদের অনুগত দাসে পরিণত হয়ে গেছে। অর্থাৎ এরা টাকা অথবা সম্পদ পেলেই খুশী না পেলেই ব্যাজার। আসলে এরা প্রকৃত ইমানদার নয়। রাসূলের আদর্শের অনুসারী এবং আল্লাহ প্রেমীক নয়। এরা দুনিয়া ত্যাগী আখেরাত মুখী নয়। এ জন্যই রাসূল (সাঃ) এসব স্বার্থবাজদের জন্য বদদোআ করেছেন। এসব কাপুরুষদেরকে ধ্বংস এবং অপমান-অপদস্ত করার জন্য আল্লাহর কাছে কামনা করে বলেছেন :

تَعِسَ وَانْتَكِسَ وَإِذَا شَيْكَ فَلَا انْتِقِشَ-

আল্লাহ যেন এমন কাপুরুষকে ধ্বংস ও লাঞ্চিত করেন। আর যদি তার দেহে কাঁটা বিধে তবে যেন তা বের না হয়।

যারা অর্থ-সম্পদের দাস, যারা এসব পেলেই খুশী হয়ে যায়, আর না পেলেই বিগড়ে গিয়ে আবোল-তাবোল মন্তব্য করা শুরু করে। এরা হলো- হীনমন্য, কাপুরুষ, স্বার্থবাজ। এদের জন্যই রাসূলুল্লাহ (সাঃ) বদদোআ দিয়ে বলেছেন : আল্লাহ যেন এদেরকে উভয় জগতে ধ্বংস এবং লাঞ্চিত করেন, অপমান-অপদস্ত করেন। আর দেহে যদি কাঁটা বিধে তবে যেন তা বের না হয়। যদি দেহের কোথাও আঘাত লাগে তাহলে সেই আঘাতের ব্যথা যেন দূর না হয়। দেহে যদি কোন ক্ষত হয় তাহলে যেন সেই ক্ষত না শুকায়।

আল্লাহর রাসূল (সাঃ) সাধারণতঃ এমন ভাবে বদদোআ করেন না। কিন্তু তিনি এতো কঠিন বদদোআ করলেন কেন? আসলে আল্লাহর রাসূল (সাঃ) কোন ব্যক্তিকে সরাসরি এভাবে বদদোআ করেননি। এখানে বদদোআ করেছেন একটা শ্রেণীকে। একটা বদ অভ্যাসের দাসের অধিকারীদের। আসলে অপরাধটি অত্যন্ত গুরুতর। কেননা, এসব স্বার্থবাজদের কাছে আল্লাহ এবং তাঁর রাসূলের কোন মূল্য নেই। আখেরাতের কোন গুরুত্ব নেই। জান্নাতের কোন আশা নেই।

জাহান্নামের কোন ভয় নেই। এদের কাছে অর্থ-সম্পদই সব কিছু। এসব কিছুই তাদের আশা-ভরসা। এসব পেলেই তারা মহা খুশী। এ সবেরই তারা সন্তুষ্ট। তারা অর্থ এবং সম্পদের বিনিময়ে ঈমান-আমান সহ সব কিছুই বিক্রয় করে দিতে প্রস্তুত। এটা মুমিনদের গুণ নয়। রাসূলুল্লাহ (সাঃ) পরিপূর্ণ মুমিনদের গুনাবলীর কথা উল্লেখ করে অন্য এক হাদীসে বলেন :

مَنْ أَحَبَّ لِلَّهِ وَأَبْغَضَ لِلَّهِ وَأَعْطَى لِلَّهِ وَمَنْعَ لِلَّهِ فَقَدْ اسْتَكْمَلَ الْإِيمَانَ-

যে ব্যক্তির ভালবাসা ও মন্দবাসা, দান করা ও না করা, একমাত্র আল্লাহর সন্তুষ্টি অর্জনের জন্যেই হয়ে থাকে, সে ব্যক্তিই পূর্ণ ঈমানদার। (বুখারী)

অতঃপর আল্লাহর রাসূল (সাঃ) সৌভাগ্যবানদের কথা উল্লেখ করে বলেন :

طَوْ بِي بَعْبِدٍ أَخِظْ بِعَنَانٍ فَرَسِهِ فِي سَبِيلِ اللَّهِ
أَشَعَتْ رَأْشُهُ مُغْبِرَةً فَقَدْ مَاه-

আর ঐ ব্যক্তি ভাগ্যবান, যে আল্লাহর পথে নিজ ঘোড়ার লাগাম লাগিয়ে সদা (জিহাদের জন্য) প্রস্তুত থাকে। (জিহাদের কাজে রতো থাকার জন্য) মাথার চুল উসকো-খুসকো থাকে এবং তার পা দু'টো ধুলি মলিন থাকে।

এখানে স্বার্থবাজ, অর্থলোভী, দুনিয়াদারদের বিপরীতধর্মী আল্লাহ প্রেমীক দুনিয়া ত্যাগী সৌভাগ্যবান ব্যক্তিদের কথা উল্লেখ করা হয়েছে। এখানে বলা হয়েছে ঐ ব্যক্তিরাই সৌভাগ্যবান অর্থাৎ সফলকামী, যারা আল্লাহর দীন আল্লাহর যমীনে প্রতিষ্ঠার জন্য জিহাদে রতো আছে এবং খোদাদ্রাহী শক্তির আক্রমণকে প্রতিহত করার জন্য ঘোড়া তথা যুগোপযোগী যুদ্ধযান নিয়ে সদা-সর্বদা প্রস্তুত থাকে। যাদের খোদাদ্রাহী শক্তির সাথে যুদ্ধ সংগ্রামে লিপ্ত থাকার কারণে চুলগুলো উসকো-খুসকো হয়ে যায়। যুদ্ধ জিহাদে ব্যস্ত থাকার কারণে অবসর গ্রহণ এবং ক্লান্তি দূর করার কোন সুযোগই পাই না। অবিরাম গতিতে আন্দোলন-সংগ্রাম চালিয়ে যায়। আল্লাহর দীন কায়েমের আন্দোলনে বা জিহাদে রতো থাকার ফলে তার পা দু'টো ধুলোই ধুসোরিত হয়ে মলিন হয়ে যায়। পরিস্কার করার সুযোগই করতে পারে না। অর্থাৎ সার্বক্ষণিক জীবন-প্রাণ দিয়ে আল্লাহর পথে জিহাদে

রতো থাকে। অবসর নেয় না। ফাঁকি দেয় না। জিহাদ থেকে মোটেই ফুরসোত পায় না। এসব গুণের অধিকারী দুনিয়া ত্যাগী মুজাহীদরাই হলো সৌভাগ্যবান। রাসূলের আশির্বাদপুষ্ট ঈমানদার মুসলমান। যাদের আরাম-আয়েশ, ত্যাগ, দুনিয়া বিমুখোতা একমাত্র আল্লাহর সন্তুষ্টি এবং রাসূলের মহব্বতের জন্য, জান্নাতের আশায়-জাহান্নাম থেকে মুক্তির জন্য।

অতঃপর রাসূল (সাঃ) সৌভাগ্যবান বান্দাদের আরো একটা মহত গুণের কথা উল্লেখ করে বলেন :

إِنْ كَانَ فِي الْحِرَاسَةِ كَانَ فِي الْحِرَسَةِ وَإِنْ كَانَ فِي السَّاقَةِ كَانَ فِي السَّاقَةِ إِنْ اِسْتَأْذَنَ لَمْ يُؤْذَنَ لَهُ وَإِنْ شَفَعَ لَمْ يُسَفَّعْ -

(মুজাহীদদের নম্রতা ও আনুগত্যের অবস্থা এই যে) যদি তাকে সেনাবাহিনীর অগ্রভাগের রক্ষক হিসেবে অর্থাৎ সেনাপতি হিসেবে নিয়োগ করা হয়, তবে সে দক্ষতার সাথে সুষ্ঠুভাবে তা পালন করে। আর যদি তাকে সেনাবাহিনীর পেছনে ফেলে রাখা হয়, অর্থাৎ সাধারণ সৈনিকে রূপান্তরিত করা হয় তবুও সে সানন্দে স্বীয় দায়িত্ব পালন করে যায়। মোট কথা সে হবে অত্যন্ত বাধ্য এবং আনুগত্য পরায়ণ। আর শুধু দ্বীনেরই খেদমত হবে তার লক্ষ্য ও উদ্দেশ্য।

আল্লাহর দ্বীন প্রতিষ্ঠার আন্দোলনে রতো ভাগ্যবান মুজাহীদেরা এতই নম্র-ভদ্র, অনুগতপ্রিয় ও বাধ্য যে, যদি তাদের মধ্য থেকে কাউকে সেনাপতির দায়িত্ব দেওয়া হয়, তাহলে সে তার দায়িত্ব নিষ্ঠা, আন্তরিকতা, সাহসিকতা ও দক্ষতার সাথে অত্যন্ত সুন্দর এবং সুষ্ঠুভাবে পালন করে যায়। দায়িত্ব পালনের ক্ষেত্রে কোন প্রকার অলসতা বা গাফলতি দেখায় না। দুশমনের ভয়ে ভীত হয়ে যায় না। বিশৃঙ্খলা সৃষ্টি করে না। বরং আল্লাহর উপর ভরসা করে অত্যন্ত সাহসিকতা ও দক্ষতার সাথে অর্পিত দায়িত্ব যথাযথ ভাবে পালন করার জন্য আপ্রাণ চেষ্টা চালিয়ে যায়। পক্ষান্তরে যদি তাকে সেনাবাহিনীর পেছনে অর্থাৎ একজন সাধারণ সৈনিক হিসেবে নিয়োগ দেয়া হয়, সেনাপতি থেকে সাধারণ একজন সৈনিকে পরিণত করা হয়, তাতেও তার কোন প্রতিক্রিয়া সৃষ্টি হয় না।

বরং একজন বাধ্য-অনুগত সৈনিকের ভূমিকায় অবতীর্ণ হয়ে সেনাপতির আদেশ মান্য করে আনন্দের সাথে যুদ্ধ চালিয়ে যায়। তার কাজে কোন ভাটা পড়ে না। যেমন হযরত খালেদ বিন ওয়ালিদ একবার এক যুদ্ধে সেনাপতির দায়িত্বে নিয়োজিত থেকে যুদ্ধ পরিচালনা করছিলেন। এমন সময় যুদ্ধ চলাকালীন অবস্থাতেই গভর্ণরের আদেশনামা পৌঁছলো যে খালিদ-বিন ওয়ালিদকে সেনাপতির দায়িত্ব থেকে অব্যাহতি দেয়া হলো। সাথে সাথে তিনি সেই আদেশ নামার প্রতি আনুগত্য দেখিয়ে নতুন সেনাপতির হাতে পতাকা তুলে দিয়ে একজন সাধারণ সৈনিক সেজে যুদ্ধ চালিয়ে গেলেন। কি তার আনুগত্য! কি তার ত্যাগ! কি তার আল্লাহ্ প্রেম! হাদীসে এই শ্রেণীর সৌভাগ্যবান এবং সফলকাম, নম্র, ভদ্র, সরল এবং বাধ্য অনুগত মুজাহীদদের কথায় বলা হয়েছে। আল্লাহ্র দ্বীনের পথে জিহাদ করতে গিয়ে এমন আনুগত্য প্রদর্শন করে যে, তার মধ্যে কোন অবস্থায় শয়তানী ওয়াসওয়াসা পয়দা হয় না। তার মধ্যে কোন রিয়া বা অহংকার সৃষ্টি হয় না। এর পেছনে মূল কারণই ছিলো আল্লাহ্ ভীতি, আল্লাহ্ প্রেম এবং রাসূলের প্রতি মুহাব্বত।

অনুগত, বাধ্য সদা প্রস্তুত দ্বীনের মুজাহীদদের আরো একটা বিশেষ বৈশিষ্ট্য হলো তাদের লক্ষ্য ও উদ্দেশ্য একমাত্র দ্বীনের খেদমত করা, দ্বীন প্রতিষ্ঠা করা। আসলে এটা টার্গেট হবার কারণেই তারা দ্বীনের জন্য সদা-সর্বদা প্রস্তুত থাকে। দ্বীন কায়েমের আন্দোলনে সার্বক্ষণিক নিয়োজিত থাকে। বৈসয়িক সুখ-শান্তি এবং রূপচর্চার কোন সুযোগই পাই না। কোন পদে বা দায়িত্বে নিয়োজিত আছে বা করলো তার দিকে তার কোন ভ্রক্ষেপ নেই। তার খেয়াল শুধু আমি দ্বীনের কাজে প্রকৃত হক আদায় করতে পারছি কি না? আমার কাজে আল্লাহ্ খুশী হচ্ছে কি না? তার লক্ষ্য এবং উদ্দেশ্য শুধু দ্বীনের খেদমত তথা দ্বীন আন্দোলনে শরীক থেকে আল্লাহ্র সন্তুষ্টি অর্জন করা। মহান আল্লাহ্ এদের উদ্দেশ্য লক্ষ্য সম্পর্কে বলেন :

إِنَّ صَلَاتِي وَنُسُكِي وَمَحْيَايَ وَمَمَاتِي لِلَّهِ رَبِّ
الْعَالَمِينَ-

নিশ্চয়ই আমার নামাজ, আমার কুরবানী, আমার জীবন, আমার মরণ একমাত্র আল্লাহ্র (রাজি খুশির) জন্য। (আনয়াম-১৬২)

সুতরাং সৌভাগ্যবান সফল ব্যক্তিদের প্রতিটি কাজ, প্রতিটি পদক্ষেপ, প্রতিটি সময়, প্রতিটি চিন্তা এবং পরিকল্পনা, তার বেঁচে থাকা, মরে যাওয়া, ইবাদত-বন্দেগী, যুদ্ধ-জিহাদ, নেতৃত্ব-কর্তৃত্ব একমাত্র মহান রাব্বুল আ'লামীনেরই সন্তুষ্টির জন্যে, রাজি-খুশির জন্যে।

শিক্ষা : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটির যে ব্যাখ্যা পেশ করা হলো তা থেকে আমাদের জন্য যেসব শিক্ষণীয় বিষয় রয়েছে তা হলো :

- ✱ ধন-দৌলত, টাকা-পয়সা, অর্থ-সম্পদের গোলাম হওয়া যাবে না। অর্থ-সম্পদকেই সবকিছুর মূল বানানো যাবে না। কারণ এটা মুমিনের বৈশিষ্ট্য নয়।
- ✱ ব্যক্তি, সংগঠন, সমাজ বা রাষ্ট্রের পক্ষ থেকে কি পেলাম, আর কি পেলাম না, এটাকে রাজি-নারাজির টার্গেট বানানো যাবে না।
- ✱ আল্লাহর রাসূলের বদ দোআ থেকে আমাদেরকে সব সময় বেঁচে থাকতে হবে। কেননা আল্লাহর রাসূলের দোআ কোন দিন বিফল হয় না। সুতরাং তার বদ দোআ মানেই হলো তার দুনিয়া এবং আখেরাত উভয় জগত ধ্বংস হয়ে লাঞ্ছনা-গঞ্জনা ভোগ করা।
- ✱ আল্লাহর রাসূল (সাঃ) অর্থ-সম্পদের লোভী গোলামদের হীনমন্য ও নীচ শ্রেণীর লোক বলে আখ্যায়িত করেছেন।
- ✱ আল্লাহর দ্বীনের খেদমত বা প্রতিষ্ঠার কাজে সদা-সর্বদা নিয়োজিত থাকতে হবে। যেভাবে একজন মুজাহীদ লড়াই করার জন্য সদা-সর্বদা ঘোড়ার লাগাম লাগিয়েই প্রস্তুত থাকে।
- ✱ আল্লাহর দ্বীনের জন্য সদা প্রস্তুত কিনা তা তার দেহের পোষাক-আষাক, মাথার চুল এবং পায়ের জুতা দেখেই টের পাওয়া যাবে।
- ✱ সকল সময়, সকল অবস্থায় নিজের সরলতা, নম্রতা এবং আনুগত্যের বহিঃপ্রকাশ ঘটাতে হবে।
- ✱ নেতৃত্ব কর্তৃত্বের মোহ থেকে মুক্ত থাকতে হবে। আর যদি নেতৃত্ব থাকা

অবস্থায় নেতৃত্ব চলে যায়, তবে তার জন্য কোন প্রতিক্রিয়া তো হবেই না। বরং তার উপর অর্পিত দায়িত্ব আনন্দের সাথে পালন করে যাবে।

✽ আল্লাহর দীনের খেদমত বা দ্বীন প্রতিষ্ঠাকেই একমাত্র লক্ষ্য-উদ্দেশ্য বানাতে হবে। এর কোন সুযোগ-সুবিধাকে লক্ষ্য বানানো যাবে না।

আহবান : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটির যে ব্যাখ্যা এবং শিক্ষা পেশ করলাম এতে যদি আমার অজান্তে কোন ভুল-ত্রুটি হয়ে যায়, তার জন্য আল্লাহর কাছে ক্ষমা চেয়ে নিচ্ছি। আর এতে আমাদের জন্য যেসব শিক্ষণীয় বিষয় রয়েছে তা যেন বাস্তব জীবনে কার্যকরী করতে পারি সেই তাওফীক কামনা করে শেষ করছি।

যে সব আ'মল জান্নাতে নিয়ে যায় এবং

জাহান্নাম থেকে দূরে রাখে

الْحَمْدُ لِلَّهِ وَكَفَى وَسَلَامٌ عَلَى عِبَادِهِ الَّذِينَ اصْطَفَى

أَمَّا بَعْدُ - بِسْمِ اللَّهِ الرَّحْمَنِ الرَّحِيمِ

وَعَنْ مُعَاذٍ رَضِيَ اللَّهُ عَنْهُ قَالَ : قُلْتُ يَا رَسُولَ اللَّهِ
أَخْبَرْنِي بِعَمَلٍ يَدْخُلُنِي الْجَنَّةَ، وَيُبَاعِدُنِي مِنَ
النَّارِ؟ قَالَ لَقَدْ سَأَلْتَ عَنْ عَظِيمٍ؛ وَإِنَّهُ لَيْسَ شَيْءٌ عَلَى
مَنْ يَسِّرَهُ اللَّهُ تَعَالَى عَلَيْهِ: تَعَبُّدُ اللَّهِ لَا تُشْرِكُ بِهِ
شَيْئًا، وَتُقِيمُ الصَّلَاةَ، وَتُؤْتِي الزَّكَاةَ، وَتَصُومُ
رَمَضَانَ، وَتُحُجُّ الْبَيْتَ ثُمَّ قَالَ: أَلَا أَدُلُّكَ عَلَى أَبْوَابِ
الْخَيْرِ؟ الصَّوْمُ جَنَّةٌ، وَالصَّدَقَةُ تُطْفِئُ الْخَطِيئَةَ كَمَا
يُطْفِئُ الْمَاءُ النَّارَ؛ وَصَلَاةُ الرَّجُلِ مِنْ جَوْفِ اللَّيْلِ، ثُمَّ
تَلَا: (تَتَجَافَى جُنُوبُهُمْ عَنِ الْمَضَاجِعِ) حَتَّى بَلَغَ
(يَعْمَلُونَ) (السَّجْدَةُ-١٦) ثُمَّ قَالَ: أَلَا أَخْبِرُكَ بِرَأْسِ الْأَ
مْرِ؛ وَعَمُودِهِ، وَذُرْوَةِ سَنَامِهِ - قُلْتُ: بَلَى يَا رَسُولَ
اللَّهِ، قَالَ: رَأْسُ الْأَمْرِ الْإِسْلَامُ؛ وَعَمُودُهُ الصَّلَاةُ،
وَذُرْوَةُ سَنَامِهِ الْجِهَادُ - ثُمَّ قَالَ: أَلَا أَخْبِرُكَ بِمِلَاكِ
ذَلِكَ كُلِّهِ؟ قُلْتُ: بَلَى يَا رَسُولَ اللَّهِ؛ فَأَخَذَ بِلِسَانِهِ

قَالَ: كُفَّ عَلَيْكَ هَذَا؛ قُلْتُ: يَا رَسُولَ اللَّهِ إِنَّا
لَيُؤَاخِذُونَ بِمَا نَتَكَلَّمُ بِهِ؟ فَقَالَ ثَكَلَتْكَ أُمُّكَ! وَهَلْ
يَكُفُّ النَّاسَ فِي النَّارِ عَلَى وُجُوهِهِمْ إِلَّا حَصَائِدُ
الْأَسْنَتِهِمْ؟ (رَوَاهُ التِّرْمِذِيُّ وَقَالَ حَدِيثٌ حَسَنٌ
صَحِيحٌ)

অনুবাদ : হযরত মুয়া'জ (রাঃ) থেকে বর্ণিত আছে, তিনি বলেন : আমি একদা বললাম, হে আল্লাহর রাসূল (সাঃ), আমাকে এমন আ'মল বা কাজের কথা বলে দিন যা আমাকে জান্নাতে নিয়ে যাবে এবং জাহান্নাম থেকে দূরে রাখবে। তিনি বললেন : আসলে তুমি একটা গুরুত্বপূর্ণ বিষয়ে প্রশ্ন করেছো। অবশ্য আল্লাহ তাআ'লা যার জন্য সহজ করে দেন তার জন্য একাজ করা খুবই সহজ। আর তা হলো তুমি আল্লাহর ইবাদত করবে, তাঁর সাথে কাউকে শরীক করবে না, নামায প্রতিষ্ঠা করবে, যাকাত আদায় করবে, রমযান মাসের রোযা রাখবে এবং বাইতুল্লাহর হজ্জ করবে। অতপরঃ তিনি আবারও বললেন : আমি কি তোমাকে খায়ের বা কল্যাণের দরওয়াজাগুলো বলে দেব না ? (সেগুলো হলো) রোযা ঢাল স্বরূপ (প্রতিরোধকারী)। সাদকাহ (যাকাত) গোনাহ সমূহকে এমন ভাবে নিশ্চিহ্ন করে দেয় যেমন ভাবে পানি আগুনকে নিভিয়ে দেয়। আর মানুষের গভীর রাতের নামাজও (তাহাজ্জুদ) এভাবে গোনাহসমূহ বিনষ্ট করে দেয়। অতঃপর তিনি নীচের আয়াত পাঠ করলেন : “তাতাজাফা জুনুযুহম আনিল মাযাজি-ইয়া'লামুন” পর্যন্ত। (সাজদাহ-১৬,১৭) অর্থাৎ “তাদের পিঠ বিছানা থেকে আলাদা থাকে। তারা নিজেদের প্রভুকে ডাকে ভয় ও আশার সাথে। আর আমি তাদের জন্য যা কিছু রুজি বা জিবিকা দিয়েছি তা থেকে খরচ করে। ফলে তাদের প্রতিদান হিসেবে তাদের জন্য চোখ জুড়ানো সে সব জিনিস দেয়া হবে যা গোপন রাখা হয়েছে, যা কোন প্রাণীই জানে না।” (সূরা আস্ সাজদা-১৬-১৭)। রাসূল (সাঃ) পুনরায় বললেন : তোমাকে কি (দ্বীনের) যাবতীয় কাজের মূল, তার কাভ এবং সর্বোচ্চ চূড়ার কথা বলবো না ? আমি বললাম, হে আল্লাহর রাসূল (সাঃ) তা তো অবশ্যই বলবেন।

তিনি বললেন : (দ্বীনের) যাবতীয় কাজের মূল উৎস হলো ইসলাম, তার কাণ্ড হলো নামাজ এবং সর্বোচ্চ চূড়া হলো জিহাদ। তিনি আবার বললেন : আমি কি তোমাকে এসব গুলোর মূল বা আসলটা বলে দেব না ? আমি বললাম, হ্যাঁ বলুন হে আল্লাহর রাসূল : তিনি তাঁর জিহ্বা টেনে ধরে বললেন : এটা তোমার কন্ট্রোলে (নিয়ন্ত্রণে) রাখবে। আমি প্রশ্ন করলামঃ হে আল্লাহর রাসূল (সাঃ), আমরা স্বাভাবিক কথা-বার্তায় যা বলে থাকি তার জন্যেও কি পাকড়াও হবো ? তিনি বললেন : তোমার প্রতি তোমার মা গম্ভীর হোক! মানুষকে তো তার জিহ্বা দ্বারা উপার্জিত জিনিসের কারণেই জাহান্নামে উপুড় করে নিক্ষেপ করা হবে। (ইমাম তিরমিযী এ হাদীস বর্ণনা করেছেন এবং বলেছেন, হাদীসটি চমৎকার ও বিশুদ্ধ)।

বিশেষ বিশেষ শব্দার্থ : قَالَ -বলেন বা বলেছেন
عَنْ -থেকে বা হতে।
أَخْبَرَنِي -আমাকে খবর দিন বা জানিয়ে দিন।
يَا -হে বা ওহে।
أَمَل -আমল বা কাজের।
يُدْخِلْنِي -আমাকে প্রবেশ করাবে।
يُبَاعِدْنِي -আমাকে দূরে রাখবে।
مِنَ النَّارِ -আগুন বা জাহান্নাম থেকে।
عَظِيمٌ -বড় বা গুরুত্বপূর্ণ।
سَأَلْتُ -প্রশ্ন করেছো।
لَقَدْ -অবশ্যই।
مَنْ يَسْرُرْهُ -অবশ্যই সহজ।
لَيْسَ يَرُ -নিশ্চয় উহা বা তা।
تَعْبُدُ اللَّهَ -তোমরা আল্লাহর ইবাদত করবে।
لَا تُشْرِكْ -তাঁর সাথে।
بِهِ -তাঁর সাথে।
شَيْئًا -কোন কিছুকে।
تُقِيمُ الصَّلَاةَ -নামায কায়েম বা প্রতিষ্ঠা করবে।
وَتُؤْتِي الزَّكَاةَ -এবং যাকাত আদায় করবে।
وَتُحِجُّ الْبَيْتَ -এবং বায়তুল্লাহর হজ্জ করবে।
رَمَضَانَ -রমযান মাসে রোজা রাখবে।
أَمْ -অতঃপর।
أَلَا أَدُلُّكَ -আমি কি তোমাকে বলে দেব না ?
أَبْوَابُ الْخَيْرِ -কল্যাণের দরওয়াজা সমূহ।
الصَّوْمُ جُنَّةٌ -রোজা ঢালস্বরূপ।
تُطْفِئُ -নিশ্চিহ্ন বা খতম।
الصَّدَقَةَ -সাদকাহ বা যাকাত।

করে। **الْخَطِيئَةُ**-গোনাহ্ সমূহ। **كَمَا**-যেমন করে। **الْمَاءُ**-পানি। **جَوْفٍ**-পুরুষ এখানে মানুষ। **النَّارُ**-আগুন (দোষখ)। **الْخَبِيرُ**-আমি তোমাকে খবর দেব বা অবগত করবো। **بِرَأْسِ الْأَمْرِ**-কাজের আসল বা মূল। **عَمُودِهِ**-তার বা উহার কাণ্ড। **قُلْتُ** আমি বললাম। **ذُرْوَةٌ سَنَامٍ**-উহার সর্বোচ্চ চূড়া। **كُلِّهِ**-উহার প্রত্যেকটি। **بِلِسَانِهِ**-তঁার জিহ্বা। **فَاخَذَ**-অতঃপর ধরলেন। **نَتَكَلَّمُ**-তার জন্য। **بِمَا**-তোমার জন্য গম্ভীর হোক। **تَكَلَّمَ**-তোমার মা। **أُمُّكَ**-মানুষকে নিক্ষেপ করা হবে। **عَلَى وُجُوهِهِمْ**-তাদের মুখের ভরে। **النَّارِ**-জাহান্নামে। **فِي النَّارِ**-তার জিহ্বা বা কথার দ্বারা।

সম্বোধন : প্রিয় ভায়েরা/বোনেরা! আমি আপনাদের সামনে বিশিষ্ট সাহাবী এবং রাবী হযরত মুয়া'জ বিন যাবাল (রাঃ)-এর বর্ণিত হাদীসটি পাঠ এবং অনুবাদ পেশ করেছি। আল্লাহ্‌পাক যেন আমাকে আপনাদের সামনে হাদীসটির সঠিক ব্যাখ্যা এবং শিক্ষা তুলে ধরার তাওফিক দান করেন।

রাবী বা বর্ণনাকারীর পরিচয় : নাম-মুয়া'জ। ডাক নাম-আবু আবদির রহমান। লকব বা উপাধি-ইমামুল ফোকাহা, কানযুল উলামা ও রাব্বানিয়্যুল কুলূব। মদীনার খায়রাজ গোত্রের উদায় ইবনু সা'দ শাখার সন্তান। পিতার নাম-জাবাল ইবনে আমর। মাতার নাম-হিন্দা বিনতু সাহল আল জুহাইনিয়া।

ইসলাম গ্রহণ-রাসূলুল্লাহ্ (সাঃ) এর হিজরাতের পূর্বে নবুয়াতের দ্বাদশ বছর ১৮

বছর বয়সে ইয়াসরীবে রাসূলের পাঠানো দাঈ (আহবানকারী) মুসআব ইবনে উমাইর (রাঃ) এর কাছে ইসলাম গ্রহণ করেন। তিনি হজ্জ মওসুমে মক্কায় হজ্জ করতে যান এবং ‘আকাবায়’ রাসূলের হাতে ইসলামের বাইয়াত গ্রহণ করেন। এটা ছিল দ্বিতীয় বা সর্বশেষ আকাবার বাইয়াত। এর সদস্য সংখ্যা ছিল ৭২/৭৫ জন। হযরত মুয়া’জের ইসলাম গ্রহণ করার অল্প কিছুদিন পরেই মহানবী (সাঃ) মক্কা থেকে ইয়াসরীবে (মদীনায়) হিজরাত করেন।

হযরত মুয়া’জ একজন কুরআনের হাফেজ ছিলেন এবং যে ছয় জন অহী লেখক ছিলেন তিনি তাদের মধ্যে অন্যতম সদস্য ছিলেন। তারুকে সফল অভিযানের পর ইয়ামান বাসীরা ইসলাম গ্রহণ করলে রাসূলুল্লাহ (সাঃ) হযরত মুয়া’জকে সেখানকার প্রথম আমীর নিযুক্ত করেন।

হযরত মুয়া’জ এর মৃত্যুর পূর্বে ডান হাতের শাহাদাৎ আংগুলে একটা ফোড়া হয় এবং সেই ফোড়ার প্রচন্ড ব্যাথায় তিনি মাঝে মাঝে বেঁহুস হয়ে যেতেন। হযরত মুয়া’জ আল্লাহর ভয়ে কাঁদতে কাঁদতে মৃত্যুবরণ করেন। তাঁর মৃত্যু সন নিয়ে বেশ মতপার্থক্য আছে। তবে সর্বাধিক প্রশিদ্ধ মতে হিজরী ১৮ অথবা ১৯ সনে ৩৮ বছর বয়সে বাইতুল মাক্দাস ও দিমাশকের মধ্যবর্তী এবং জর্দান নদীর তীরবর্তী ‘বীসান’ নামক স্থানে প্লেগে আক্রান্ত হয়ে মারা যান। এরই কাছাকাছি একটি স্থান যেখান থেকে আল্লাহ তাআলা হযরত ঈসা (আঃ)-কে আসমানে উঠিয়ে নেন, সেখানেই তাকে দাফন করা হয়। রাসূলের জীবনকালে রাষ্ট্রীয় বিভিন্ন দায়িত্বে ব্যস্ত থাকার কারণে তিনি খুব বেশী হাদীস বর্ণনা করতে পারেননি। হাদীস বর্ণনাকারী সাহাবীদের মধ্যে হযরত মুয়া’জের নামটি তৃতীয় তবকায় গণনা করা হয়। তাঁর বর্ণিত হাদীসের সংখ্যা মোট ১৫৭টি। (আসহাবে রাসূলের জীবন কথা)

হাদীসটি বর্ণনার সময়কাল : হাদীসটির বর্ণনাকারী এবং বিষয়বস্তুর দিকে লক্ষ্য করলে বুঝা যায় যে, রাসূলুল্লাহ (সাঃ) হাদীসটি মাদানী জীবনে বর্ণনা করেছেন। কেননা বর্ণনাকারী মুয়া’জ (রাঃ) একজন আনসারী এবং মদীনাবাসী ছিলেন। আর বিষয়বস্তুতে দেখা যায় ইসলামের মৌলিক ইবাদত সমূহ এবং জিহাদের কথা উল্লেখ রয়েছে যা মাদানী জীবনে সংঘটিত হয়েছিলো মাক্কী জীবনে নয়।

হাদীসটি বর্ণিত কিতাবের পরিচয় : হাদীসটি ‘সিহাহ সিভাহ’ বা ‘বিশুদ্ধ ছয়টি’ হাদীস গ্রন্থের অন্তর্ভুক্ত ইমাম তিরমিযীর সংকলিত তিরমিযী শরীফে বর্ণিত হয়েছে। হাদীসের এই গ্রন্থের অধিকাংশ হাদীস সহীহ, বিশুদ্ধ। আর দারসের জন্য বর্ণিত হাদীসটিকেও ইমাম তিরমিযী হাসান (উত্তম) এবং সহীহ বিশুদ্ধ বলে মন্তব্য করেছেন।

ব্যাখ্যা : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটির অনুবাদসহ প্রয়োজনীয় প্রাথমিক তথ্য প্রদান করা হলো। এখন আমি হাদীসটির ব্যাখ্যা নিম্নে উল্লেখ করছি। হাদীসের প্রথমেই রাবী মুয়া’জ (রাঃ) নিজেই রাসূলুল্লাহ (সাঃ) কে জান্নাত লাভ এবং জাহান্নাম থেকে দূরে থাকা কোন আ’মল বা কাজের ভিত্তিতে সম্ভব সেই প্রশ্ন করে বলেন :

يَا رَسُولَ اللَّهِ أَخْبَرْنِي بِعَمَلٍ يُدْخِلُنِي الْجَنَّةَ، وَيُبَاعِدُنِي
مِنَ النَّارِ-

হে আল্লাহর রাসূল (সাঃ) আমাকে জানান, কোন আ’মল বা কাজের দ্বারা জান্নাতে প্রবেশ এবং জাহান্নাম থেকে দূরে থাকা যায়? প্রতি উত্তরে রাসূলুল্লাহ (সাঃ) সরাসরি উত্তর না দিয়ে তার এই ধরনের প্রশ্নের প্রেক্ষিতে উৎসাহ প্রদান এবং প্রশ্নের গুরুত্বের কথা উল্লেখ করে বলেন : لَقَدْ سَأَلْتِ

عَنْ عَظِيمٍ আসলে তুমি একটা খুবই গুরুত্বপূর্ণ বিষয়ে প্রশ্ন করেছো। অতঃপর তিনি এই গুরুত্বপূর্ণ প্রশ্নের উত্তরে যে সব আ’মলের কথা বলবেন তার কাঠিন্যকে হালকা করার জন্য রাসূল বলেন : وَإِنَّهُ لَيْسَ شَيْءٌ عَلَى مَنْ - يَسِّرَهُ اللَّهُ تَعَالَى عَلَيْهِ - অবশ্য আল্লাহ তাআলা যার জন্য সহজ করে দেন তার জন্য এ কাজগুলো করা খুবই সহজ।

অতঃপর রাসূলুল্লাহ (সাঃ) হযরত মুয়া’জের আবেদনের প্রেক্ষিতে জান্নাত লাভ এবং জাহান্নাম থেকে মুক্তি পাবার মৌলিক আ’মল বা কাজগুলো পরস্পর উল্লেখ করে বলেন :

তুমি আল্লাহর ইবাদত করবে, এক. لَا تُشْرِكْ بِهِ شَيْئًا. তাঁর সাথে কাউকে শরীক করবে না। প্রথমেই যে আ’মলের কথা আল্লাহর

রাসূল (সাঃ) বললেন তা অত্যন্ত গুরুত্বপূর্ণ। ঈমান আনার সাথে সাথে যে আ'মলটি করতে হয় তা হলো আল্লাহর ইবাদত। কেননা আল্লাহ মানুষকে পয়দা করছেন তাঁরই ইবাদত-বন্দেগী করার উদ্দেশ্যে। মহান আল্লাহ বলেন—

وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ আমি জ্বীন এবং মানব জাতিকে একমাত্র আমার ইবাদত করার উদ্দেশ্যে পয়দা করেছি। (যারিয়াত-৫৬)। এই আয়াতে মানুষ সৃষ্টির উদ্দেশ্য সম্পর্কে মহান আল্লাহ স্পষ্টভাবে উল্লেখ করে দিয়েছেন।

ইবাদত কি? عِبَادَةٌ (আ'বেদ) অর্থ গোলাম এবং (ইবাদাতুন) অর্থ গোলামী করা, বন্দেগী করা। সুতরাং গোলামের কাজই হবে মনিবের ইচ্ছা মারফিক সকল কাজ করা। নিজের ইচ্ছা মতো কোন কিছু না করা। যদি এটা করা হয় তাহলেই কেবল মাত্র তার মনিব বা মালিকের গোলামী করা হলো। সুতরাং সকল মনিব বা মালিকের মালিক মহান রাব্বুল আ'লামিনের মানুষ সৃষ্টি করার উদ্দেশ্য হলো তাঁরই মর্জি মারফিক তাঁর বান্দা সকল কাজ করবে। তার আদেশ এবং নিষেধকে মান্য করবে। অতএব আল্লাহর ইবাদত বলতে মানুষের জীবনের প্রতিটি সময়, প্রতিটি মিনিট আল্লাহর দেয়া বিধান মতো পরিচালিত করা। ঘুম হতে উঠা থেকে শুরু করে ঘুম যাওয়া পর্যন্ত সকল কাজ আল্লাহর বিধি-বিধান মতো পরিচালনা করা। এমনকি রাতের ঘুমকেও ইবাদতে পরিণত করা। এ সম্পর্কে রাসূল (সাঃ) বলেন :

যে ব্যক্তি জামায়াতের সাথে ঈশার নামায আদায় করে ঘুমালো সে যেন অর্ধেক রাত্রি ইবাদত করলো। আবার জামায়াতের সাথে ফজরের নামায আদায় করলো সে যেন পূর্ণরাত্রি ইবাদত করলো (মুসলিম)। অতএব বান্দার খাওয়া-দাওয়া, চলা-ফেরা, উঠা-বসা, কাজ-কাম, ঘুমা-জাগা, কথা-বার্তা, লেন-দেন, ব্যবসা-বাণিজ্য, চাকরী-বাকরী, চাষ-বাস সকল কিছুই আল্লাহর বিধান মতো হওয়া। তাছাড়া ব্যক্তিগত জীবন, পারিবারিক জীবন, সামাজিক ও রাজনৈতিক জীবন, অর্থনৈতিক ও সাংস্কৃতিক জীবন আল্লাহর বিধি-বিধান মতো পরিচালিত করা। মোট কথা মুমিনের গোটা জীবন হবে আল্লাহর ইবাদত-বন্দেগীতে ভরপুর। আর সেই ইবাদত হবে শিরক মুক্ত নির্ভেজাল ইবাদত। এই

সম্পর্কে হাদীসের পরের অংশে রাসূল বললেন : لَا تُشْرِكْ بِهِ شَيْئًا তার সাথে কোন কিছুকে শরীক করবে না। অর্থাৎ আল্লাহর ইবাদত হবে শিরকমুক্ত নির্ভেজাল ইবাদত। আল্লাহর বন্দেগী করতে গিয়ে কাউকে বা কোন কিছুকে তার সমতুল্য বা সমকক্ষ বানানো যাবে না। মানুষের বদ অভ্যাস হলো- সামান্যতেই আল্লাহর সমকক্ষ বানিয়ে নেয়া। অথচ আল্লাহ এটাকে মোটেই বরদাস্ত করতে পারেন না। তিনি শিরককারীদের সম্পর্কে বলেন :

وَمَنْ يُشْرِكْ بِاللَّهِ فَقَدْ حَرَّمَ اللَّهُ عَلَيْهِ الْجَنَّةَ

যে কেউ আল্লাহর সাথে শরীক করবে অবশ্যই আল্লাহ তার জন্য জান্নাত হারাম করে দিয়েছেন। কেননা শিরক হলো এক প্রকার বড় যলুম। মহান আল্লাহ সূরা লোকমানে বলেন- الشِّرْكُ لُظْلُمٌ عَظِيمٌ নিশ্চয় শিরক হলো মস্তবড় যলুম। সুতরাং জান্নাত পেতে হলে এবং জাহান্নাম থেকে দূরে থাকতে হলে প্রথমেই যে আ'মল করতে হবে তা হলো শিরক মুক্ত নির্ভেজাল ইবাদত।

দুই. وَتَقِيْمُ الصَّلٰوةَ এবং নামাজ কায়ম বা প্রতিষ্ঠা করবে। নামাজ হলো মুসলমানিত্বের আইডেন্টিটি কার্ড বা পরিচয়পত্র। তার কারণ মুসলমান এবং কুফরের মধ্যে পার্থক্যই হলো নামাজ। এই সম্পর্কে রাসূল (সাঃ) বলেন : آتَيْنَا الْعَبْدَ وَالْكَافِرَ تَرْكُ الصَّلٰوةِ মধ্যে পার্থক্য হলো নামাজ। সুতরাং জান্নাত লাভ করতে হলে এবং জাহান্নাম থেকে মুক্তি পেতে হলে দ্বিতীয় যে আ'মলটি করতে হবে তা হলো নামাজ প্রতিষ্ঠা করা। এখানে শুধু নিজেই নামাজ পড়া নয় বরং নামাজ প্রতিষ্ঠার কথা বলা হয়েছে। নামাজ প্রতিষ্ঠা বলতে কতিপয় মুফাস্সীর বলেন- নামাজের যে সব বাইরের এবং ভিতরের শর্ত রয়েছে যেমন-পাক-পবিত্র হওয়া, সময় মতো এবং জামায়াতের সাথে নামাজ আদায় করা। নামাজের নিয়ম-নীতি ও পদ্ধতি মতো আদায় করা। রুকু-সিজদা সঠিক ভাবে করা। খুশু-খুজু ও বিনয়ের সাথে নামাজ আদায় করা। অর্থাৎ নামাজের পুরাপুরি হক আদায় করে নামাজ আদায় করা। সামাজিক ভাবে নামাজ প্রতিষ্ঠা বলতে সমাজের নারী-পুরুষ সকলেই

নামাজ আদায় করা। কেউ বেনামাজী না থাকা। আর তখনই বলা হবে সামাজিক ভাবে নামাজ প্রতিষ্ঠা হয়েছে। সামাজিক ভাবে নামাজ কায়েম করতে হলে রাষ্ট্রীয় ক্ষমতার প্রয়োজন। এ সম্পর্কে মহান আল্লাহ বলেন :

الَّذِينَ إِنْ مَكَّنَّاهُمْ فِي الْأَرْضِ أَقَامُوا الصَّلَاةَ

যখন তারা কেউ রাষ্ট্রীয় ক্ষমতা লাভ করে তখন তারা প্রথমেই নামাজ প্রতিষ্ঠা করে। (সূরা হজ্জ-৪৯)

রাষ্ট্রীয় ভাবে নামাজ প্রতিষ্ঠা করার উদ্দেশ্য হলো, রাষ্ট্রের নাগরিকদের নীতি-নৈতিকতা ও চরিত্রকে সংশোধন করে সুনাগরিকে পরিণত করা। এ সম্পর্কে মহান আল্লাহ বলেন :

إِنَّ الصَّلَاةَ تَنْهَى عَنِ الْفَحْشَاءِ وَالْمُنْكَرِ

নিশ্চয়ই নামাজ সকল প্রকার অশ্লীল এবং পাপ কাজ থেকে দূরে রাখে।

তিন. $وَتُؤْتِي الزَّكَاةَ$ এবং যাকাত আদায় করবে। জান্নাত লাভ এবং জাহান্নাম থেকে মুক্তির জন্য রাসূল (সাঃ) তৃতীয় যে আ'মলের কথা বলেছেন তা হলো যাকাত আদায় করা। যাকাত আদায়ের উদ্দেশ্য হলো ধনীদের ধন-সম্পদকে পবিত্র করা এবং গরীব-অসহায় এবং বেকারদের পূর্ণবাসন করা। দেশ এবং জাতিকে অর্থনৈতিক ক্ষেত্রে সমৃদ্ধ করা। ইসলামী রাষ্ট্রের অর্থ ব্যবস্থার প্রধান উপকরণ হলো যাকাত। যার উপর ভিত্তি করে ইসলামী রাষ্ট্রের অর্থ ব্যবস্থা পরিচালিত হয়ে থাকে এবং মানুষকে মহা পাপ সূদ ভিত্তিক অর্থব্যবস্থা থেকে মুক্তি দিয়ে যাকাত ভিত্তিক অর্থ ব্যবস্থার মাধ্যমে বহু অপরাধ থেকে মুক্তি দেয়। এই জন্যই রাসূল (সাঃ) যাকাত আদায়ের মাধ্যমে জাহান্নাম থেকে মুক্তি দিয়ে জান্নাত লাভের কথা বলেছেন।

চার. $وَتَصُومُ$ এবং রমযান মাসে রোজা রাখবে। রাসূলুল্লাহ (সাঃ) জান্নাত লাভ এবং জাহান্নাম থেকে মুক্তির জন্য চতুর্থ যে মৌলিক আ'মলের কথা বলেছেন, তা হলো— রমযান মাসে রোজাব্রত পালন করা। রোজা এমন একটা আ'মল বা ইবাদত যার মাধ্যমে তাকওয়ার গুণ সৃষ্টি হয়। খোদাভীতি অর্জন করা যায়। রোজা নিছক আল্লাহ তাআলার জন্যই যে করা হয়ে থাকে তার প্রমাণ হলো এই ইবাদতটিতে লোক দেখানোর কোন সুযোগ

নেই। কেননা কোন রোজাদার মানুষের অগোচরে গোপনে কোন খাদ্য-খাবার বা পানীয় পান করে না। তার কারণ হলো, রোজা অবস্থায় কোন পানি পান বা খাদ্য-খাবার খেলে রোজা আল্লাহর কাছে গ্রহণযোগ্য হবে না। এই জন্যই শত কষ্ট হবার পরেও কোন রোজাদার খাবার খাই না এবং পানীয় পান করে না। এর পেছনে মূল কারণ হলো খোদা ভীতি বা আল্লাহর ভয়। আর এই জন্যই হাদীসে কুদসীতে আল্লাহ পাক বলেন : **الصَّوْمُ لِيْ وَ اَنَا اَجْزَى بِهٖ** রোজা খাস করে আমার জন্য এবং এর প্রতিদান আমি নিজ হাতে দেব। এই হাদীস দ্বারা প্রমাণিত হয় যে, অন্যান্য আ'মল বা ইবাদত লোক দেখানো কিংবা দুনিয়ার সুযোগ-সুবিধার জন্য হতে পারে, কিন্তু রোজার মধ্যে সেই সুযোগ নেই। সুতরাং এই তাকওয়ার গুণ অর্জনকারী আ'মল বা ইবাদতই জাহান্নাম থেকে দূরে রাখে এবং জান্নাতে নিয়ে যায়।

পাঁচ. **وَتَحُجُّ الْبَيْتِ** এবং তুমি বায়তুল্লাহর হজ্জ করবে। রাসূলুল্লাহ (সাঃ)

হযরত মুয়া'জের আবেদনের পরিপ্রেক্ষিতে জান্নাতে প্রবেশ এবং জাহান্নাম থেকে দূরে থাকার সর্বশেষ মৌলিক যে আ'মলের কথা বলেছেন, তা হলো বায়তুল্লাহ শরীফে হজ্জ পালন করা। অবশ্য এই আ'মলটি কেবলমাত্র ধনী লোকদের জন্য প্রযোজ্য। কেননা গরীব লোকদের পক্ষে বাইতুল্লাহ শরীফ যাবার জন্য যে অর্থের প্রয়োজন তা যোগান দেয়া সম্ভব হয় না। আর হজ্জ এমনই এক ইবাদত যার দ্বারা ধনীদের ধন-সম্পদের গৌরব এবং ক্ষমতাশীলদের ক্ষমতার আমিত্ববোধ ও গর্ব-অহংকারকে ধুলিসাৎ করে দিয়ে আখেরাতে মুক্তির পথকে সুগোম করে দেয়। মাবরুর হজ্জের মাধ্যমে আল্লাহ তাআলা হাজীদেরকে গোনাহ-খাতা থেকে মুক্ত করে দিয়ে জান্নাতি বানিয়ে দেয়। এই জন্যই রাসূলুল্লাহ (সাঃ) জান্নাত লাভ এবং জাহান্নাম থেকে মুক্তির আ'মল হিসেবে হজ্জের কথা উল্লেখ করেছেন।

অতঃপর রাসূলুল্লাহ (সাঃ) প্রশ্নকারী মুয়া'জ (রাঃ) কে উত্তম আ'মলগুলোর ব্যাখ্যা দিয়ে বলেন : **أَلَا أَدُلُّكَ عَلَىٰ أَبْوَابِ الْخَيْرِ** আমি কি তোমাকে কল্যাণের দরওয়াজাগুলো বলে দেবে না ?

প্রশ্নবোধক এই কথা বলেই রাসূলুল্লাহ (সাঃ) পরপর তিনটি কল্যাণের দরওয়াজার কথা উল্লেখ করেন।

প্রথম কল্যাণের দরওয়াজা : **الصَّوْمُ جَنَّةٌ** রোজা ঢালস্বরূপ। অর্থাৎ ঢাল যেমন প্রতিপক্ষ শত্রুর তরবারীর আঘাতকে প্রতিহত করে ফিরিয়ে দেয়। অনুরূপ ভাবে রোজাও মানুষের চির শত্রু শয়তানের আক্রমণের থাবাকে বাধা সৃষ্টি করে গোনাহ্ থেকে বাঁচিয়ে দেয়। ফলে মানুষ প্রতিরোধকারী রোজার কারণে বহু অন্যায়-অপরাধ মূলক কাজ থেকে বেঁচে জাহান্নাম থেকে নাজাত লাভ করে। আর এই জন্যই রাসূলুল্লাহ (সাঃ) রোজাকে মানুষের জন্য কল্যাণের দরওয়াজা বলে উল্লেখ করেছেন।

দ্বিতীয় কল্যাণের দরওয়াজা :

وَالصَّدَقَةُ تُطْفِئُ الْخَطِيئَةَ كَمَا يُطْفِئُ الْمَاءُ النَّارَ আর সাদকাহ্ গোনাহ্ সমূহকে এমন ভাবে রফা-দফা বা নিশ্চিহ্ন করে দেয় যেমন ভাবে পানি আগুনকে নিভিয়ে দেয়। রাসূলুল্লাহ (সাঃ) এখানে সাদকাহ্ বলে যাকাতকে বুঝিয়েছেন। তাছাড়া অন্যান্য দান-সাদকাহ্ও হতে পারে। মানুষের জন্য কল্যাণের দরওয়াজা সমূহের মধ্যে যাকাত এবং দান-খয়রাত কল্যাণের এমন এক দরওয়াজা যা আদায় করলে দাতার অসংখ্য (ছগীরা বা ছোট) গোনাহ্ সমূহকে নিশ্চিহ্ন করে দেয়। যেমন পানি আগুনকে নিভিয়ে নিশ্চিহ্ন করে দেয়, আগুনের দাহিকা শক্তি বলতে কিছুই থাকে না।

সাদকাহ্ দাতার গোনাহ্ সমূহকে নিশ্চিহ্ন করে দেয়। এখানে গোনাহ্ বলতে ছগীরা বা ছোট গোনাহ্কে বুঝানো হয়েছে। কাবির বা বড় গোনাহ্ নিশ্চিহ্ন করতে হলে এস্তেগফার শর্ত। কেননা এস্তেগফার বা তাওবা ছাড়া কাবির গোনাহ্ থেকে মুক্ত হওয়া যায় না।

তৃতীয় কল্যাণের দরওয়াজা : **وَصَلَاةُ الرَّجُلِ مِنْ جَوْفِ اللَّيْلِ** আর মানুষের গভীর রাতের নামাজও এভাবে গোনাহ্ সমূহ বিনষ্ট করে দেয়। রাসূলুল্লাহ (সাঃ) গভীর রাতের নামাজ বলতে তাহাজ্জুদের নামাজকে বুঝিয়েছেন। নফল ইবাদতের মধ্যে তাহাজ্জুদের নামাজ হলো আল্লাহর কাছে সবচেয়ে প্রিয় ইবাদাত। বান্দা যখন গভীর ঘুমের আরামকে হারাম করে মানুষের অগোচরে একাকি জায়নামাজে দাঁড়িয়ে চোখের পানি ফেলে অথবা কাঁদার ভান করে নামাজ আদায় করে তখন আল্লাহ তাআলা তার প্রতি মহা

খুশী হয়ে তার সমস্ত (ছগীরা) গোনাহ মাফ করে দিয়ে গোনাহ থেকে মুক্ত করে দেন। অত্র হাদীসে রাসূলুল্লাহ (সাঃ) তাহাজ্জুদ নামাজের এবং নামাজীর ফজিলাতের কথা উল্লেখ করে সূরা আস্ সাজদাহর ১৬ ও ১৭ নম্বর আয়াত দু'টি তেলাওয়াত করেন :

تَتَجَافَى جُنُوبُهُمْ عَنِ الْمَضَاجِعِ يَدْعُونَ رَبَّهُمْ خَوْفًا
وَطَمَعًا ۖ وَمِمَّا رَزَقْنَاهُمْ يُنفِقُونَ ۝ فَلَا تَعْلَمُ نَفْسٌ مَّا
أُخْفِيَ لَهُمْ مِنْ قُرَّةٍ أَعْيَنٍ ۚ جَزَاءً بِمَا كَانُوا يَعْلَمُونَ ۝

তাদের পিঠ বিছানা থেকে আলাদা থাকে। তারা নিজেদের প্রভুকে ডাকে ভয় ও আশা সহকারে। আর আমি তাদের জন্য যা কিছু রুজি বা জীবিকা দিয়েছি তা থেকে তারা খরচ করে। ফলে প্রতিদান হিসেবে তাদের জন্য চোখ জুড়ানো এমন জিনিস দেয়া হবে যা গোপন রাখা হয়েছে। কোন প্রাণীই যা জানে না।

এই আয়াত দু'টোতে তাহাজ্জুদ নামাজ আদায়কারী এবং নিজের জীবিকা থেকে আল্লাহর পথে খরচ কারীদের প্রতিদানের কথা বলা হয়েছে। অর্থাৎ তাদেরকে জান্নাতে এমন সব নিয়ামত দেয়া হবে যা দেখলেই তাদের চোখ জুড়িয়ে যাবে। আর এই নিয়ামতগুলো এমনই যা দুনিয়ার কেউই দেখেনি। এসব জিনিস এই জন্যই গোপন রাখা হয়েছে যাতে বেশী আকর্ষণ সৃষ্টি হয়। অর্থাৎ তাহাজ্জুদ গোজার এবং দানকারী জান্নাতীরা যখন জান্নাতে এসব না দেখা আকর্ষণীয় জিনিস হঠাৎ করে দেখবে তখন তা দেখে তাদের চোখ জুড়ে যাবে এবং প্রশান্তিতে মন ভরপুর হয়ে যাবে।

অতঃপর রাসূলুল্লাহ (সাঃ) অত্র হাদীসে কতিপয় বিভিন্ন পর্যায়ের আ'মলের কথা উল্লেখ করে বলেন :

أَلَا أَخْبَرُكَ بِرَأْسِ الْأَمْرِ وَعُمُودِهِ وَذُرْوَةِ سَنَامِهِ

(হে মুয়া'জ) আমি কি তোমাকে (দ্বীনের) সমস্ত কাজের মূল, তার কাণ্ড এবং

সর্বোচ্চ চূড়ার কথা বলবো না? এতে মুয়া'জ (রাঃ) বললেন :

قُلْتُ بَلَى يَا رَسُولَ اللَّهِ

আমি বললাম : হ্যাঁ বলুন, হে আল্লাহর রাসূল। তখন রাসূলুল্লাহ (সাঃ) বললেন :

رَأْسُ الْأُمْرِ الْإِسْلَامُ (দ্বীনের) যাবতীয় কাজের মূল হলো ইসলাম। রাসূলুল্লাহ (সাঃ) এখানে দ্বীনের 'কাজকে' গাছের সাথে তুলনা করেছেন। গাছ যেমন মূলের উপর ভিত্তি করে কাণ্ড এবং ডাল-পালা হয়ে নিজের প্রকৃত রূপের বহিঃপ্রকাশ ঘটায় ও সৌন্দর্য বর্ধন করে। মূলের সাহায্যে মাটির রস সিঞ্জন করে তরু-তাজা হয়ে বৃদ্ধি পেয়ে ফুলে-ফলে শোভিত হতে থাকে। অনুরূপ ভাবে দ্বীনের সমস্ত কাজের মূল হলো ইসলাম। এর উপর ভিত্তি করেই অন্যান্য আ'মল বা কাজগুলো সৌন্দর্য বর্ধন করে।

একজন ব্যক্তি কালেমা পড়ার মাধ্যমেই ইসলামে প্রবেশ করার সুযোগ পায়। আর ইসলামে প্রবেশ করে অন্যান্য আ'মল বা কাজ করলে পর তাকে মুসলমান বলা হয়। সুতরাং মুসলমান এর মূল ভিত্তি হলো ইসলাম। ইসলামে প্রবেশ না করলে অন্যান্য কোন আ'মল বা কাজ তা দেখতে যতই উত্তম এবং নেক মনে হোক না কেন, আল্লাহর কাছে তার কোন মূল্য নেই। তার কোন গ্রহণযোগ্যতা নেই। সুতরাং আল্লাহর কাছে গ্রহণযোগ্য হতে হলে প্রথমেই তাকে কালেমার মাধ্যমে ইসলামে প্রবেশ করতে হবে। অতএব সকল কাজের মূল ভিত্তিই হলো ইসলাম। অতঃপর রাসূলুল্লাহ (সাঃ) বলেন : **وَعُمُودُهُ الصَّلَاةُ** এবং তার কাণ্ড হলো নামাজ। অর্থাৎ গাছের দ্বিতীয় অংশ হলো কাণ্ড। যার উপর ডাল-পালা, পাতা, ফুল ও ফলের মাধ্যমে গাছের প্রকৃত রূপ ধারণ করে। শুধু গাছের মূল থাকলেই তাকে গাছ বলা যাবে না তার কাণ্ডও থাকতে হবে। অনুরূপ ভাবে দ্বীনের যাবতীয় কাজের দ্বিতীয় অংশ (কাণ্ড) হলো নামাজ। অর্থাৎ দ্বীনের যাবতীয় কাজের মূল ইসলামে প্রবেশ করার পর পরই যে কাজটি করতে হয় তা হলো নামাজ। একজন ব্যক্তি ইসলামে প্রবেশ করার পর মুসলমান হিসেবে পরিচিতি লাভ করে নামাজের মাধ্যমে। গাছ যেমন কাণ্ডের মাধ্যমে পরিচিতি লাভ করে, তেমনি মুসলমান নামাজের মাধ্যমে পরিচিতি লাভ করে। রাসূলুল্লাহ

(সাঃ) বলেছেন **بَيْنَ الْعَبْدِ وَالْكَفْرِ تَرْكُ الصَّلَاةِ** বান্দা

(মুসলমান) এবং কুফরের মধ্যে পার্থক্য হলো নামাজ। এই জন্যই আল্লাহ পাক আল-কুরআনে নামাজের ব্যাপারে সবচেয়ে বেশী তাগাদা দিয়েছেন।

অতঃপর রাসূলুল্লাহ (সাঃ) বলেন :

وَذُرْوَةٌ سَنَامِهِ الْجِهَادُ এবং উহার অর্থাৎ দ্বীনের কাজের সর্বোচ্চ চূড়া হলো জিহাদ।” গাছের তৃতীয় অংশ বা সর্বোচ্চ অংশ হলো ডাল-পালার চূড়া বা শীর্ষভাগ, যার দ্বারা আলো বাতাস সংগ্রহ করে গাছকে শুশোভিত করে শোভা বর্ধন করে এবং হাতছানি দিয়ে ডাকে। প্রতিকূল আবহাওয়ার মোকাবেলা করে গাছ নামক জিনিসের অস্তিত্বকে টিকিয়ে রাখে। অনুরূপ ভাবে জিহাদও দ্বীনের সমস্ত কাজের শোভা বর্ধন করে এবং সমস্ত প্রতিকূলতাকে মোকাবেলা করে মুসলমানের অস্তিত্বকে টিকিয়ে রাখে। জিহাদের মাধ্যমে ঈমানকে শানিত করে এবং অন্যদেরকেও দ্বীনের দিকে হাতছানি দিয়ে ডাকে। জিহাদের মাধ্যমে মুসলমানের মুসলমানিত্বকে ফুলে-ফলে শুশোভিত করে শোভা বর্ধন করে এবং দ্বীন নামের এই গাছটির পূর্ণাঙ্গতা দান করে।

অতঃপর রাসূলুল্লাহ (সাঃ) অত্র হাদীসের শেষাংশে আরও একটা গুরুত্বপূর্ণ বিষয় অবগত করার জন্য বলেন :

أَلَا أَخْبِرُكَ بِمَلَاكِ ذِيكَ كَلِّهِ (হে মুয়া'জ) আমি কি তোমাকে এসবগুলোর মূল বা আসলটা বলে দেব না ? অর্থাৎ রাসূলুল্লাহ (সাঃ) অত্র হাদীসে উপরোক্ত যে সমস্ত আ'মল বা কাজের কথা বর্ণনা করেছেন তার সবগুলোর মূল বা আসল জিনিসটি বলার জন্যই হযরত মুয়া'জকে এধরনের প্রশ্ন করেছেন। এতে হযরত মুয়া'জ বলেন :

قُلْتُ بَلَى يَا رَسُولَ اللَّهِ আমি বললাম : হ্যাঁ বলে দিন হে আল্লাহর রাসূল। তখন রাসূল (সাঃ) তাঁর জিহ্বা টেনে ধরে বললেন :

كُفَّ عَالِيكَ এটাকে (জিহ্বাকে) তোমার নিয়ন্ত্রনে রাখবে। রাসূলুল্লাহ (সাঃ) এখানে জিহ্বা বলতে জবান বা কথাকে বুঝিয়েছেন। অর্থাৎ মানুষের জবান এমন একটা

গুরুত্বপূর্ণ জিনিস যে, রাসূল (সাঃ) এটাকে সকল কাজের আসল বা মূলের মূল বলে উল্লেখ করেছেন। অর্থাৎ যে নিজের যবানকে নিয়ন্ত্রন করতে পারবে সে সবকিছুকেই নিয়ন্ত্রন করতে পারবে। অর্থাৎ নামাজ, রোজা, হজ্জ, যাকাত, অন্যান্য ভাল ভাল আ'মল এবং জিহাদ যাই হোক না কেন নিজের যবান যদি নিয়ন্ত্রন করা না যায় তাহলে যবানই সকল আ'মলকে ধ্বংস বা বরবাদ করে দেয়। এ সম্পর্কে রাসূলুল্লাহ (সাঃ) অন্য হাদীসে উল্লেখ করেন :

مَنْ يَضْمَنْ لِي مَا بَيْنَ لِحْيَتَيْهِ وَمَا بَيْنَ رِجْلَيْهِ أَضْمَنْ لَهُ الْجَنَّةَ-

যদি কেউ তার দু'টি জিনিস জিহ্বা (যবান) এবং দুই পায়ে মধ্যবর্তী স্থান (লজ্জাস্থানের) গ্যারান্টি দিতে পারে তাহলে আমিও তার জন্য জান্নাতের গ্যারান্টি দিতে পারি। (বুখারী)। কেননা যবান দ্বারাই মানুষ মিথ্যা বলে। গীবত, পরনিন্দা, পরচর্চা এবং চোগলখোরী করে। জবান দ্বারাই মানুষ মিথ্যা স্বাক্ষর দিয়ে প্রকৃত অপরাধীকে নিরাপরাধী বানায় এবং নিরাপরাধীকে অপরাধী বানায়। জিহ্বা বা যবান দ্বারাই মানুষ অশ্লীল কথা-বার্তা বলে। যবান দ্বারাই মানুষ মানুষকে গালমন্দ এবং কটু কথা বলে কষ্ট দেয়, অপমান অপদস্ত করে। যবান দ্বারাই মানুষ মানুষের সাথে কৃত ওয়াদা বা প্রতিশ্রুতি ভঙ্গ করে। যবান দ্বারাই মানুষ আল্লাহ এবং আল্লাহর রাসূলের বিধান ও আদর্শের বিরোধিতা করে। যবান দ্বারাই মানুষ হুকুকুল্লাহ (আল্লাহর হক) এবং হুকুকুলইবাদ (বান্দার হক) নষ্ট করে। সুতরাং দেখা যায় যবান বা কথাই হলো সবকিছুর মূল। সকল অপরাধের কেন্দ্রবিন্দু। এই জন্যই রাসূল (সাঃ) যবান বা কথার এত গুরুত্ব তুলে ধরেছেন। এই জন্যই তিনি সমস্ত আ'মল বা কাজের মূল হিসেবে জিহ্বা বা যবানকে উল্লেখ করেছেন। অতঃপর মুয়া'জ বলেন :

قُلْتُ : يَا رَسُولَ اللَّهِ وَإِنَّا لَيُؤْخَذُونَ بِمَا نَتَكَلَّمُ بِهِ
আমি বললাম : হে আল্লাহর রাসূল, আমরা স্বাভাবিক কথা-বার্তায় যা বলে থাকি তার জন্যেও কি পাকড়াও হবো ? অর্থাৎ রাবী হযরত মুয়া'জ রাসূলুল্লাহ (সাঃ) কে প্রশ্ন করে জেনে নিচ্ছেন যে, আমরা দুনিয়ায় চলা-ফেরা, সংসার ও সমাজ পরিচালনা এবং অন্যান্য প্রয়োজনে যে সব কথা-বার্তা বলে থাকি তার

জন্যও কি আল্লাহর কাছে পাকড়াও হবো ? তার কারণ, কথা না বললে তো দুনিয়ায় চলা যায় না এবং সামাজিকতা রক্ষা পায় না। প্রতি উত্তরে রাসূলুল্লাহ (সাঃ) হযরত মুয়া'জ কে বললেন :

وَهَلْ يَكُفُّ النَّاسَ فِي النَّارِ عَلَى وُجُوهِهِمْ إِلَّا حَصَائِدُ
السِّنْتِهِمْ-

মানুষকে তো তার জিহ্বা বা যবান দ্বারা উপার্জিত জিনিসের কারণেই জাহান্নামে উপড় করে নিক্ষেপ করা হবে। এই কথার দ্বারা রাসূল (সাঃ) বুঝাতে চাচ্ছেন যে, মানুষকে তো স্বাভাবিক কথা-বার্তা বলতেই হবে। কিন্তু স্বাভাবিক এবং প্রয়োজনের অতিরিক্ত কথা যা নিজের পরিবারের, সমাজ ও রাষ্ট্রের এবং দ্বীনের কোন কাজে আসে না। যে কথার মধ্যে কোন কল্যাণ এবং উপকার নেই, এমন কথা-বার্তার জন্যই আল্লাহ তাআলা পাকড়াও করবেন। নিজের পরিবারের, সমাজ এবং রাষ্ট্রের কোন ক্ষতিকর কথা। মিথ্যা, অশ্লীল, কটু ও অপবাদ মূলক কথার জন্যই আল্লাহপাক তাদেরকে শাস্তি দেবেন। এমনকি অপমানের সাথে উপড় করে পা ধরে টেনে-হেঁচড়ে জাহান্নামে নিক্ষেপ করবেন। সুতরাং আমাদেরকে সব সময় কথা-বার্তার ক্ষেত্রে সতর্ক থাকতে হবে। কম এবং প্রয়োজনীয় কথা বলতে হবে। কেননা বেশী কথা বললে বেশী ভুল হয়। রাসূলুল্লাহ (সাঃ) ও অন্য এক হাদীসে কম কথা এবং মেপে মেপে কথা বলার তাগাদা দিয়েছেন। চুপচাপ থাকার পরামর্শ দিয়েছেন। অতএব আমাদের কথা-বার্তার ক্ষেত্রে সতর্ক থাকা উচিত।

শিক্ষা : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটির যে দারস পেশ করলাম এ থেকে আমাদের জন্য যে সব শিক্ষণীয় বিষয় রয়েছে তা হলো-

- ✽ প্রত্যেক মুমিন বান্দাহ-বান্দীর জাহান্নাম থেকে নাজাত লাভ করে জান্নাত যাবার তীব্র আকাংখা থাকা উচিত এবং সে অনুযায়ী আ'মল করা উচিত।
- ✽ জান্নাতে যাবার তীব্র আকাংখী ব্যক্তিদের আ'মল গুলোকেও আল্লাহ তাআলা সহজ করে দেন। এটা আল্লাহর পক্ষ থেকে নিয়ামত।
- ✽ জীবনের প্রতিটি মুহূর্তকে ইবাদত-বন্দেগীতে অতিবাহিত করতে হবে।

✱ আল্লাহ তাআলার ইবাদত- বন্দেগী হবে শিরক মুক্ত। তাঁর জাত, তাঁর সিফাত এবং তাঁর ক্ষমতার সাথে কাউকে বা কোন কিছুকে সামান্যতমও অংশীদার স্থির করা যাবে না।

✱ নামাজের হক আদায় করে নামাজ পড়তে হবে। নিজ পরিবারের (দশ বছর থেকে শুরু করে বৃদ্ধ-বৃদ্ধা পর্যন্ত) সকলকে নামাজি বানাতে হবে এবং রাষ্ট্রীয় ভাবে নামাজ প্রতিষ্ঠার জন্য ইসলামী রাষ্ট্র প্রতিষ্ঠার জিহাদে নিজেকে আত্মনিয়োগ করতে হবে।

✱ নিসাবের অধিকারী ব্যক্তিদের বছরান্তে সম্পদের সঠিক হেসাব-নেকাশ করে যাকাত আদায় করে অসহায় বেকার এবং দরিদ্রদের পুনর্বাসিত করে অভাব দূর করতে হবে। যাকাত যেহেতু ইসলামী রাষ্ট্রের অর্থ ব্যবস্থার আয়ের মূল উৎস এবং রাষ্ট্রীয় ভাবেই যাকাত বিতরণ করার বিধান রয়েছে, সেইহেতু ইসলাম অর্থব্যবস্থা চালুর জন্য ইসলামী রাষ্ট্র ব্যবস্থা প্রতিষ্ঠার আন্দোলনে শরীক থাকতে হবে।

✱ প্রতিটি মুমিন-মুসলমানকে রমযান মাসে সঠিক নিয়মে এবং সঠিক পদ্ধতিতে রোজাব্রত পালনের মাধ্যমে তাক্ওয়ার গুণ অর্জন করতে হবে।

✱ দৈহিক এবং আর্থিক ভাবে সামর্থবান ব্যক্তিদের অবশ্যই হজ্জ পালনের মাধ্যমে আল্লাহর একটা মৌলিক ফরজ ইবাদত পালন করে নিজেকে গোনাহ থেকে মুক্ত করতে হবে।

✱ উত্তম এবং কল্যাণের দরওয়াজা গুলোর মধ্যে রয়েছে :

i) রোজা হলো ঢালস্বরূপ। ঢাল যেমন শত্রুর তরবারীর আঘাতকে প্রতিহত করে ফিরিয়ে দেয়, অনুরূপ ভাবে রোজাও শয়তানের অসওয়াসা কে প্রতিহত করে গোনাহ থেকে বাঁচিয়ে দেয়। সুতরাং রমযানের রোজার মাধ্যমে তাক্ওয়ার গুণ অর্জন করে গোনাহ থেকে দূরে থাকতে হবে।

ii) দ্বিতীয় কল্যাণের দরওয়াজা হলো সাদকাহ বা যাকাত ও অন্যান্য দান-খয়রাত। এ এমন এক আ'মল যে আমল করলে জীবনের ছোট ছোট অসংখ্য গোনাহকে পাক-সাফ করে দেয়, যেমন ভাবে পানি আগুনকে নিভিয়ে দেয়।

iii) তৃতীয় কল্যাণের দরওয়াজা হলো গভীর রাতের নামাজ অর্থাৎ তাহাজ্জুদের

নামাজ। এ নামাজ ছগিরা গোনাহ্ গুলোকেও পাক-সাফ করে মুক্ত করে দেয়। সুতরাং প্রতিটি মুমিন-মুমিনার উচিত এই নামাজে অভ্যস্ত হওয়া। গভীর রাত্রে নামাজের মাধ্যমে সরাসরি মহান আল্লাহর কাছে নিজের যাবতীয় কামনা-বাসনা পেশ করা।

iv) হাদীসে আরো উল্লেখ রয়েছে সকল কাজের মূল হলো ইসলাম। তার কাণ্ড হলো নামাজ এবং সর্বোচ্চ চূড়া হলো জিহাদ। সুতরাং আমাদেরকে পূর্ণ মুসলমান হতে হলে ইসলামে প্রবেশের মাধ্যমে তার যথার্থ নির্দেশ পালন করতে হবে। যথাযথ ভাবে নামাজ আদায় করে মুসলমানিত্বের পরিচয় দিতে হবে। জিহাদের মাধ্যমে ঈমানকে শানিত করতে হবে এবং ইসলামের পরিপূর্ণতা দান করতে হবে।

v) হাদীসে রাসূলুল্লাহ (সাঃ) জাহান্নাম থেকে দূরে থেকে জান্নাত লাভের যে সব আ'মলের কথা উল্লেখ করেছেন তার সব কিছুই মূলে হলো নিজের জিহ্বা বা যবান। যবানকে নিয়ন্ত্রন করতে পারলেই জান্নাত যাওয়া যাবে। আর নিয়ন্ত্রন করতে না পারলে জাহান্নামে যেতে হবে। কেননা নিয়ন্ত্রনহীন যবান সমস্ত আমলকে ধ্বংস করে দেয়। অর্থাৎ এর দ্বারা হুকুগল্লাহ (আল্লাহর হক) এবং হুকুকুল ইবাদ (বান্দার হক) উভয় নষ্ট করে দেয়। এই জন্য আমাদেরকে কম কথা বলতে হবে। মেপে মেপে কথা বলতে হবে। লাগামহীন কথা বলা যাবে না।

আহবান : প্রিয় ভায়েরা/বোনেরা! এতক্ষণ পর্যন্ত আপনাদের সামনে আল্লাহর রাসূলের (সাঃ) যে দীর্ঘ হাদীস পাঠ, অনুবাদ, ব্যাখ্যা এবং শিক্ষা পেশ করলাম এতে যদি আমার অজান্তে কোন ভুল-ত্রুটি হয়ে যায় তার জন্য মহান আল্লাহর কাছে ক্ষমা প্রার্থনা করছি। আর অত্র হাদীসে জান্নাত যাবার যতগুলো কাহের কথা আল্লাহর রাসূল (সাঃ) বলেছেন, তা যেন আমরা বাস্তব জীবনে আ'মল করতে পারি সেই তৌফিক কামনা করে দারস শেষ করছি।

মাআসসালাম।

রিয়া বা লোক দেখানো কাজ থেকে বাঁচার উপায়

نَحْمَدُهُ وَنُصَلِّي عَلَى رَسُولِهِ الْكَرِيمِ

بِسْمِ اللَّهِ الرَّحْمَنِ الرَّحِيمِ

وَعَنْ زَيْدِ بْنِ أَسْلَمَ عَنْ أَبِيهِ، أَنَّ عُمَرَ رَضِيَ اللَّهُ عَنْهُ
خَرَجَ إِلَى الْمَسْجِدِ فَوَجَدَ مُعَاذًا عِنْدَ قَبْرِ رَسُولِ اللَّهِ
صَلَّى اللَّهُ عَلَيْهِ وَسَلَّمَ يُبْكِي، فَقَالَ: مَا يُبْكِيكَ؟ قَالَ:
حَدِيثٌ سَمِعْتُهُ مِنْ رَسُولِ اللَّهِ صَلَّى اللَّهُ عَلَيْهِ وَسَلَّمَ
قَالَ: أَلَيْسَ يُرَى مِنَ الرِّيَاءِ شِرْكٌ، وَمَنْ عَادَى أَوْلِيَاءَ
اللَّهِ فَقَدْ بَارَى اللَّهَ بِالْمُحَارَبَةِ، إِنَّ اللَّهَ يُحِبُّ الْأَبْرَارَ
الْآتِقِيَاءَ الْأَخْفِيَاءَ الَّذِينَ إِنْ غَابُوا لَمْ يَفْتَقَدُوا، وَإِنْ
حَضَرُوا لَمْ يُعْرَفُوا، قُلُوا بِهِمْ مَصَابِيحَ الْهُدَى،
يَخْرُجُونَ مِنْ كُلِّ غُتْرَاءٍ مُظْلِمَةٍ (إِبْنِ مَاجَهَ الْحَاكِمِ
وَالْبَيْهَقِيِّ)

অনুবাদ : হযরত যায়েদ ইবনে আসলাম (রাঃ) থেকে বর্ণিত আছে, তিনি তাঁর পিতা থেকে বর্ণনা করেন। একবার হযরত উমর (রাঃ) মসজিদে নববীতে গিয়ে দেখতে পান যে, হযরত মুয়া'জ (রাঃ) রাসূল (সাঃ) এর কবরের কাছে কান্নাকাটি করছেন। হযরত উমর (রাঃ) তাঁকে জিজ্ঞেস করলেন : তুমি কাঁদছো কেন ? মুয়া'জ বললেন : রাসূল (সাঃ) এর একটা হাদীস (কথা) মনে করে আমি কাঁদছি। তিনি বলেছেন : সামান্য পরিমাণ রিয়াও শিরকের অন্তর্ভুক্ত। আর যে ব্যক্তি আল্লাহর প্রিয় লোকদের সাথে

শত্রুতা পোষণ করে সে যেন স্বয়ং আল্লাহর সাথে যুদ্ধে লিপ্ত হয়ে পড়ে। আর আল্লাহর প্রিয় লোক তারাই যারা সৎ কর্মশীল, খোদাভীরু, লোকচক্ষুর আড়ালে সৎ কাজ করে, যারা অনুপস্থিত থাকলেও (মানুষের স্মৃতি থেকে) হারিয়ে যায় না। আর সবার মাঝে বিরাজমান থাকলেও অচেনা থেকে যায়। যাদের অন্তর হেদায়েতের মশালস্বরূপ এবং যারা কোন অন্ধকারাচ্ছন্ন নির্জন প্রান্তর থেকেও বেরিয়ে আসে। (ইবনে মাজাহ, হাকেম ও বায়হাকী)।

বিশেষ বিশেষ শব্দার্থ : **عَنْ** - থেকে বা হতে। **أَبِيهِ** তার বাপ। **خَرَجَ** - বের হলেন। **عِنْدَ قَبْرِ** - অতঃপর পেলেন। **فَوَجَدَ** - দিকে। **رَأَى** - কবরের কাছে। **مَا يُبْكِيكَ** - সে কান্নাকাটি করছে। **يُبْكِي** - কেন ? **حَدِيثٌ** - কথা বা বাণী। **سَمِعْتُهُ** - তাঁর কথা শুনে বা মনে করে। **رِيَاءٌ** - লোক থেকে বা হতে। **أَلَيْسَ** - সামান্য পরিমাণ। **مِنْ** - দেখানো। **وَمَنْ** - এবং যে কেউ। **شِرْكٌ** - শিরক বা অংশীদার বানানো। **بَارَزَ اللَّهُ** - আল্লাহর প্রিয় পাত্র। **أَوْلِيَاءُ اللَّهِ** - শত্রুতা। **عَادَى** - সাথে লিপ্ত হয়। **يُحِبُّ** - নিশ্চয় আল্লাহ। **إِنَّ اللَّهَ** - যুদ্ধে। **مُحَارَبَةٍ** - ভালবাসেন। **أَبْرَارٌ** - নেক্কার বা সৎ কর্মশীল। **أَتْقِيَاءٌ** - চরম খোদাভীরু। **أَخْفِيَاءٌ** - গোপনে। **الَّذِينَ** - যারা। **إِنْ** - যদি। **غَابُوْا** - অনুপস্থিত থাকে। **حَضَرُوا** - এবং যদি। **وَإِنْ** - হারিয়ে যায় না। **لَمْ يَفْتَقِدُوا** - উপস্থিত বা বিরাজমান থাকে। **لَمْ يَعْرِفُوا** - পরিচিত হয় না বা অচেনা থাকে। **قُلُوبُهُمْ** - তাদের অন্তরসমূহ। **مَصَابِيحُ** - বাতি বা মশাল। **كُلٌّ** - পথ বা নির্দেশিকা। **يُخْرِجُونَ** - তারা বের হয়। **غَيْرَاءٌ** - প্রত্যেকে। **مُظْلَمَةٌ** - অন্ধকারাচ্ছন্ন।

সম্বোধন : দারসে হাদীস প্রোগ্রামে উপস্থিত প্রিয় দ্বীনি/ইসলামী আন্দোলনের কর্মী ভায়েরা/বোনেরা! আসসালামু আলাইকুম। আমি আপনাদের সামনে বিশিষ্ট রাবী এবং সাহাবী যাবেদ ইবনে আসলাম (রাঃ) বর্ণিত হাদীসটি পাঠ এবং তরজমা করেছি। আল্লাহ্‌পাক যেন আমাকে হাদীসটির সঠিক ব্যাখ্যা এবং শিক্ষা তুলে ধরার তাওফীক দান করেন।

হাদীসটি বর্ণনার সময়কাল : যদিও হযরত উমর (রাঃ) এর উদ্ধৃতি দিয়ে হাদীসটি বর্ণিত হয়েছে। কিন্তু হাদীসের মূল বক্তব্য হযরত মুয়া'জের মাধ্যমে রাসূলের কথা বর্ণিত হয়েছে। হযরত মুয়া'জ (রাঃ) নিজে রাসূলের এই হাদীসটি শুনেছেন। আর মুয়া'জ (রাঃ) মদীনাবাসী ছিলেন। সুতরাং এতে বুঝা যায় হাদীসটি রাসূল (সাঃ) মাদানী জীবনে বর্ণনা করেছেন। তাছাড়াও হাদীসের বিষয়বস্তুর দিকে খেয়াল করলে বুঝা যায় হাদীসটি মাদানী জিন্দেগীতে বর্ণিত হয়েছে। এর পরও আল্লাহ্‌ পাকই ভাল জানেন।

হাদীসটি বর্ণিত কেতাবের পরিচয় : হাদীসটি তিনটি হাদীসের কেতাবে উল্লেখিত হয়েছে। তার মধ্যে 'সিহাহ্‌ সিত্তাহ্‌' ভুক্ত কিতাব 'ইবনে মাযাতে' বর্ণিত হয়েছে। আরও দু'টো বিশিষ্ট হাদীসের কেতাব 'হাকেম' এবং 'বাইহাকীতেও' বর্ণিত হয়েছে। হাদীসটি সহীহ্‌ নয় এমন কোনো মন্তব্য কেউ করেননি। সুতরাং ধরে নেয়া যায় হাদীসটি সহীহ্‌ বা বিশ্বস্ত।

ব্যাখ্যা : প্রিয় ভায়েরা/বোনেরা! এতক্ষণ পর্যন্ত আমি আপনাদের সামনে হাদীস পাঠ, অনুবাদ এবং সংক্ষিপ্ত কিছু প্রাথমিক তথ্য তুলে ধরেছি। এখন হাদীসটার মূল ব্যাখ্যা পেশ করছি। বিশিষ্ট বর্ণনাকারী ও অহী লেখক আনসারী সাহাবী হযরত মুয়া'জ (রাঃ)কে রাসূল (সাঃ) এর কবরের কাছে বসে কাঁনাকাটি করতে দেখে হযরত উমর (রাঃ) তাকে কাঁনাকাটির কারণ জিজ্ঞেস করলে তিনি বললেন :

حَدِيثٌ سَمِعْتُهُ مِنْ رَسُولِ اللَّهِ صَلَّى اللَّهُ عَلَيْهِ وَسَلَّمَ

আমি রাসূলুল্লাহ্‌ (সাঃ) এর একটা হাদীস বা কথা মনে করে কাঁদছি। অর্থাৎ রাসূল (সাঃ) এমন একটা গুরুত্বপূর্ণ হাদীস বা কথা বলে গিয়েছিলেন যা মসজিদে নববীর ধারে তাঁর কবরের কাছে এসে মনে পড়ে গিয়ে এমন আবেগ

এবং ভয় পয়দা হয়েছে যে এমনিতেই কাঁদন এসে গেছে। (এখানে জানার বিষয় এই যে, রাসূলুল্লাহ (সাঃ) এর ওফাতের পর মসজিদে নববীর পাশে নিজ ঘরের মধ্যেই তাঁর দাফন দেয়া হয়। বর্তমানে মসজিদ সম্প্রসারিত হওয়ার কারণে রাসূলের মাজার মসজিদের প্রায় মাঝখানে পড়ে গেছে। সেখানে যাতে কেউ কবর নিয়ে শিরক এবং বিদআ'ত করতে না পারে সে জন্য সউদী সরকারের পক্ষ থেকে বিশেষ ব্যবস্থা রয়েছে।) সেই ভয় ও আবেগ জড়িত গুরুত্বপূর্ণ কথাগুলো হলো-

اَلَيْسَ مِنْ الرِّيَاءِ সামান্য পরিমাণ রিয়া বা লোক দেখানো কাজও শিরকের অন্তর্ভুক্ত। রিয়া অর্থ দেখানো। অর্থাৎ সৎ, ভাল, কল্যাণকর এবং নেক কাজ করতে যেয়ে যদি মনের মধ্যে সামান্য পরিমাণও রিয়া বা লোক দেখানো কিংবা প্রদর্শনেচ্ছা থাকে তাহলে তা শিরকের মধ্যে গণ্য হয়ে যাবে। কেননা প্রতিটা ভাল এবং নেক আ'মল তো কেবলমাত্র আল্লাহর উদ্দেশ্যেই হওয়া উচিত। শুধু উচিতই নয়, এটা আল্লাহর হুক বা প্রাপ্য। কিন্তু তার মধ্যে যদি মানুষের সন্তুষ্টি অথবা দৃষ্টি আকর্ষণ কিংবা বাহবা পাবার আশা এবং সুনাম-সুখ্যাতি লাভের উদ্দেশ্য মিশ্রন হয়ে যায়, তা হলে তা আল্লাহর সাথে শরীক বা অংশীদার বানিয়ে দেয়া হয়। অন্য এক হাদীসে রাসূল (সাঃ) লোক দেখানো এবাদতকে শিরক এর সাথে তুলনা করে বলেন :

مَنْ صَلَّى يُرَائِي فَقَدْ أَشْرَكَ؛ وَمَنْ صَامَ يُرَائِي فَقَدْ أَشْرَكَ؛ وَمَنْ تَصَدَّقَ يُرَائِي فَقَدْ أَشْرَكَ

যে লোক দেখানোর উদ্দেশ্যে নামায পড়লো সে শিরক করলো। যে লোক দেখানোর উদ্দেশ্যে রোজা রাখলো সে শিরক করলো। আর যে লোক দেখানোর উদ্দেশ্যে দান করলো সেও শিরক করলো। (মুসনাদে আহমদ)

সুতরাং বান্দার প্রতিটা ইবাদত-বন্দেগী বা কাজ হবে একমাত্র আল্লাহ তাআলার জন্যে, তাঁরই সন্তুষ্টির উদ্দেশ্যে। যার মধ্যে সামান্য পরিমাণও লোক দেখানো বা প্রদর্শনেচ্ছার কোনো পরিকল্পনা বা ইচ্ছা থাকবে না। অতএব মূর্তি পূজা, কবর পূজা এবং দেবদেবীর পূজাই কেবলমাত্র শিরক, তা নয়। বরং হাদীস অনুযায়ী এবাদত-বন্দেগী এবং সৎ কাজের মধ্যেও শিরক হয়ে যায়, যদি তার

মধ্যে মানুষের দৃষ্টি আকর্ষণ বা সন্তুষ্টির সংমিশ্রণ ঘটে।

শিরক মানে হলো আল্লাহর অধিকারে হস্তক্ষেপ করা। তার কারণ, ইবাদত-বন্দেগী এবং সৎ কাজ করা মানে হলো আল্লাহর হক বা অধিকার আদায় করা। সুতরাং যে ইবাদত-বন্দেগী এবং সৎকাজ আল্লাহর সন্তুষ্টি বাদ দিয়ে মানুষের সন্তুষ্টির জন্যে করে সে আল্লাহর হক বা অধিকার ক্ষুণ্ণ করে। রাসূল (সাঃ) এ সম্পর্কে অপর এক হাদীসে হযরত মুয়া'জকে আল্লাহর হক এবং বান্দার হক বুঝাতে গিয়ে বলেন :

فَإِنَّ حَقَّ اللَّهِ عَلَى الْعِبَادِ أَنْ تَعْبُدُوهُ وَلَا يُشْرِكُوا بِهِ شَيْئًا وَحَقَّ الْعِبَادِ عَلَى اللَّهِ أَنْ لَا يُعَذِّبَ مَنْ لَا يُشْرِكُ بِهِ شَيْئًا-

বান্দার উপর আল্লাহর হক বা অধিকার হলো এই যে, তারা এমন ভাবে আল্লাহর ইবাদত করবে যে, তাঁর সাথে কোনো কিছুকে শরীক করবে না। আর আল্লাহর উপরে বান্দার হক বা অধিকার হলো এই যে, যে ব্যক্তি তাঁর সাথে কোনো কিছুকে শরীক করবে না, তিনি তাকে শাস্তি দেবেন না।

(বুখারী মুসলিম)

সুতরাং আমাদের প্রতিটি সৎ কাজ, প্রতিটি ইবাদত-বন্দেগী, যুদ্ধ-জিহাদ, আন্দোলন-সংগ্রাম নিছক আল্লাহ তাআলার রাজি খুশি এবং সন্তুষ্টির জন্যই হবে। তার মধ্যে সামান্য পরিমাণ রিয়া বা লোক দেখানোর ইচ্ছা বা বাসনা থাকবে না। মহান আল্লাহ বলেন :

إِنْ صَلَاتِي وَنُسُكِي وَمَحْيَايَ وَمَمَاتِي لِلَّهِ رَبِّ الْعَالَمِينَ-

নিশ্চয় আমার নামাজ, আমার কুরবানী, আমার জীবন ও মরণ সব কিছুই বিশ্বি প্রতিপালক আল্লাহ তাআ'লার জন্যে। (সূরা-আনয়াম-১৬২)

হযরত মুয়া'জ (রাঃ) কাঁদার কারণ উল্লেখ করে হাদীসের পরবর্তী অংশে বলেনঃ

وَمَنْ عَادَىٰ أَوْلِيَاءَ اللَّهِ فَقَدْ بَارَزَ اللَّهَ بِاَلْمُحَارَبَةِ-

আর যে ব্যক্তি আল্লাহর প্রিয় লোকদের সাথে শত্রুতা করে সে যেন স্বয়ং আল্লাহর সাথে যুদ্ধে লিপ্ত হয়। এই অংশে রাসূল (সাঃ) আল্লাহর প্রিয় লোকদের বিরাট মর্যাদা এবং সম্মানের কথা উল্লেখ করেছেন। তার কারণ, যারা আল্লাহর প্রিয় লোক তাদের সাথে শত্রুতা করা বা মনের মধ্যে শত্রুতা পোষণ করা মানেই হলো আল্লাহর সাথে শত্রুতা করা। আর আল্লাহর সাথে শত্রুতা করা মানে আল্লাহর সাথে যুদ্ধে জড়িয়ে পড়া। আল্লাহর সাথে যুদ্ধে জড়িয়ে পড়া মানেই হলো নিজেকে ধ্বংস করে দেয়া। কেননা যুদ্ধ তো শত্রুদের সাথেই করা হয় মিত্রদের সাথে নয়।

সুতরাং আমাদের উচিত যারা আল্লাহর প্রিয় লোক তাদেরকে ভালবাসা। তাদের সাথে মহব্বত ও ভালবাসা পয়দা করা এবং তাদের সাথে সম্পর্কে সুদৃঢ় করা। চাই তাকে পছন্দ হোক বা না হোক। তার কারণ পছন্দ-অপছন্দ তো আল্লাহর সাথে সম্পর্কিত, বান্দার ইচ্ছার-অনিচ্ছার উপর নয়। রাসূল (সাঃ) এই সম্পর্কিত লোকদেরকে ঈমানদার বলে উল্লেখ করে অন্য এক হাদীসে বলেন :

مَنْ أَحَبَّ لِلَّهِ وَأَبْغَضَ لِلَّهِ وَأَعْطَىٰ لِلَّهِ وَمَنْعَ لِلَّهِ فَقَدْ
اِسْتَكْمَلَ الْإِيْمَانَ-

যে কাউকে ভালবাসলো একমাত্র আল্লাহ তাআলার সন্তুষ্টির জন্যে, আবার কারো সাথে শত্রুতা করলো তাও আল্লাহ তাআলার সন্তুষ্টির জন্যে। কাউকে দান করলো একমাত্র আল্লাহ তাআলার সন্তুষ্টির জন্যে, আবার কাউকে দান করা বন্ধ করে দিলো তাও আল্লাহ তাআলার সন্তুষ্টির জন্যে। সে যেন তার ঈমানকে পরিপূর্ণ করলো। (বুখারী)

অতএব আল্লাহর প্রিয় লোকদেরকে ভালবাসতে হবে। তাদের সাথে কোনো ভাবেই শত্রুতা বা দুশমনি পোষণ করা যাবে না। অপর পক্ষে যারা আল্লাহর অপ্রিয় লোক তাদেরকে যেমন ভালবাসা যাবে না, তেমনি তাদেরকে সাহায্য-সহযোগীতাও করা যাবে না।

এখন আমাদের জানা দরকার যে, আল্লাহর প্রিয় লোক কারা। প্রিয় লোকদের বৈশিষ্ট্য বা গুনাবলীই বা কি? এই সম্পর্কে হাদীসের পরবর্তী অংশে রাসূল

(সাঃ) আল্লাহর প্রিয় লোকদের পরপর সাতটি বৈশিষ্ট্যের কথা উল্লেখ করে বলেন :

এক. **الْأَبْرَارُ** তারা হবে নেককার বা সৎকর্মশীল। আল্লাহর প্রিয় লোক বা বান্দার প্রথম বৈশিষ্ট্য হলো তারা হবে নেককার এবং সৎ কর্মশীল। নেক এবং সৎকর্ম বলতে বুঝায়— আল্লাহ তাআলা যা আদেশ করেছেন তা পুরোপুরিভাবে পালন করা। আর যা তিনি নিষেধ করেছেন তা ত্যাগ করা। অর্থাৎ যতো ভাল ও সৎ কাজ আছে তা করা এবং যতো মন্দ এবং খারাপ কাজ আছে তা থেকে দূরে থাকা, পরহেজ করে চলা।

আমাদের সমাজে অধিকাংশ লোকই সৎআমল বা সৎকর্ম বলতে বুঝে থাকে গুটি কয়েক ইবাদত-বন্দেগী এবং তসবীহ-তাহলীলকে। আসলে এগুলো সৎ কর্মের একটা অংশ। কেবলমাত্র এই গুটি কয়েক কাজই সৎকর্ম নয়। বরং ব্যক্তি, পরিবার, সমাজ, রাজনীতি, অর্থনীতি মোট কথা মানুষের জীবনে যতো বিভাগ আছে সকল ক্ষেত্রে সৎ আ'মল বা সৎ কাজ করাকেই সৎকর্ম বলা হয়। আর যারা এসব সৎ কাজ করে তাদেরকেই বলা হয় সৎকর্মশীল বা নেককার লোক। সুতরাং যখনই কোনো বান্দা আল্লাহর নির্দেশিত প্রতিটি সৎকাজ নিষ্ঠা ও আন্তরিকতার সাথে পালন করে এবং নিষিদ্ধ কাজ পরিহার করে চলে তখনই সে সৎকর্মশীল, নেককার এবং আল্লাহর প্রিয় পাত্র হয়ে যায়।

দুই. **الْأَتْقِيَاءُ** তারা হবে খোদাভীরু। অর্থাৎ আল্লাহর প্রিয় লোক বা পাত্র হবে তারা যারা মুত্তাকী, পরহেযগার, খোদাভীরু। তারা আল্লাহকে হৃদয় দিয়ে এমন ভয় করে যে, মানুষের অগোচরে কোনো অন্যায় বা পাপ কাজ করে না। পাপাচারে জড়িয়ে পড়ে না। আল্লাহর ভয়ে আল্লাহর নির্দেশিত সকল কাজ নিষ্ঠার সাথে পালন করে এবং আল্লাহর নিষিদ্ধ এবং হারাম কাজ থেকে দূরে থাকে। হারাম কাজের ধারে কাছেও যায় না। এমন কি হারামের মধ্যে জড়িয়ে পড়ার ভয়ে অনেক হালাল বা বৈধ জিনিসও পরিহার করে। হযরত ওমরে ফারুক (রাঃ) বলেন : হারামে জড়িয়ে যাবার ভয়ে হালাল জিনিসের দশ ভাগের নয় ভাগই বাদ দিতাম এবং এক ভাগ গ্রহণ করতাম। তাকওয়ার কারণে তারা বৈধ জিনিসের মধ্যে সন্দেহ দেখা দিলে তা ত্যাগ করে। এই সম্পর্কে রাসূল পাক (সাঃ) বলেন : **تُؤْمِنُ مَا يُرِيْبُكَ إِلَىٰ يُرِيْبُكَ** তুমি

সন্দেহযুক্ত জিনিস বর্জন করো এবং সন্দেহবিহীন জিনিস গ্রহণ করো। (আবু দাউদ-আহমদ)

আল্লাহর প্রিয় পাত্র খোদা ভীরা লোকেরা প্রতিটা কাজ তাঁরই সন্তুষ্টি এবং রাজি-খুশির জন্যে করে। কেননা তারা জানে যে, কোনো সৎকাজ লোক দেখানোর উদ্দেশ্যে করলে তা শিরকের মধ্যে গণ্য হবে। এই জন্য তারা কে খুশী হলো আর কে বেজার হলো তার দিকে মোটেই ড্রফেক্ট করে না। আল্লাহর ভয় ও ভক্তিতে তাদের হৃদয় পরিপূর্ণ। তাদের প্রতিটি কাজ ও আ'মল আল্লাহর ভয় ও ভক্তির জন্যেই হয়ে থাকে। আর এই জন্যই তারা আল্লাহর প্রিয় ও ভালবাসার পাত্রে পরিণত হয়ে যায়। সূরা তাওবার ৪ নং বা আয়াতে আল্লাহ পাক বলেন - **إِنَّ اللَّهَ يُحِبُّ الْمُتَّقِينَ** - নিশ্চয়ই আল্লাহ তাআলা মুত্তাকীদেরকে ভালবাসেন। আল্লাহ কি শুধু মুত্তাকীদের ভালবাসেন তাই নয়, বরং তারা তাঁর বন্ধুতে পরিণত হয়ে যায়। সূরা জারিয়ার ১৯ নম্বর আয়াতে মহান আল্লাহ বলেন, **اللَّهُ وَلِيُّ الْمُتَّقِينَ** আল্লাহ মুত্তাকীদের বন্ধু।

রিয়্যা থেকে মুক্ত খোদাভীরা লোকেরা শুধু আল্লাহর প্রিয় পাত্র এবং ভালবাসার বন্ধু হয়ে যায় তা নয়, বরং আল্লাহ তাআলা তাদেরকে মানুষের মধ্যে বিশেষ মর্যাদা দান করেন। আল্লাহ পাক বলেন : **إِنَّ أَكْرَمَكُمْ عِنْدَ اللَّهِ أَتْقَاكُمْ** - নিশ্চয়ই আল্লাহর কাছে সেই সর্বাধিক মর্যাদাশীল যে তোমাদের মধ্যে সর্বাধিক খোদাভীরা।

তিন. **الْأَخْفَاءُ** তারা গোপনে সৎ কাজ করে। অর্থাৎ আল্লাহর প্রিয় লোকেরা গোপনে লোক চক্ষুর অন্তরালে সৎ কাজ করে থাকে। এরা লোক দেখানো কোনো কাজ করে না। তারা লোক দেখানো কাজ মোটেই পছন্দ করে না। আল্লাহকে দেখানো কাজে তাদের অন্তর প্রশান্তি পায়। পক্ষান্তরে মানুষ দেখানো কাজে তাদের অন্তর অশান্তিতে ছটফট করে। মোটেই প্রশান্তি পায় না। তার কারণ তারা জানে যে, লোক দেখানো কাজে 'রিয়্যা' পয়দা হওয়ার সম্ভাবনা রয়েছে। আর সামান্য রিয়্যাও শিরকের মধ্যে গণ্য হয়। আর এই শিরকের গুনাহর কারণে সৎ কাজ করার পরও জাহান্নামে যেতে হবে। জান্নাত ভাগ্যে জুটবে না। মহান আল্লাহর বলেন :

وَمَنْ يُشْرِكْ بِاللَّهِ فَقَدْ حَرَّمَ اللَّهُ عَلَيْهِ الْجَنَّةَ

যে কেউ আল্লাহর সাথে শরীক করবে তার জন্য জান্নাত হারাম হয়ে যাবে।

সুতরাং আল্লাহর প্রিয় লোকেরা লোক চক্ষুর অন্তরালে গোপনে সৎ কাজ করার মাধ্যমেই প্রশান্তি লাভ করে।

চার. الَّذِينَ إِنْ عَابُوا لَمْ يُفْتَقَدُوا। যারা অনুপস্থিত থাকলেও হারিয়ে যায় না। আল্লাহর প্রিয় লোকদের চতুর্থ বৈশিষ্ট্য হলো যদি তারা কোনো সম-াবেশ বা লোকারণ থেকে অনুপস্থিত থাকে অথবা মৃত্যু বরণ করে ইহলোক ত্যাগ করে চলে যায়, তবুও তারা মানুষের স্মৃতি থেকে হারিয়ে যায় না, বরং সকলের মাঝে বিরাজমান থাকে। এর কারণ হলো আল্লাহর প্রিয় বান্দারা এমন রিয়ামুক্ত নীরব আ'মল করে, তাদের আচার-আচরণ এবং ব্যবহারিক জিন্দেগী এতো উত্তম এবং স্মৃতিময় যে, তারা মানুষের অন্তরের অন্তরস্থলে স্থান করে নেয়।

তাদের আ'মল বা কার্যক্রম মানুষের মাঝে এমন আকর্ষণ পয়দা করে যে, মানুষ তাদের অনুপস্থিতিতেও তাদের স্মৃতিময় জীবনকে ভুলতে পারে না। মানুষ তাদের অগোচরে তাদের স্মরণ করে এবং সুনাম-সুখ্যাতি বর্ণনা করতে থাকে। সুতরাং এসব রিয়ামুক্ত, নিরহংকারী ব্যক্তির যেরূপ মানুষের প্রিয় পাত্র হয়ে অন্তরে স্থান করে নেয়, তেমনি আল্লাহ তাআলারও প্রিয় লোকে পরিণত হয়ে যায়।

পাঁচ. وَإِنْ حَضَرُوا لَمْ يُعْرَفُوا। এবং তারা সবার মাঝে বিরাজমান থাকলেও নিজেদেরকে প্রকাশ করে না। অর্থাৎ তারা আত্ম পরিচয়ের মাধ্যমে আত্মতৃপ্তি লাভ করে না। সমাজে অনেকে এমন আছে যারা নিজেকে জাহির বা প্রকাশ করার জন্য চেষ্টা-প্রচেষ্টা এবং বিভিন্ন প্রকার পথ ও পন্থা অবলম্বন করে থাকে। মানুষের মাঝে নিজেকে প্রকাশ বা পরিচিতি করতে পারলে তারা আত্মতৃপ্তি বোধ করে। আর যদি নিজেকে প্রকাশ করতে না পারে তাহলে মনটা বেজার হয়ে যায়। এটা একটা মস্তবড় রোগ। রাজনৈতিক এবং সামাজিক দায়িত্ব পালন করতে গিয়ে যেসব কাজে মানুষের দৃষ্টি আকর্ষিত হয় অথবা নিজে পরিচিত হওয়া যায় সেইসব কাজে বেশী আগ্রহী হয় এবং চেষ্টা-

তদবীরও চালায়। এমনকি ইসলামী আন্দোলন করার পরেও আন্দোলনের নেতা-কর্মীদের মধ্যে কারো কারো এ ধরনের রোগ দেখা যায়। অথচ আল্লাহর প্রিয় বান্দা তারাই যারা মানুষের সাথে চলা-ফেরা উঠা-বসার পরেও নিজেকে জাহির করার জন্য চেষ্টা-ফিকির করে না। সামাজিক, রাজনৈতিক এবং দ্বীনের কাজ করার পরও তারা অপরিচিত থেকে যায়। কেননা তারা জানে যে লোক দেখানো কাজ বা নিজেকে বেশী জাহির করার কাজের মধ্যে রিয়া পয়দা হয় এবং রিয়া শিরকের মধ্যে গণ্য হয়ে জাহান্নামে নিয়ে যায়। তবে এটা নয় যে, তারা সবার মাঝে বিরাজ করে অথচ কাজ করে না। আসলে এটা নয়, তারা দ্বীনের কাজ করে তবে নীরবে কাজ করে। তারা লোকচক্ষুর অন্তরালে কাজ করে এই জন্য যে, তার কাজের কারণে মানুষ তার সামনে সুনাম-সুখ্যাতি বর্ণনা করবে আর এতে তারা অন্তরে অহমিকা পয়দা হয়ে বিপথগামী হবে। এই জন্য তারা কাজ করে কিন্তু অপরিচিত থেকে যায়। তবে মৃত্যুর পর মানুষ টের পায় তাদের অনুপস্থিতির অভাব। সুতরাং আল্লাহর প্রিয় লোক তারাই যারা মানুষের মধ্যে বিরাজমান থেকে কাজ করার পরও নিজেকে অপরিচিত রেখে দেয়। অতএব দ্বীনের কাজ এবং সামাজিক কাজ খুব সতর্কতার সাথে করা, যাতে মানুষের প্রশংসার পাত্রে পরিণত হয়ে না যায়। তাদের উদ্দেশ্য একমাত্র আল্লাহকে দেখানো এবং আল্লাহর সন্তুষ্টি অর্জন করা, আল্লাহর প্রিয় পাত্রে পরিণত হওয়া।

হয়. قُلُوْا بِهِمْ مَّصَابِيْحُ الْهُدٰٓءِ তাদের অন্তর হেদায়েতের মশাল স্বরূপ।

আল্লাহর প্রিয় লোকদের ষষ্ঠ গুন হলো তাদের কলব বা অন্তর হেদায়েতের মশাল বা আলোকস্বরূপ। মশাল যেমন কোনো অন্ধকার পথকে আলোকিত করে মানুষকে পথ দেখার বা পথ চলার জন্য সাহায্য করে। তেমনি আল্লাহর নেককার এবং প্রিয় বান্দাদের অন্তর এতো পরিচ্ছন্ন ও উজ্জ্বল এবং রিয়ামুক্ত যে, তাদের এই পবিত্র এবং পরিচ্ছন্ন অন্তর বিপথগামী মানুষকে জাহেলী পথ থেকে মশালের মতো হেদায়াতের পথ দেখিয়ে সঠিক গন্তব্যে পৌঁছিয়ে দেয়।

সাত. يُخْرِجُوْنَ مِنْ كُلِّ غَبْرَءٍ مُّظْلِمَةٍ তারা কোনো অন্ধকারাচ্ছন্ন

নির্জন প্রান্তর থেকেও বেরিয়ে আসে। হাদীসের আল্লাহর প্রিয় বান্দাদের সপ্তম এবং সর্বশেষ যে বৈশিষ্ট্যের কথা আল্লাহর রাসূল (সাঃ) বলেছেন তা হলো, যারা কোনো অন্ধকারাচ্ছন্ন নির্জন নিরিবিলি স্থান থেকেও বেরিয়ে আসে। অর্থাৎ তারা

দূর্গম ও নির্জন স্থানে বসবাস করে। এই জন্য যে, তারা দুনিয়াতে খ্যাতি অর্জন ও রিয়া থেকে বাঁচতে চায়। মানুষের মধ্যে থাকলে বেশী পরিচিতি হয়ে যাবে, সুনাম-সুখ্যাতি অর্জনের মাধ্যমে দুনিয়ার মোহে দুনিয়াদারীতে ঝুঁকে পড়বে এবং রিয়া বা লোক দেখানো কাজের মাধ্যমে শিরকের মধ্যে লিপ্ত হয়ে জাহান্নামে চলে যাবে এই ভয়ের জন্যই তারা প্রয়োজনে লোকচক্ষুর সামনে থেকে দূর্গম, নির্জন স্থানে চলে যায়। এর মানে এই নয় যে, তারা সমাজ থেকে দূরে চলে যায় বা সমাজচ্যুত থাকে। তার কারণ সমাজ থেকে দূরে থাকা ইসলামের কাজ নয়। সমাজের মধ্যে থেকেই দ্বীন পালন করতে হবে। কেননা সমাজে উঠা-বসা করা এবং সমাজ পরিচালনা করাও একটা দ্বীনের কাজ। তাদের উদ্দেশ্য সমাজ থেকে দূরে থাকা বা বিচ্ছিন্ন থাকা নয়, বরং আল্লাহর ভয়ে রিয়া থেকে মুক্ত থাকার জন্যই তাদের এই মানসিকতা এবং এই অভ্যাস। কেননা যাদের মধ্যে এই মানসিকতা থাকে তারাই আল্লাহর প্রিয় লোকের মধ্যে গণ্য হয়।

প্রিয় ভায়েরা/বোনেরা! হযরত মুয়া'জ (রাঃ) রাসূলের কবরের ধারে বসে যে জন্য কাঁদছিলেন তা ছিলো রাসূলের সেই হাদীস মনে পড়ে যেখানে তিনি রিয়া বা লোক দেখানো কাজের কথা বলেছেন। আর সামান্য পরিমাণ রিয়াকেও তিনি শিরকের মধ্যে গণ্য করেছেন। আর শিরক তো আল্লাহর বিরাগভাজন হয়ে জাহান্নামে পৌঁছে দেয়। সুতরাং তিনি সেখানে বসে কাঁনাকাটি করছিলেন একমাত্র জাহান্নামের শাস্তির ভয়ে। কেননা আল্লাহ তাআলা শিরক কারীদের জন্য জান্নাতে যাওয়া নিষিদ্ধ করে দিয়েছেন। মহান আল্লাহ বলেন-

وَمَنْ يُشْرِكْ بِاللَّهِ فَقَدْ حَرَّمَ اللَّهُ عَلَيْهِ الْجَنَّةَ

যে কেউ আল্লাহর সাথে শিরক করে আল্লাহ তার জন্য জান্নাত হারাম করে দিয়েছেন। অন্য এক হাদীসে আল্লাহর রাসূল (সাঃ) বলেন : “বিচারের দিন-হাশরের ময়দানে বান্দা তার গোনাহর ডালি নিয়ে আল্লাহর দরবারে হাজির হবে। আল্লাহ দয়া করে বান্দার অন্যান্য গোনাহ মাফ করে দিলেও তিনি শিরকের গোনাহ মাফ করবেন না”। কেননা শিরক হলো আল্লাহর উপর যুলুম।

সূরা লোকমানে মহান আল্লাহ বলেন- ان شرک لظلم عظیم নিশ্চয় শিরক হলো মস্তবড় যুলুম।

দরসের জন্য পঠিত হাদীসে রিয়া বা লোক দেখানো কাজকে শিরকের মধ্যে

গণ্য করা হয়েছে। আর কোন্ আ'মল বা কাজের দ্বারা রিয়া থেকে মুক্ত থাকা যায় তারও উল্লেখ করা হয়েছে। আর রিয়ামুক্ত আ'মলের অধিকারী ব্যক্তিদেরকে আল্লাহর প্রিয় লোক হিসেবে গণ্য করা হয়েছে। এবং রিয়ামুক্ত এসব গুণের অধিকারী আল্লাহর প্রিয় লোকদের সাথে শত্রুতা করতে বারন করা হয়েছে। তার কারণ হলো, আল্লাহর প্রিয় লোকদের সাথে শত্রুতা করা মানে হলো আল্লাহর সাথে যুদ্ধে লিপ্ত হওয়া। আর আল্লাহর সাথে যুদ্ধে লিপ্ত হওয়া মানেই হলো নিজেকে ধ্বংস করা। সুতরাং আমাদেরকে এসব ব্যাপারে অবশ্যই সতর্ক সাবধান থাকতে হবে।

শিক্ষা : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটির যে ব্যাখ্যা পেশ করা হলো এতে আমাদের জন্য যেসব শিক্ষণীয় রয়েছে তা হলো—

✱ সৎ আ'মল করতে যেয়ে অন্তরে সামান্য পরিমাণ রিয়াও যেন সৃষ্টি না হয় সেই ব্যাপারে সদা-সর্বদা সতর্ক সাবধান থাকতে হবে। বিশেষ করে যারা সামাজিক এবং রাষ্ট্রীয় দায়িত্ব পালন করেন তাদেরকে বেশী সতর্ক থাকতে হবে। কেননা সামান্য পরিমাণ রিয়া বা লোক দেখানো কাজও শিরকের মধ্যে গণ্য হবে।

✱ নেক্কার, সৎ কর্মশীল আল্লাহর প্রিয়ভাজন লোকদের সাথে শত্রুতা তো করা যাবেই না, শত্রুতার মনোভাবও পোষণ করা যাবে না। তার কারণ, আল্লাহর প্রিয় ভাজন লোকদের সাথে শত্রুতা করা মানে হলো আল্লাহর সাথে যুদ্ধে লিপ্ত হওয়া।

✱ আল্লাহর প্রিয় ভাজন হতে হলে নেক্কার, সৎ আ'মলকারী সৎকর্মশীল হতে হবে। আল্লাহর নির্দেশিত সকল কাজ আন্তরিকতার সাথে পালন করতে হবে এবং সকল হারাম নিষিদ্ধ কাজ থেকে দূরে থাকতে হবে। তাই তা ব্যক্তিগত হোক, পরিবারক হোক, সামাজিক হোক অথবা রাজনৈতিক হোক প্রতিটি কাজের মধ্যে সততার পরিচয় দিতে হবে। মিথ্যাচারিতা, ধোকাবাজি এবং প্রতারণার সকল পথকে বর্জন করতে হবে।

✱ তাকওয়াবান বা খোদাভীরু হতে হবে। সকল কাজে এবং সকল অবস্থায় আল্লাহর ভয় অন্তরে রাখতে হবে। আল্লাহর ভয় এবং ভক্তিতে মন-দেলকে পরিপূর্ণ করতে হবে।

✱ লোক দেখানো কাজ থেকে দূরে থাকতে হবে। তবে হ্যাঁ অনেক সৎ কাজ আছে যা মানুষের অগোচরে করা সম্ভব নয়। এই ক্ষেত্রে মানুসিকতা এই থাকতে

হবে যে, মানুষ দেখলে দেখুক এতে কোনো পরওয়া নেই তবে এই কাজটা একমাত্র আল্লাহর সন্তুষ্টির জন্যই হতে হবে। বেশী বেশী আল্লাহর দিকে খেয়াল রাখতে হবে। আর যেসব কাজ গোপনে করা যায় তা বেশী বেশী করার চেষ্টা করতে হবে। তাহলে রিয়া থেকে মুক্ত থাকা যাবে।

✱ এমন নিরহংকারী, সৎ আ'মলধারী হতে হবে। যাতে মানুষের অগোচরে বা চক্ষুর আড়ালে চলে যায় তবুও যেন মানুষ তাকে অন্তরে স্থান করে। মানুষের স্মৃতি থেকে বিলীন হয়ে না যায়। মানুষের মনের মধ্যে স্থান করে নেয়। আর মনের মানুষ তখনই হওয়া যায়, যখন কাজের মধ্যে কোনো রিয়া থাকে না। অহংকার এবং দাঙ্কিতা থাকে না। মানুষের সামনে আ'মলের প্রচার এবং বড়াই করে না।

✱ মানুষ বা সমাজের মধ্য থেকেই সৎ কাজ করতে হবে। তবে নীরব ভাবে কাজ করে যেতে হবে। কাজের থেকে কাজের বিজ্ঞাপন, প্রচার-প্রপাগান্ডা বেশী হবে না। ফোকাসিং কাজের প্রতি বেশী আগ্রহী হওয়া যাবে না। এমন নীরব ভাবে দ্বীনের কাজ করে যেতে হবে যা আল্লাহর কাছে অতি প্রিয় হবে কিন্তু মানুষের কাছে বেশী পরিচিত হবে না। বরং মানুষের মধ্যে অপরিচিত থেকে যাবে। খ্যাতি ও সুনাম অর্জন করার জন্য চেষ্টা করবে না।

✱ অন্তরকে এমন ভাবে তৈরী করতে হবে যা মশালের মতো মানুষকে সঠিক পথ বাতালিয়ে দেবে। মানুষের অন্তর তখনই মশালস্বরূপ আলোকবর্তিকা হবে যখন তার অন্তর নিরাহংকারী এবং স্বার্থ মুক্ত হবে।

✱ সামাজিক খ্যাতি অর্জন এবং রিয়া বা লোক দেখানো কাজ থেকে বাঁচার জন্য মাঝে মাঝে লোকচক্ষুর অন্তরালে নির্জন স্থানে চলে যেতে হবে। মন বা অন্তরকে পবিত্র পরিশুদ্ধ করতে হবে। তবে সমাজচ্যুত বৈরাগী হওয়া যাবে না। বরং রিয়ার মতো বড় অপরাধ থেকে বাঁচার জন্য প্রয়োজনে মাঝে মধ্যে এই পথ অবলম্বন করতে হবে।

আহবান : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটির যে ব্যাখ্যা বিশ্লেষণ করা হলো এতে যদি আমার অজান্তে এবং অজ্ঞাতে কোনো ভুল-ত্রুটি হয়ে যায় তার জন্য মহান আল্লাহর কাছে ক্ষমা চেয়ে নিচ্ছি। আর হাদীস থেকে যেসব মূল্যবান শিক্ষা লাভ করলাম তা যেন আমরা বাস্তব জীবনে আ'মল করতে পারি সেই তৌফিক কামনা করে দারস শেষ করছি।
মাআসসালাম।

আট

আল্লাহ পাকের মহত্ব

نَحْمَدُهُ وَنُصَلِّي عَلَى رَسُولِهِ الْكَرِيمِ

بِسْمِ اللَّهِ الرَّحْمَنِ الرَّحِيمِ

وَعَنْ أَبِي ذَرٍّ عَنِ النَّبِيِّ صَلَّى اللَّهُ عَلَيْهِ وَسَلَّمَ، فِيمَا
رَوَى عَنِ اللَّهِ تَبَارَكَ وَتَعَالَى أَنَّهُ قَالَ، يَا عِبَادِي! إِنِّي
خَرَمْتُ الظُّلْمَ عَلَى نَفْسِي وَجَعَلْتُهُ بَيْنَكُمْ مُحَرَّمًا، فَلَا
تَظَالَمُوا يَا عِبَادِي! كُلُّكُمْ ضَالٌّ إِلَّا مَنْ هَدَيْتُهُ،
فَاسْتَهْدُونِي أَهْدِكُمْ يَا عِبَادِي! كُلُّكُمْ جَائِعٌ إِلَّا مَنْ
أَطْعَمْتُهُ، فَاسْتَطْعِمُونِي أَطْعِمَكُمْ يَا عِبَادِي! كُلُّكُمْ عَارٍ
إِلَّا مَنْ كَسَوْتُهُ فَاسْتَكَسُونِي اكْسُكُمْ يَا عِبَادِي! إِنَّكُمْ
تُخْطِئُونَ بِاللَّيْلِ وَالنَّهَارِ، وَأَنَا أَغْفِرُ الذُّنُوبَ جَمِيعًا.
فَاسْتَغْفِرُونِي أَغْفِرْ لَكُمْ يَا عِبَادِي! إِنَّكُمْ لَنْ تَبْلُغُوا
ضُرِّي فَتَضَرُّوْنِي وَلَنْ تَبْلُغُوا نَفْعِي فَتَنْفَعُونِي. يَا
عِبَادِي! لَوْ أَنَّ أَوْلَكُمْ وَأَخْرَكُمْ وَأَنْسَكُمْ وَجَنَّتْكُمْ - كَانُوا
عَلَى اتَّقَى قَلْبِ رَجُلٍ وَاحِدٍ مِنْكُمْ مَا زَادَ ذَلِكَ فِي
مُلْكِي شَيْئًا، يَا عِبَادِي! لَوْ أَنَّ أَوْلَكُمْ وَأَخْرَكُمْ وَأَنْسَكُمْ
وَجَنَّتْكُمْ كَانُوا عَلَى أَفْجَرِ قَلْبِ رَجُلٍ وَاحِدٍ. مَا نَقُصَ
ذَلِكَ مِنْ مُلْكِي شَيْئًا. يَا عِبَادِي! لَوْ أَنَّ أَوْلَكُمْ

وَ أَخْرَجَكُمْ وَأَنْسَكُمْ وَ جَنَكُمْ، قَامُوا فِي صَعِيدٍ وَاحِدٍ
فَسَأَلُونِي، فَأَعْطَيْتُ كُلَّ إِنْسَانٍ مَسْأَلَتَهُ، مَا نَقَصَ
ذَلِكَ مِنِّي عِنْدِي إِلَّا كَمَا يَنْقُصُ الْمِخْيَطُ إِذَا أَدْخِلَ
الْبَحْرَ- يَا عَبَادِي! إِنَّمَا هِيَ أَعْمَالُكُمْ أُحْصِيهَا لَكُمْ-
ثُمَّ أَوْفِّيَكُمْ بِهَا- فَمَنْ وَجَدَ خَيْرًا فَلْيَحْمَدِ اللَّهَ- وَمَنْ
وَجَدَ غَيْرَ ذَلِكَ فَلَا يُلُومَنِي إِلَّا نَفْسَهُ (رَوَاهُ مُسْلِمٌ)

অনুবাদ : হযরত আবু যর (রাঃ) নবী সাল্লাল্লাহু আলাইহি ওয়াসাল্লাম থেকে এবং তিনি বরকতময় মহান আল্লাহ তা'আলা হতে বর্ণনা করেছেন। আল্লাহ তা'আলা বলেন : হে আমার বান্দারা! আমি যুলুম করাকে আমার উপর হারাম করে নিয়েছি এবং তোমাদের পরস্পরের জন্যেও তা হারাম করে দিয়েছি। কাজেই তোমরা একে অপরের প্রতি যুলুম করো না।

হে আমার বান্দারা! আমি যাদেরকে হেদায়াত করেছি, তারা ছাড়া তোমরা সবাই বিপথগামী। সুতরাং তোমরা আমার কাছে হেদায়াত চাও, আমি তোমাদেরকে হেদায়াত দান করবো।

হে আমার বান্দারা! আমি যাদেরকে খাবার দিয়েছি, তারা ছাড়া তোমরা সবাই ক্ষুধার্ত। সুতরাং আমার কাছে খাবার চাও, আমি তোমাদেরকে খাবার দেব।

হে আমার বান্দারা! আমি যাদেরকে বস্ত্র দিয়েছি, তারা ছাড়া তোমরা সবাই বস্ত্রহীন। সুতরাং আমার কাছে বস্ত্র চাও, আমি তোমাদেরকে বস্ত্র দান করবো।

হে আমার বান্দারা! তোমরা রাত-দিন পাপে লিপ্ত। আমি সমস্ত পাপ ক্ষমা করে থাকি। সুতরাং তোমরা আমার কাছে ক্ষমা চাও, আমি তোমাদেরকে ক্ষমা করে দেব।

হে আমার বান্দারা! আমার কোনো ক্ষতি করার সাধ্য তোমাদের নেই।
আমার কোনো উপকার করার সামর্থ্যও তোমাদের নেই।

হে আমার বান্দারা! তোমাদের পূর্বের ও পরের সকল মানুষ ও জিন যদি
তোমাদের মধ্যকার সবচাইতে মুত্তাকী ব্যক্তির ন্যায় আল্লাহ্‌র হৃদয়ের
অধিকারী হয়ে যায়, তাতেও আমার সাম্রাজ্যের মর্যাদা বিন্দুমাত্রও বৃদ্ধি পাবে
না।

হে আমার বান্দারা! তোমাদের পূর্বের ও পরের সকল মানুষ ও জিন যদি
তোমাদের মধ্যকার সবচাইতে পাপিষ্ট ব্যক্তির ন্যায় পাপিষ্ট হৃদয়ের
অধিকারী হয়ে যায়, তাতেও আমার সাম্রাজ্যের কোনো প্রকার ঘাটতি হবে
না।

হে আমার বান্দারা! তোমাদের পূর্বের ও পরের সকল মানুষ ও জিন যদি
কোথাও একত্র হয়ে আমার কাছে চায়, আর আমি তাদের প্রত্যেকের চাহিদা
অনুযায়ী দান করি, তবে আমার ভান্ডার থেকে কেবল ততটুকুই কমবে,
যতটুকু একটি সূচ সাগরে ডুবিয়ে তুললে সাগরের পানি কমবে।

হে আমার বান্দারা! তোমাদের আ'মলসমূহ আমি তোমাদের জন্য সংরক্ষণ
করে রাখি। অতঃপর তোমাদের তার পূর্ণ বিনিময় দান করবো। সুতরাং যে
কল্যাণ লাভ করবে, সে যেন আল্লাহর শোকর আদায় করে। আর যে অন্য
কিছু পাবে, সে যেন এজন্য নিজেই তিরস্কার করে। (মুসলিম শরীফ)

বিশেষ বিশেষ শব্দার্থ : عَنْ -থেকে বা হতে। -অতঃপর উহা হতে। -

إِنِّي -নিশ্চয়। -আমার বান্দারা। عِبَادِي -হে বা ওহে। يَا -বর্ণনা। رَأَى

আমি। عَلَى -যুলুম, অত্যাচার। حَرَّمَ -হারাম করে নিয়েছি।

أَعْلَى -উপর। نَفْسِي -আমার জীবন। وَجَعَلْتُهُ -এবং উহা করে দিয়েছি।

بَيْنَكُمْ -তোমাদের পরস্পরের মধ্যে। -অতএব তোমরা

যুলুম করো না। كَلِمَتُكُمْ -তোমাদের প্রত্যেকে। ضَالٌّ -বিপথগামী। آتَى -ছাড়া,

ব্যতীত। مَنْ -যে বা যাকে। هَدَيْتُهُ -আমি তাদের (যাদের) হেদায়েত

করেছি। فَاسْتَهْتُونِي - অতএব আমার কাছে হেদায়াত চাও।

جَائِع - ভুখা বা ক্ষুধার্ত। - اِهْدِكُمْ - আমি তোমাদের হেদায়াত দান করবো।

فَاسْتَطْعِمُونِي - আমি তাদের (যাদের) খাবার দিয়েছি। اَطْعِمْتُهُ

- অতএব আমার কাছে খাবার চাও। اَطْعِمْكُم - আমি তোমাদের খাবার

দেব। عَارٍ - বস্ত্রহীন, ল্যাংটা। كَسَوْتُهُ - আমি তাদের (যাদের) পোশাক

দিয়েছি। اَكْسَكُم - অতএব আমার কাছে পোশাক চাও। فَاسْتَكْسَوْنِي

- আমি তোমাদের পোশাক দেব। اِنَّكُمْ - নিশ্চয় তোমরা।

وَاللَّيْلِ - রাত। الَّيْلِ - সহিত বা সাথে। بِا - তোমরা পাপে লিপ্ত। تَخْطِئُونَ

الدُّنُوبَ - ক্ষমা করি। اَغْفِرُ - আমি। اَنَا - দিন। النَّهَارِ - এবং

- পাপসমূহ। جَمِيعًا - সমস্ত। فَاسْتَغْفِرُونِي - অতএব আমার কাছে ক্ষমা

চাও। اَغْفِرْ لَكُمْ - আমি তোমাদের ক্ষমা করবো।

لَنْ تَبْلُغُوا - তোমাদের সাধ্য নেই। ضَرَرِي - আমার ক্ষতি করার।

اَخْرَجْتُكُمْ - তোমাদের পূর্বের। اَوْ لَكُمْ - যদি। لَوْ - আমার উপকার। نَفْعِي

- এবং وَجِئْتُكُمْ - তোমাদের সব মানুষ। اِنْسَكُمْ - তোমাদের পরের।

اَتَّقِي - আল্লাহ্। اَتَّقِي - উপর। اَلَى - হয়ে যায়। كَانُوا - তোমাদের সব জিন।

مِنْكُمْ - তোমাদের। اَحَدٍ - এক। وَاحِدٍ - ব্যক্তি। رَجُلٍ - অন্তর। قَلْبٍ - ভীরা।

اَمَّا فِي مَالِكِي - আমার সাম-। مَالِكِي - বৃদ্ধি পাবে না বা করবে না। مَا زَادَ -

مَا نَقَصَ - ক্ষতি বা। اَفْجَرٍ - পাপিষ্ঠ। شَيْئًا - কোনো কিছু।

قَامُوا فِي صَعِيدٍ وَاحِدٍ - কোনো এক যায়গায়।

فَاَعْطَيْتُ - অতপর আমার কাছে চায়। فَسَالُونِي - একত্রিত হয়।

-অতপর আমি তাদের দেই বা দান করি। كُلِّ إِنْسَانٍ -প্রত্যেক মানুষের।
 -তাদের চাহিদা মতো। مَا نَقْصُ -ক্ষতি বা ঘাটতি হবে না।
 كَمَا يَنْقُصُ -আমার কাছ থেকে। لَا -ছাড়া বা ব্যতীত। عِنْدِي -
 -ততোটুকু কমবে। السُّحُطُ -সূচ। إِذَا -যখন। اَدْخَلَ الْبَحْرَ -সমুদ্রে
 প্রবেশ করায়। أَحْصِيهَا -আমি সংরক্ষণ করে রাখি।
 -তোমাদের জন্য। لَكُمْ -তোমাদের। ثُمَّ -অতঃপর।
 -অতএব যে তার বিনিময় দান করবো। أَيَّاهَا -তার পূর্ণরূপে।
 -অতঃপর সে যেন লাভ করবে বা পাবে। فَلَیَحْمَدِ اللّٰهَ -কল্যাণ।
 -অন্যকিছু। غَيْرَ ذَلِكَ -অতঃপর সে তিরস্কার করে না।
 -অতঃপর সে তিরস্কার করে না। فَلَا يَلُومَنَّ -নিজেকে
 ছাড়া।

সম্বোধন : প্রিয় ভায়েরা/বোনেরা! আমি আপনাদের সামনে দারসে হাদীস পেশ করার জন্য বিশিষ্ট সাহাবী ও রাবী হযরত আবুযর গিফারী (রাঃ) এর বর্ণিত হাদীসটা পাঠ ও অনুবাদ করেছি। আল্লাহ্ পাক যেন আমাকে আপনাদের সামনে হাদীসটার সঠিক ব্যাখ্যা এবং শিক্ষা তুলে ধরার তাওফীক দান করেন।

রাবী বা বর্ণনাকারীর পরিচয় : রাবী হযরত আবুযর গিফারী (রাঃ) এর সংক্ষিপ্ত পরিচয় পাঁচ নম্বর হাদীসে দেখুন।

হাদীসটা বর্ণনার সময়কাল : হাদীসটা বর্ণনার সময়কাল সম্পর্কে আমাদের কাছে নির্দিষ্ট কোনো তথ্য নেই। তার পরও হাদীসটার বিষয়বস্তু দেখে অনুমান করা যায় যে, হাদীসটা সম্ভবতঃ মহানবী (সাঃ) মাক্কী জিন্দেগীতে বর্ণনা করেছিলেন। কেননা হাদীসে আল্লাহ্র মহত্ব সম্পর্কে আলোচনা করা হয়েছে। যা রাসূলুল্লাহ্ (সাঃ) মাক্কী জীবনে বেশী বেশী গুরুত্বের সাথে বর্ণনা করতেন। আল কুরআনের আয়াত এবং সূরা গুলোও আল্লাহ্র একত্ববাদ এবং মহত্ব সম্পর্কে মাক্কী জীবনে নাযিল হয়। এছাড়া রাবী আবু যর গিফারী (রাঃ)ও

ইসলাম কবুলকারী সাহাবীদের মধ্যে প্রথম দিকের সাহাবীদের অন্তর্ভুক্ত। তারপরও আল্লাহ পাকই বেশী ভাল জানেন।

হাদীসটা গ্রহণকারী কেতাবের পরিচয় : হাদীসের মুহাদ্দীস ইমাম মুসলিম (রঃ) এর সংকলিত কিতাব ‘মুসলিম শরীফ’ সিহাহ্ সিভাহ্ বা বিশুদ্ধ ছয়টি হাদীস গ্রন্থের মধ্যে প্রথম শ্রেণীভুক্ত। বুখারী শরীফের পরই এই কিতাবের স্থান। কোনো কোনো মুহাদ্দীস মুসলিম শরীফকে কিছু কিছু বৈশিষ্টের কারণে বুখারীর উপরও স্থান দিয়েছেন। সহীহ্ হাদীসের অধিকাংশ হাদীস বুখারী এবং মুসলিম উভয়ে তাদের আপন আপন কিতাবে সন্নিবেশিত করেছেন। আর যেই হাদীসের ব্যাপারে তারা উভয়ে একমত হয়েছেন, হাদীসের পরিভাষায় তাকে “মুত্তাফাকুন আলাইহ্” বলা হয়। বর্ণিত হাদীসটা ইমাম মুসলিম (রঃ) এককভাবে তাঁর কিতাব মুসলিম শরীফে গ্রহণ করেছেন। সুতরাং ধরে নেয়া যায় হাদীসটা সহীহ্ বিশুদ্ধ।

ব্যাখ্যা : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসটার প্রয়োজনীয় প্রাথমিক তথ্য প্রদান করা হলো। এখন নিম্নে হাদীসটার ব্যাখ্যা পেশ করছি :

عَنْ أَبِي ذَرٍّ عَنِ النَّبِيِّ صَلَّى اللَّهُ عَلَيْهِ وَسَلَّمَ؛ فِيمَا رَوَى عَنِ اللَّهِ تَبَارَكَ وَتَعَالَى

হযরত আবু যর (রাঃ) নবী করীম (সাঃ) থেকে এবং তিনি বরকতময় মহান আল্লাহ তাআ’লা হতে বর্ণনা করেছেন।

রাবীর উপরোক্ত বর্ণনার বাচনভঙ্গী থেকে বুঝা যায়, হাদীসটা রাসূলুল্লাহ (সাঃ) আল্লাহর কথা তাঁর যবান দিয়ে বর্ণনা করেছেন। হাদীসের পরিভাষায় একে হাদীসে কুদুসী বলা হয়। কেননা হাদীসের পরবর্তী বাক্য أَنَّهُ قَالَ ‘তিনি (আল্লাহ) বলেন’, বলে হাদীসের মূল এবারত বা মূল বক্তব্যে আল্লাহ তাবারাকওয়া তাআ’লার কথা বর্ণনা করা হয়েছে। পরবর্তী বাক্যগুলো দ্বারা আল্লাহ তাআ’লা তাঁর নিজের মহত্ত্ব বড়ত্ব এবং অসীম ক্ষমতার কথা বলেছেন। অত্র হাদীসে আল্লাহ তাআ’লা প্রায় দশবার তাঁর বান্দাদের ডেকে ডেকে তাদেরকে কিছু নির্দেশ এবং তাদের ক্ষমতার সীমাবদ্ধতা এবং নিজের মহত্ত্ব ও

বড়ত্বের কথা বর্ণনা করেছেন। আল্লাহ্‌পাক তাঁর মহত্বের কথা বান্দাদের সম্বোধন করে বলেন :

প্রথম মহত্ব :

يَا عِبَادِي ! إِنِّي حَرَّمْتُ الظُّلْمَ عَلَى نَفْسِي وَجَعَلْتُهُ
بَيْنَكُمْ مُحَرَّمًا فَلَا تَظَالُمُوا

হে আমার বান্দারা! আমি যুলুম করাকে আমার উপর হারাম করে নিয়েছি এবং তোমাদের পরস্পরের জন্যও তা হারাম করে দিয়েছি। কাজেই তোমরা একে অপরের উপর যুলুম করো না।

হাদীসের এই প্রথম মহত্বে এবং নির্দেশে আল্লাহ্‌ পাক যুলুম অত্যাচার করাকে তিনি নিজের জন্য হারাম করে নিয়েছেন। অর্থাৎ তিনি তাঁর কোনো বান্দার প্রতি যুলুম করেন না। যুলুম করাকে তিনি পছন্দ করেন না। যুলুম মানেই হলো বান্দার যা হক বা প্রাপ্য তা না দেয়া। অর্থাৎ আল্লাহ্‌ কোনো বান্দাহকে দুনিয়া এবং আখেরাতে সুখ-শান্তি দিয়ে থাকেন তা তাদের আ'মলের প্রাপ্য অনুযায়ীই দিয়ে থাকেন। আর যাদের তিনি দুনিয়ায় গযব-আযাব এবং আখেরাতে শাস্তি দিয়ে থাকেন তাও তাদের আ'মলের প্রতিফল হিসেবেই দিয়ে থাকেন। সুতরাং তিনি যদি ভাল কল্যাণকর এবং সৎ কাজের প্রাপ্য হিসেবে প্রতিদান না দেন এবং অন্যায়, অকল্যাণকর এবং অসৎ কাজের প্রতিফল হিসেবে শাস্তি না দেন তাহলেই তা হবে বান্দার উপর যুলুম। কেননা আল্লাহ্‌ দুনিয়াতে প্রতিফল হিসেবে তাদেরকে যে শাস্তি দেন তা বান্দাদের নিজ হাতে অর্জিত ফল। মহান আল্লাহ্‌ বলেন :

ظَهَرَ الْفَسَادُ فِي الْبَرِّ وَالْبَحْرِ بِمَا كَسَبَتْ أَيْدِي النَّاسِ (সূরা রুম-৪০) অতএব তিনি যেসব আযাব-গযব এবং শাস্তি দেন এটা তার পক্ষ থেকে যুলুম নয়। বরং তিনি তো বান্দার অসংখ্য অপরাধ তার দয়ার কারণে প্রতিনিয়ত ক্ষমা করে যাচ্ছেন। আল্লাহ্‌ যেহেতু তাঁর বান্দাহদের প্রতি সামান্যতমও যুলুম করেন না, ফলে তিনি তাঁর বান্দাদেরকেও ডেকে নির্দেশ দিচ্ছেন, তোমরাও একে অপরের প্রতি যুলুম করবে না। যুলুমকে প্রশ্রয় দেবে না।

কেননা আমার মতো তোমাদের উপরও যুলুম করাকে হারাম করে দিয়েছি যারা যুলুম করে তাদেরকে যালেম বা অত্যাচারী বলা হয়। রাসূলুল্লাহ (সাঃ) অন্য এক হাদীসে যালেম এবং মাযলুম উভয়কে সাহায্যের কথা বলে বলেন :

أَنْصُرْ أَخَاكَ ظَالِمًا أَوْ مَظْلُومًا إِنَّ يَكُ ظَالِمًا فَارُدَّهُ
مِنْ ظُلْمِهِ وَإِنْ يَكُ مَظْلُومًا فَانصُرْهُ-

তুমি তোমার (মুসলিম) ভাইকে সাহায্য করো (চাই) সে যালেম(অত্যাচারী) হোক অথবা মাযলুম (অত্যাচারিত) হোক। যদি সে যালেম হয় তাহলে তার যুলুমের হাতকে চেপে ধরো আর যদি সে মাযলুম হয় তাহলে তাকে সাহায্য করো। (দারেমী)। সুতরাং বান্দাহর উচিত হবে একে অপরের প্রতি যুলুম না করা। বরং সাহায্যের হাত বাড়িয়ে দেয়া।

দ্বিতীয় মহত্ব :

يَا عِبَادِي! كُتِّبَ ضَالٌّ إِلَّا مَنْ هَدَيْتُهُ، فَاسْتَهْدُونِي أَهْدِكُمْ

হে আমার বান্দারা! আমি যাদেরকে হেদায়াত দান করেছি, তারা ছাড়া তোমরা সবাই বিপথগামী। সুতরাং তোমরা আমার কাছে হেদায়াত চাও, আমি তোমাদেরকে হেদায়াত দান করবো।

আল্লাহ তাআ'লা দ্বিতীয় মহত্বে তাঁর বান্দাদের ডেকে বলছেন, তোমরা ছিলে সবাই বিপথগামী-বিভ্রান্ত। আমি দয়া করে তোমাদের মধ্যে যাদেরকে হেদায়াত তথা সঠিক পথ দেখিয়েছি কেবলমাত্র তারাই হেদায়াত প্রাপ্ত হয়েছে। কেবলমাত্র তারাই সঠিক পথের সন্ধান লাভ করে জান্নাতে যাবার সুযোগ লাভ করেছে। সুতরাং এটা আল্লাহর পক্ষ থেকে তোমাদের জন্য এক বড় দয়া এবং মেহেরবাণী। যদি আল্লাহ তোমাদেরকে হেদায়াতের এই সঠিক পথ না দেখাতেন তাহলে তোমরা সবাই বিপদগামী হয়ে দুনিয়া এবং আখেরাতে ধ্বংস হয়ে জাহান্নামে চলে যেতে। অতএব তোমাদের উচিত বিপথগামী জাহান্নামের পথ থেকে বাঁচার জন্য আল্লাহর কাছে হেদায়াতের পথ লাভের জন্য ফরিয়াদ করা। চেষ্টা ফিকির করা। তাহলে আল্লাহ পাক তোমাদের এই দোআ এবং চেষ্টা-প্রচেষ্টাকে কবুল করে জাহান্নামের সেই বিভ্রান্তির পথ থেকে উদ্ধার করে

হেদায়াত দান করে জান্নাতের সঠিক পথ বাতলিয়ে দেবেন।

হাদীসের এই বক্তব্যে বুঝা যায়, মানুষ শুধু চেষ্টা বা নিজের আ'মল দ্বারাই হেদায়াত লাভ করে না। বরং সেখানে আল্লাহর সাহায্য অবধারিত। আল্লাহর ইচ্ছা ছাড়া কেউ হেদায়াত লাভ করতে পারে না। আল্লাহ যাকে হেদায়াত দান করেন কেবলমাত্র সেই হেদায়াত প্রাপ্ত হয়। সুতরাং হেদায়াত লাভের মাধ্যম হলো নিজে চেষ্টা করা এবং সাথে সাথে আল্লাহর কাছে হেদায়াত লাভের জন্যে সাহায্য চাওয়া। এ দু'টোর সমন্বয় হলেই কেবলমাত্র আল্লাহ পাক তাঁর বান্দাদের হেদায়াত দান করবেন।

আল্লাহর সাহায্য ছাড়া যেমন শুধু চেষ্টার মাধ্যমে হেদায়াত লাভ করা যায় না। তেমনি চেষ্টা না করেই শুধু আল্লাহর সাহায্যের উপর ভরসা করেও হেদায়াত লাভ করা যায় না। কেননা আল্লাহ পাক কোনো অলস, অকর্মণ্য ব্যক্তিকে সঠিক পথ দেখান না। হাদীসে হেদায়াত চাওয়া শব্দের মধ্যে নিজের চেষ্টা ও আল্লাহর সাহায্য দু'টোই রয়েছে।

তৃতীয় মহত্ব :

يَا عِبَادِي! كُلُّكُمْ جَائِعٌ إِلَّا مَنْ أَطْعَمْتُهُ فَاسْتَطِيعُوا نِيَّ
أَطْعِمْكُمْ-

হে আমার বান্দারা! আমি যাদেরকে খাদ্য-খাবার দিয়েছি তারা ছাড়া তোমরা সবাই ক্ষুধার্ত। সুতরাং আমার কাছে খাবার চাও, আমি তোমাদের খাবার দেব।

হাদীসের এই অংশে আল্লাহর যে মহত্ব তা হলো দুনিয়ার সকল মানুষই ক্ষুধার্ত, ভুখা। কেবলমাত্র তারা নয় যাদেরকে আল্লাহ তাআলা খাদ্য-খাবার দিয়েছেন। মানুষ যা খাদ্য-খাবার খাচ্ছে তা আল্লাহর বিশেষ মেহেরবাণীর ফল। আল্লাহ যদি দয়া করে তাঁর বান্দাদের ক্ষুধা নিবারনের ব্যবস্থা না করতেন তাহলে কোন মানুষের ক্ষমতা নেই যে, সে নিজের চেষ্টায় ক্ষুধা থেকে বাঁচতে পারে। তাই আল্লাহ তাআলা তাঁর বান্দাদের আহ্বান করে বলছেন, তোমরা আমার কাছে খাবার চাও আমি তোমাদের খাবার দেব।

এখানে খাদ্য-খাবারের জন্য 'প্রার্থনা করো' বলে এই বাক্যের মধ্যেও চেষ্টা এবং

আল্লাহর সাহায্য দু'টো অর্থই রয়েছে। নিজের রুজি বা খাদ্য খাবারের জন্য নিজে যেমন চেষ্টা করবে তেমনি আল্লাহর সাহায্যও কামনা করবে। নিজের চেষ্টা বাদ দিয়ে যেমন কেবলমাত্র আল্লাহর সাহায্যের উপর নির্ভর করা যাবে না। তেমনি আল্লাহর সাহায্য বাদ দিয়ে কেবলমাত্র নিজের চেষ্টার উপরও নির্ভর করা যাবে না।

সুতরাং আল্লাহ তাঁর বান্দাদের মধ্যে তাদেরকেই ক্ষুধা নিবারনের জন্য খাদ্য-খাবার দেবেন যারা নিজে আশ্রয় চেষ্টা করবে, বুদ্ধি কৌশল খাটাতে এবং আল্লাহর সাহায্যের জন্য ধর্নাও দেবে।

চতুর্থ মহত্ব :

يَا عِبَادِي! كُفُّكُمْ عَنِ الْاَمْنِ كَسَوْتُهُ فَاسْتَكْسُونِي
اَكْسُكُمْ-

হে আমার বান্দারা! আমি যাদেরকে বস্ত্র দিয়েছি, তারা ছাড়া তোমরা সবাই বস্ত্রহীন। সুতরাং আমার কাছে বস্ত্র চাও, আমি তোমাদেরকে বস্ত্র দান করবো।

প্রকৃতপক্ষে মানুষতো জন্মলাভ করেছে বস্ত্রহীন ল্যাংটা অবস্থায়। আবার তাদের সকলকে বিচারের দিন হাশরের ময়দানে দাঁড় করানো হবে বস্ত্রহীন ল্যাংটা অবস্থায়। মাঝ পথে দুনিয়ার এই জীবনে মানুষকে তার লজ্জা নিবারন, গরম ও ঠান্ডা থেকে বাঁচা এবং সৌন্দর্য্য বৃদ্ধির জন্য আল্লাহ পাক মেহেরবাণী করে পোষাকের ব্যবস্থা করেছেন। তাই হাদীসের এই অংশে আল্লাহ পাক বলেছেন তোমরা সবাই বস্ত্রহীন ছিলে, আমি দয়া করে তোমাদেরকে পোষাকের ব্যবস্থা করে ল্যাংটা থেকে মুক্ত করেছি। তোমাদের ল্যাংটা থেকে বাঁচার জন্য তোমাদের কোনো ক্ষমতা ছিলো না। আমিই তোমাদেরকে মেহেরবাণী করে বস্ত্র দেবার ব্যবস্থা করেছি। অর্থাৎ আমি তোমাদের জীবিকা দান করেছি সেই জীবিকা থেকেই তোমরা বস্ত্র ক্রয় করে তোমাদের লজ্জা নিবারন করেছো।

সুতরাং তোমরা তোমাদের ইজ্জত আত্ম রক্ষা করার জন্য কেবল আমার কাছেই পোষাক চাও, আমি তোমাদের আবেদন কবুল করবো এবং তোমাদের পোষাকের ব্যবস্থা করবো। লজ্জা নিবারনের জন্য পোষাক পেতে হলে

কেবলমাত্র তোমাদের চেষ্টা-প্রচেষ্টার মাধ্যমেই সম্ভব নয়। আমার সাহায্য সহযোগীতার প্রয়োজন রয়েছে। আমার সাহায্য এবং দয়া ছাড়া তোমাদের পক্ষে কোনো কিছু করা সম্ভব নয়। সুতরাং কেবলমাত্র আমার কাছেই চাও, অন্য কারো কাছে নয়।

পঞ্চম মহত্ব :

يَا عِبَادِي! إِنَّكُمْ تَخْطُونَ بِاللَّيْلِ وَالنَّهَارِ، وَأَنَا أَغْفِرُ
الذُّنُوبَ جَمِيعًا - فَاسْتَغْفِرُونِي أَغْفِرْ لَكُمْ

হে আমার বান্দারা! তোমরা রাত-দিন পাপে লিপ্ত। আমিই সমস্ত পাপ ক্ষমা করে থাকি। সুতরাং তোমরা আমার কাছে ক্ষমা চাও, আমি তোমাদেরকে ক্ষমা করে দেব।

হাদীসে মহান আল্লাহর পঞ্চম মহত্ব এই যে, আল্লাহ্ বড়ই মেহেরবান, পাপ মোচনকারী। আমরা আল্লাহর এই নিয়ামতে ভরা দুনিয়ার নিয়ামত ভোগ ব্যবহার করে তারই অবাধ্য হয়ে পাপের মধ্যে লিপ্ত হয়ে আছি। আমরা জান্তে-অজান্তে, প্রকাশ্যে অপ্রকাশ্যে শয়তানের ধোকায়ে অসংখ্য পাপ করে যাচ্ছি। আল্লাহ্ যদি غَفُورٌ رَّحِيمٌ ক্ষমাশীল, মেহেরবান না হতেন, তা হলে আমরা আমাদের পাপের দরিয়ায় হাবুডুবু খেয়ে আল্লাহর অভিশপ্ত বান্দা হিসেবে জাহান্নামে নিক্ষিপ্ত হতাম। কিন্তু আল্লাহ্ আমাদের অসংখ্য অপরাধকে উপেক্ষা করে প্রতিনিয়ত ক্ষমা করে যাচ্ছেন। আল্লাহ্ যদি আমাদেরকে আমাদের পাপের জন্য পাকড়াও করতে চাইতেন তাহলে কেউ আমরা তাঁর শাস্তি থেকে রেহাই পেতাম না। সুতরাং আল্লাহ্ তাঁর বান্দাদের ডেকে বলছেন তোমরা তোমাদের অর্জিত পাপ থেকে মুক্তি পাবার জন্য কেবলমাত্র আমার কাছেই ক্ষমা চাও, আমি তোমাদের ক্ষমা করে দেব।

আল্লাহ্ এতো উদার, দাতা এবং মেহেরবান যে, বান্দা যদি একবার আল্লাহর কাছে স্যালেভার করে ক্ষমা চায়, তাহলে আল্লাহ্ সব কিছু ভুলে গিয়ে তাকে ক্ষমা করে দেন। সুতরাং আমাদের যেমন শয়তানের অসঅয়াসার ব্যাপারে সজাগ- সতর্ক থেকে পাপ থেকে বাঁচার চেষ্টা করতে হবে, তেমনি আমাদের হয়ে যাওয়া পাপ থেকে মুক্ত হওয়ার জন্য একমাত্র আল্লাহ্ তাআলার কাছেই ক্ষমা চাইতে হবে।

ষষ্ঠ মহত্ব :

يَا عِبَادِي! إِنَّكُمْ لَن تَبْلُغُوا ضُرِّي فَتَضُرُّونِي - وَلَن تَبْلُغُوا نَفْعِي فَتَنْفَعُونِي -

হে আমার বান্দারা! আমার কোনো ক্ষতি করার সাধ্য তোমাদের নেই।
আমার কোনো উপকার করার সামর্থ্যও তোমাদের নেই।

এখানে আল্লাহর মহত্বের কথা হলো এই যে, আল্লাহ এমন এক মহান ক্ষমতাধর সত্ত্বা যে মানুষ যদি সবাই মিলে আল্লাহর ক্ষতি করতে চায়, তাহলে তাঁর একচুল পরিমাণও ক্ষতি করতে পারবে না। বরং ক্ষতি যা হবে তা মানুষেরই হবে। আবার যদি মানুষ আল্লাহর উপকার করতে চায়, তাও মানুষের কোনো ক্ষমতা নেই যে আল্লাহর কোনো উপকার করতে পারে। বরং উপকার যা হবে তা মানুষেরই হবে। লাভ-ক্ষতি মানুষেরই, আল্লাহর কোনো লাভও নেই ক্ষতিও নেই।

পৃথিবীর সব মানুষ যদি আল্লাহর এবাদত-বন্দেগী ছেড়ে দিয়ে পাপাচারে লিপ্ত হয়ে যায়, তাতে আল্লাহর কোনো ক্ষতি নেই। আবার যদি দুনিয়ার সব মানুষ আল্লাহর এবাদত-বন্দেগীতে মশগুল হয়ে নেক্কার হয়ে যায়, তাতেও আল্লাহর কোনো উপকার নেই। এবাদত-বন্দেগী করলে এবং পাপাচার থেকে দূরে থেকে নেক্কার হয়ে গেলে বান্দার নিজের লাভ। অপরপক্ষে আল্লাহর এবাদত-বন্দেগী ত্যাগ করে পাপাচারে লিপ্ত হয়ে গেলে বান্দারই ক্ষতি। সুতরাং আল্লাহর বান্দাদের উচিত নিজের ক্ষতি থেকে বেঁচে নিজেরই মহা উপকারের জন্য বেশী বেশী আল্লাহর এবাদত-বন্দেগী করা আর তাঁরই নির্দেশ মতো জীবন পরিচালনা করা এবং তার মধ্যেও যে পাপ হয়ে যায় তা ক্ষমার জন্য আল্লাহর কাছে ফরিয়াদ করা।

সপ্তম মহত্ব :

يَا عِبَادِي! لَوْ أَنَّ أَوْلَكُمْ وَأَخْرَجَكُمْ وَإِنْسَكُمْ وَجَنَّكُمْ كَانُوا

عَلَىٰ أَثْقَىٰ قَلْبٍ رَّجُلٍ وَاحِدٍ مِنْكُمْ مَا زَادَ ذَلِكَ فِي
مُلْكِي شَيْئًا.

হে আমার বান্দারা! তোমাদের আগের ও পরের সব মানুষ ও জিন যদি তোমাদের মধ্যকার সব চেয়ে মুত্তাকী ব্যক্তির ন্যায় আল্লাহ্‌ ভীরু হৃদয়ের অধিকারী হয়ে যায়, তাতে আমার সাম্রাজ্যের মর্যাদা বিন্দুমাত্রও বৃদ্ধি পাবে না।

হাদীসের সপ্তম মহত্বে আল্লাহ্‌ পাক নিজেই বলেন, পৃথিবীর আদি থেকে অন্ত পর্যন্ত যতো মানুষ ও জিন পৃথিবীতে আসবে তারা যদি সবাই মুত্তাকী, খোদাভীরু হয়ে যায়। তাদের অন্তর যদি আল্লাহ্র ভয়ে ভীত হয়ে প্রকম্পিত হয়ে যায়। তাদের অন্তর যদি আল্লাহ্র ভয় ও ভক্তিতে ভরপুর হয়ে যায়। অর্থাৎ গোটা জাহানের মানুষ ও জীন যদি প্রকৃত আল্লাহ্‌ ভীরু হয়ে মুত্তাকী হয়ে যায়, তাতে আল্লাহ্র এই বিশাল সাম্রাজ্যের সামান্যতমও মর্যাদা বৃদ্ধি পাবে না। বরং মর্যাদা যদি কিছু বৃদ্ধি পায় তবে যারা মুত্তাকী তাদেরই পাবে। এই সম্পর্কে আল্লাহ্‌ পাক সূরা হুজুরাতে বলেন : إِنَّ أَكْرَمَكُمْ عِنْدَ اللَّهِ أَتْقَىٰكُمْ : নিশ্চয়ই আমার কাছে তোমাদের মধ্যে সেই ব্যক্তি বেশী মর্যাদাশীল যে আমাকে ভয় করে।

সুতরাং এই আয়াত দ্বারা জানা যায় যে, আল্লাহ্‌কে ভয় করলে যে ভয় করে তারই মর্যাদা বৃদ্ধি পায়। আল্লাহ্র কাছে সেই বেশী মর্যাদা লাভ করে থাকে। এতে আল্লাহ্‌ বা আল্লাহ্র সাম্রাজ্যের একচুল পরিমাণও মর্যাদা বৃদ্ধি পায় না।

অতএব আল্লাহ্র কাছে আমাদের মর্যাদা বৃদ্ধির জন্য আল্লাহ্‌কে হৃদয় দিয়ে প্রেমমাখা ভয় ও ভক্তি করা উচিত।

অষ্টম মহত্ব :

يَا عِبَادِي! لَوْ أَنَّ أَوْلَكُمْ وَأَخْرَكُمْ وَإِنْ سَكُمُ وَجِئْتُكُمْ كَانُوا
عَلَىٰ أَفْجَرِ قَلْبٍ رَّجُلٍ وَاحِدٍ- مَا نَقَصَ ذَلِكَ مِنْ مُلْكِي
شَيْئًا

হে আমার বান্দারা! তোমাদের আগের ও পরের সব মানুষ ও জিনও যদি তোমাদের মধ্যকার সবচেয়ে পাপিষ্ঠ ব্যক্তির ন্যায় পাপিষ্ঠ হৃদয়ের অধিকারী যায়, তাতেও আমার সাম্রাজ্যের কোনো প্রকার ঘাটতি হবে না।

হাদীসের এই অংশে মহান আল্লাহর মহত্ব বলতে গিয়ে মহান আল্লাহ নিজেই বলেন, হে আমার বান্দারা পৃথিবীর আদি থেকে অন্ত পর্যন্ত সব মানুষ ও জিন যদি পাপাচারে লিপ্ত হয়ে পাপিষ্ঠ হয়ে যায়। আর পাপিষ্ঠ লোকদের মতো সবার অন্তর যদি পাপিষ্ঠ হয়ে যায় এবং তাদের হৃদয় যদি পাপে পরিপূর্ণ হয়ে যায়, তবুও তোমাদের পাপাচার ও পাপিষ্ঠ হৃদয়ের কারণে আমার সাম্রাজ্যের একচুল পরিমাণও ক্ষতি হবে না। আমার এই সাম্রাজ্যের সামান্যতমও মর্যাদা হানি হবে না। বরং তোমাদের এই পাপাচার এবং পাপিষ্ঠ হৃদয়ের কারণে তোমরা নিজেরাই ক্ষতিগ্রস্ত হবে। তোমাদের নিজেদেরই মর্যাদাহানি হবে। তোমাদের এই পাপাচারের কারণে দুনিয়ায় যেমন তোমরা লাঞ্ছনা-গঞ্জনা ভোগ করবে, তেমনি পরকালেও তোমাদেরকে নিকৃষ্টভাবে কঠিন শাস্তির জায়গা জাহান্নামে নিক্ষেপ করা হবে। সুতরাং তোমাদের এই পাপাচার এবং পাপিষ্ঠ হৃদয়ের কারণে নিজেরা নিজেদেরই লাঞ্ছিত করে মহা ক্ষতিগ্রস্ত হবে। আল্লাহ এবং আল্লাহর এই বিশাল সাম্রাজ্যের কোনো ক্ষতি হবে না। অতএব আমাদেরকে সেই মহা ক্ষতি এবং লাঞ্ছনা থেকে বাঁচার জন্য পাপাচার বা পাপের কাজ থেকে দূরে থাকতে হবে এবং পাপাচার থেকে মুক্ত থাকার জন্য একমাত্র আল্লাহর কাছেই সাহায্য চাইতে হবে।

নবম মহত্ব :

يَا عِبَادِي! لَوْ أَنَّ أَوْلَكُمْ وَأَخْرَكُمْ وَأَنْسَكُمْ وَجَنَّكُمْ
قَامُوا فِي صَعِيدٍ وَاحِدٍ فَسَأَلُونِي - فَأَعْطَيْتُ كُلَّ
إِنْسَانٍ مَسْأَلَتَهُ - مَا نَقَصَ ذَلِكَ مِمَّا عِنْدِي إِلَّا كَمَا
يَنْقُصُ الْمَخِيطُ إِذَا أُدْخِلَ الْبَحْرَ -

হে আমার বান্দারা! তোমাদের আগের ও পরের সব মানুষ ও জিন যদি কোথাও জমায়েত হয়ে আমার কাছে চায়, আর আমি যদি তাদের প্রত্যেকের চাহিদা অনুযায়ী দান করি, তবে আমার ভান্ডার কেবল ততটুকুই কমবে, যতটুকু একটা সূচ সাগরে ডুবিয়ে তুললে সাগরের পানি কমবে।

হাদীসের এই বক্তব্যে আল্লাহর মহত্ত্ব এবং তাঁর ভান্ডার যে বিশাল, অফুরন্ত তারই বহিঃপ্রকাশ ঘটেছে। হাদীসের এই অংশে আল্লাহ পাক বলেন : তোমাদের আগের ও পরের অর্থাৎ আদি থেকে অন্ত পর্যন্ত যতো মানুষ এবং জিন আসবে তারা সবাই যদি আমার পৃথিবীর কোনো এক স্থানে জমায়েত হয়ে যার যা ইচ্ছা বা বাসনা পূরণের জন্য আমার কাছে চায়, আর আমি তাদের আপন আপন চাহিদা মতো যদি তাদের প্রত্যেকের চাহিদা বা ইচ্ছা পূর্ণ করে দেই, তাহলে আমার ভান্ডার এতো বড় এতো বিশাল যে, সেই ভান্ডারের কোনো কমতি-ঘাটতি হবে না। যদিও কোনো কমতি হয়, তবে তা টেরও পাওয়া যাবে না। আমার ভান্ডার এমনই যে, বিশাল সমুদ্রের পানিতে যদি একটা সূচ ডুবানো হয়, আর সেই সূচের মাথায় পানি উঠে, সেই পানি যেমন সমুদ্রের পানি বিন্দুমাত্র কমাতে পারে না, কিছুমাত্র কমলেও কোনো টের পাওয়া যায় না। অনুরূপ আমার ভান্ডার। আমার এই ভান্ডার থেকে শুধু মানুষ ও জিন কেন, আমার সমস্ত মাখলুকাতেরও যদি চাহিদা পূর্ণ করি তাতেও আমার ভান্ডারের কোনো কমতি হবে না, ঘাটতি হবে না। সুবহান আল্লাহ!! আলহামদুলিল্লাহ! আল্লাহ্ আকবার।

আল্লাহর পবিত্রতা, আল্লাহর মহত্ত্ব ও বড়ত্ব ঘোষণা করে শেষ করা যায় না।

দশম মহত্ত্ব :

يَا عِبَادِي! إِنَّمَا هِيَ أَعْمَالُكُمْ أَحْصَيْتَهَا لَكُمْ ثُمَّ أُوفِّيْكُمْ
إِيَّاهَا- فَمَنْ وَجَدَ خَيْرًا فَلْيَحْمَدِ اللَّهَ وَمَنْ وَجَدَ غَيْرَ
ذَلِكَ فَلَا يَلُؤْ مَنْ إِلَّا نَفْسَهُ-

হে আমার বান্দারা! তোমাদের আ'মল সমূহ আমি তোমাদের জন্য সংরক্ষণ করে রাখি। অতঃপর তোমাদের তার পূর্ণ বিনিময় দান করবো। সুতরাং যে কল্যাণ লাভ করবে, সে যেন আমার শোকর আদায় করে। আর যে অন্য কিছু পাবে সে যেন এজন্য নিজেকেই তিরস্কার করে।

হাদীসে কুদসীর এই হাদীসে দশম ও সর্বশেষ আল্লাহর মহত্ত্বের কথা উল্লেখ করা হয়েছে। তা হলো আল্লাহ সুবহানাহু তাআ'লা মানুষের প্রতিটি আ'মল বা কার্যক্রমকে ছোট হোক আর বড় হোক, প্রকাশ্য হোক আর গোপনেই হোক,

সকল আ'মল বা কার্যক্রমকে বিশেষ ব্যবস্থায় সংরক্ষণ করে থাকেন। যে সংরক্ষণে সামান্যতমও ত্রুটি থাকে না। মানুষের যার যে আ'মল তা কমতি বৃদ্ধি না করে ঠিক ঠিক ভাবে সংরক্ষণ করেন।

আল্লাহ্ তাআ'লা তাঁর বান্দাদের আ'মল সংরক্ষণ করার জন্য একাধিক ব্যবস্থা গ্রহণ করে থাকেন। যাতে কোনো বান্দা আল্লাহ্ সুবহানাহ্ তাআ'লাকে সামান্যতমও দোষারোপ করতে না পারে। আর বান্দার সেই সংরক্ষিত আ'মলনামা বিচারের দিন হাশরের ময়দানে বান্দার সামনে তাদের নিজ নিজ আ'মলনামা হাজির করা হবে। আর তাদের সেই আ'মলনামা বা কার্যক্রমের পূর্ণ বিনিময় বা প্রতিদানও দেয়া হবে। কোনো প্রকার হ্রাস-বৃদ্ধি করা হবে না।

আল্লাহ্ তাবারাক ওয়া তাআ'লা তাঁর বান্দাদের এ ব্যাপারে ওয়াজ করে বলেন, তোমাদের অর্জিত আ'মলনামার জন্য যদি কেউ উপকার বা কল্যাণ লাভ করে অর্থাৎ দুনিয়ায় কল্যাণ এবং আখেরাতে জান্নাত লাভ করে, সে যেন সেই জন্য আল্লাহ্রই প্রশংসা করে, আল্লাহ্র শুকরিয়া আদায় করে। কেননা সে যেসব কল্যাণকর নেক আ'মল করতে পেরেছে তা একমাত্র আল্লাহ্রই মেহেরবানীতে করেছে। এতে তার কোনো নিজের ক্রেডিট নেই। যদি আল্লাহ্ তাকে সাহায্য না করতেন তাহলে তার জন্য ভাল, নেক এবং কল্যাণকর আ'মল করা সম্ভব হতো না। সুতরাং ধন্যবাদ পাবার অধিকার একমাত্র আল্লাহ্ তাবারাক ওয়া তাআলাই।

অপর পক্ষে যদি তার দুনিয়ার আ'মল বা কার্যক্রমের দ্বারা কল্যাণ ছাড়া অন্য কিছু পায় অর্থাৎ দুনিয়ায় লাঞ্ছনা এবং পাপে পূর্ণ হয়ে পরকালে জাহান্নামী হয়ে ধ্বংস হয়ে যায়, তার জন্য সে যেন আল্লাহ্কে দোষারোপ না করে, আল্লাহ্কে অভিষাপ না দেয়। বরং এই অন্যায়ে আ'মলের জন্য যেন সে নিজে নিজেকেই দোষারোপ করে, নিজেকেই তিরস্কার করে। কেননা দুনিয়াতে আল্লাহ্ তাআ'লা বান্দার জন্য অসংখ্য নেয়া'মত দান করেছেন এবং বান্দাকে স্বাধীনতাও দান করেছেন, এবং ভাল মন্দ বিচারের জন্য বিবেচনা শক্তিও দিয়েছেন। ভাল কাজের প্রতিদান এবং মন্দ কাজের প্রতিফলের কথাও জানিয়ে দিয়েছেন। তার পরেও যদি কেউ দুনিয়ার মোহে ডুবে গিয়ে বিবেকের বিরুদ্ধে কাজ করে, আল্লাহ্র দেয়া স্বাধীনতাকে বিপথে পরিচালিত করে, সত্য ও ন্যায়ের পথকে ত্যাগ করে অসত্য ও অন্যায়ে পথকেই বেছে নেয়। আর সেই জন্য যদি সে

শাস্তি ভোগ করে, তার জন্য তো আল্লাহ দায়ী নন। বরং বান্দা সেই আ'মলের জন্য নিজেই দায়ী। সুরা বাকারায় মহান আল্লাহ বলেন-

لَا يُكَلِّفُ اللَّهُ نَفْسًا إِلَّا وُسْعَهَا لَهَا مَا كَسَبَتْ وَعَلَيْهَا
مَا اكْتَسَبَتْ-

আল্লাহ কাউকে তার সাধ্যের অতিরিক্ত কোনো কাজের বোঝা দেন না, সে তাই পায় যা সে উপার্জন করে এবং তাই তার উপর বর্তায় যা সে করে। সুতরাং এই ভয়াবহ পরিণতির জন্য যেন সে নিজে নিজেকেই তিরস্কার করে, ভৎসনা করে।

শিক্ষা : প্রিয় ভায়েরা/বোনেরা! এতক্ষণ পর্যন্ত আপনাদের সামনে মহান আল্লাহর মহত্ত্ব এবং বড়ত্ব সম্পর্কে হাদীসের ব্যাখ্যা পেশ করলাম। তা থেকে আমাদের জন্য যে সব শিক্ষণীয় বিষয় রয়েছে তা হলো :-

- ✱ একে অপরের প্রতি যুলুম বা অত্যাচার করা থেকে দূরে থাকতে হবে। কেননা আল্লাহ নিজের জন্য এবং বান্দাদের জন্য যুলুম করাকে হারাম করে দিয়েছেন।
- ✱ হেদায়াত বা সঠিক পথ দেখানোর মালিক আল্লাহ তা'আলা। এই জন্য হেদায়াত লাভের জন্য আল্লাহর কাছেই দোআ করা এবং তার উপর টিকে থাকার জন্য তাঁরই সাহায্য কামনা করা।
- ✱ আমাদের রেজেক বা জীবিকার মালিক হলেন মহান আল্লাহ তা'আলা। সুতরাং ক্ষুধা নিবারণের জন্য মানুষের কাছে হাত না বাড়িয়ে আল্লাহর কাছেই রুজির জন্য দোআ করা। আর দোআর সাথে সাথে নিজেও চেষ্টা সাধনা করা।
- ✱ আমাদের ইজ্জত-আব্রু ঢাকা এবং সৌন্দর্য বৃদ্ধির জন্য একমাত্র আল্লাহ তা'আলার কাছেই পোষাক চাওয়া। অর্থাৎ পোষাক সংগ্রহের জন্য যে সামর্থের প্রয়োজন সেই সামর্থ চাওয়া। আর সেই সামর্থ অর্জনের জন্য আল্লাহর কাছে যেমন সাহায্য চাওয়া এবং নিজেও চেষ্টা-প্রচেষ্টা অব্যাহত রাখা।
- ✱ মানুষের পাপ মোচনকারী একমাত্র আল্লাহ তা'আলা। সুতরাং মানুষ যে প্রতিনিয়ত পাপ করে যাচ্ছে তার জন্য আল্লাহর কাছেই ক্ষমা চাওয়া এবং পাপ থেকে বাঁচার জন্য আল্লাহর সাহায্য চাওয়া ও সর্বাত্মক প্রচেষ্টা চালানো।

✱ আল্লাহর লাভ-ক্ষতি করার বান্দার কোনো ক্ষমতা নেই। লাভ-ক্ষতি যা হয় তা মানুষেরই। সুতরাং নিজেকে সদাসর্বদা ক্ষতি থেকে বেঁচে লাভবান হবার জন্য চেষ্টা করা।

✱ আল্লাহর সাম্রাজ্যের মর্যাদা বৃদ্ধি নয়, বরং দুনিয়া এবং আখেরাতে নিজের মর্যাদা বৃদ্ধির জন্য আল্লাহকে সদাসর্বদা হৃদয়-মন দিয়ে ভয় করা। আল্লাহ্‌ভীরু হৃদয়ের অধিকারী হয়ে মুত্তাকী হয়ে যাওয়া।

✱ আল্লাহর সাম্রাজ্যের কোনো ক্ষতি নয় বরং নিজের মহা ক্ষতি থেকে বাঁচার জন্য পাপাচার থেকে দূরে থাকা। হৃদয় মন দিয়ে পাপিষ্ট কাজকে ঘৃণা করা।

✱ আল্লাহর ধন ভান্ডার অনেক বড় বিশাল এটা মনে প্রাণে বিশ্বাস করা। এই জন্য হতাশ না হয়ে সদাসর্বদা আল্লাহর কাছেই নিজের ইচ্ছা পূরণের জন্য দোয়া করা।

✱ আমাদের নেক ও কল্যাণকর আ'মল বা কার্যক্রমের জন্য নিজের বড়াই না করে আল্লাহর প্রশংসা করা এবং তারই কৃতজ্ঞতা প্রকাশ করা। আর নিজের পাপ ও অকল্যাণকর কাজের পরিণতির জন্য আল্লাহকে দোষারোপ না করে নিজে নিজেকেই দোষারোপ করা এবং তিরস্কার করা।

আহবান : প্রিয় ভায়েরা/বোনেরা! এতক্ষণ পর্যন্ত বিশাল এই হাদীসের দারস দিতে গিয়ে যদি আমার অজান্তে বা অজ্ঞাতে কোনো ভুল-ত্রুটি হয়ে যায়, তার জন্য মহান আল্লাহর কাছে ক্ষমা চেয়ে নিচ্ছি। আর এই হাদীসে যেসব শিক্ষণীয় রয়েছে তা যেন আমরা বাস্তব জীবনে আ'মল করতে পারি সেই তাওফীক কামনা করে দারস শেষ করছি।

মানুষ মানুষের কোনো উপকার এবং ক্ষতি করার ক্ষমতা

রাখে না, সকল ক্ষমতা আল্লাহর

نَحْمَدُهُ وَنُصَلِّي عَلَى رَسُولِهِ الْكَرِيمِ أَمَّا بَعْدُ

بِسْمِ اللَّهِ الرَّحْمَنِ الرَّحِيمِ-

عَنْ ابْنِ عَبَّاسٍ قَالَ : كُنْتُ خَلْفَ رَسُولِ اللَّهِ صَلَّى
اللَّهُ عَلَيْهِ وَسَلَّمَ يَوْمًا، فَقَالَ يَا غُلَامُ! إِنِّي أَعْلَمُكَ
كَلِمَاتٍ: إِحْفِظِ اللَّهَ يَحْفَظْكَ، إِحْفِظِ اللَّهَ تَجِدْهُ
تُجَاهَكَ، إِذَا سَأَلْتَ فَاسْأَلِ اللَّهَ، وَإِذَا اسْتَعَنْتَ
فَاسْتَعِنْ بِاللَّهِ، وَاعْلَمْ أَنَّ الْأُمَّةَ لَوِ اجْتَمَعَتْ عَلَى أَنْ
يَنْفَعُوكَ بِشَيْءٍ لَمْ يَنْفَعُوكَ إِلَّا بِشَيْءٍ قَدْ كَتَبَهُ اللَّهُ
لَكَ، وَلَوْ اجْتَمَعُوا عَلَى أَنْ يَضُرُّوكَ بِشَيْءٍ لَمْ
يَضُرُّوكَ إِلَّا بِشَيْءٍ قَدْ كَتَبَهُ اللَّهُ عَلَيْكَ، رُفِعَتْ إِلَّا
قَلَامٌ وَجَفَّتِ الصُّحُفُ - (تَرْمِزِي)

অনুবাদ : হযরত ইবনে আব্বাস (রাঃ) থেকে বর্ণিত আছে, তিনি বলেন :
একদিন আমি এক সওয়ারীতে রাসূলুল্লাহ (সাঃ) এর পেছনে বসা ছিলাম।
তিনি (আমাকে) বললেন : হে বালক! আমি তোমাকে কয়েকটা (গুরুত্বপূর্ণ)
বিষয় অবহিত করছি। (তাহলো) তুমি আল্লাহর বিধি-নিষেধের হেফায়ত
করবে, (তাহলে) আল্লাহ তোমাকে হেফায়ত করবেন। তুমি আল্লাহর প্রতি
লক্ষ্য রাখবে, (তাহলে) আল্লাহকে কাছে পাবে। তোমার কোনো কিছু
চাইতে হলে কেবলমাত্র আল্লাহর কাছেই চাইবে। আর যে কোনো ব্যাপারে
আল্লাহর সাহায্য প্রার্থনা করতে হলে কেবল আল্লাহর কাছেই করবে। জেনে

রেখ, গোটা জাতিও যদি তোমার কল্যাণ করার জন্য ঐক্যবদ্ধ হয়, তবে কেবল ততটুকুই কল্যাণ করতে পারবে, যতটুকু আল্লাহ তোমার জন্য লিখে রেখেছেন। পক্ষান্তরে গোটা জাতিও যদি তোমার কোনো ক্ষতি সাধন করতে ঐক্যবদ্ধ হয়, তাহলে কেবল ততটুকুই ক্ষতি করতে পারবে, যতটুকু আল্লাহ তোমার ভাগ্যে লিখে রেখেছেন। কলম উঠিয়ে নেয়া হয়েছে এবং লিখিত কাগজগুলোও শুকিয়ে গেছে। (তিরমিযী)

বলেন - قَالَ - ছেলে। - ابْن - থেকে বা হতে। عَنْ - বিশেষ বিশেষ শব্দার্থ :
 - يَوْمًا - (সওয়ারীর) পেছনে। - خَلْفَ - আমি ছিলাম। - كُنْتُ -
 - একদিন বা একদা। - يَآ - হে বা ওহে! - غَلَامٌ - বৎস বা বালক। - إِنِّي - নিশ্চয়
 আমি। - كَلِمَاتٍ - কথা বা বিষয়। - أَعْلَمُكَ - তোমাকে অবহিত করছি।
 - يَحْفَظُكَ - তোমাকে হেফায়ত করবে। - احْفَظِ اللَّهَ - আল্লাহ হেফায়ত করা হবে।
 - تَجِدُهُ - তাকে লক্ষ্য রাখবে। - يَجَاهُكَ - তুমি তাকে কাছে
 পাবে। - فَاسْأَلِ اللَّهَ - অতঃপর আল্লাহর কাছেই চাইবে। - إِذَا سَأَلْتَ - যখন তুমি চাইবে।
 - اسْتَعْنِ - সাহায্য প্রার্থনা করবে। - إِذَا - যখন। - وَ - এবং।
 - فَاسْتَعِنْ بِاللَّهِ - অতঃপর আল্লাহর কাছেই সাহায্য প্রার্থনা করো।
 - اجْتَمَعَتْ - যদি। - لَوْ - গোটা জাতি। - الْأُمَّةُ - এবং জেনে রেখ। - وَاعْلَمْ -
 একত্রিত হয়। - عَلَى - উপর। - يَنْفَعُوكَ - তোমার কল্যাণ করার। - بِشَيْءٍ -
 - كَتَبَهُ اللَّهُ - আল্লাহ - ছাড়া, ব্যতীত। - إِلَّا - পারবে না। - لَمْ - কোনো কিছু।
 - لَمْ - তোমার ক্ষতি করার। - يَضُرُّوكَ - তোমার জন্য। - لَكَ - লিখে রেখেছেন।
 - يَضُرُّوكَ - তোমার ক্ষতি করতে পারবে না। - عَلَيْكَ - তোমার উপর।
 - جَفَّتِ الصُّحُفُ - কলম উঠিয়ে নেয়া হয়েছে। - رُفِعَتِ الْأَقْلَامُ -
 - লিখিত কাগজও শুকিয়ে গেছে।

সম্বোধন : দারসে হাদীস অনুষ্ঠানে প্রিয় ইসলামী আন্দোলনের কর্মী ভায়েরা/বোনেরা! আসসালামু আলাইকুম। আমি আপনাদের সামনে হাদীসের দারস পেশ করার জন্য হযরত ইবনে আব্বাস (রাঃ) থেকে বর্ণিত রাসূলুল্লাহ (সাঃ) এর একটা অতীব গুরুত্বপূর্ণ হাদীস পাঠ ও তরজমা পেশ করেছি। আল্লাহপাক যেন আমাকে আপনাদের সামনে হাদীসটার সঠিক ব্যাখ্যা এবং শিক্ষা তুলে ধরার তাওফীক দান করেন।

রাবী বা বর্ণনা কারীর পরিচয় : নাম- আব্দুল্লাহ। কুনিয়াত- আবুল আব্বাস। পিতার নাম- আব্বাস। মাতার নাম- উম্মুল ফাযল লুবাবা। আব্দুল্লাহ কুরাইশ বংশের হাশেমী শাখার সন্তান। তিনি রাসূলুল্লাহ (সাঃ) এর চাচাতো ভাই এবং উম্মুল মুমিনীন হযরত মায়মুনা (রাঃ) তাঁর আপন খালা ছিলেন।

জন্ম-হযরত আব্দুল্লাহ (রাঃ) হিজরাতে তিন বছর পূর্বে শিয়াবে আবী তালিবে জন্মগ্রহণ করেন। রাসূল (সাঃ) যখন ইন্তেকাল করেন তখন তার বয়স ছিলো মাত্র ১৩ বছর। হযরত আব্দুল্লাহ ইবনে আব্বাস যখন (শিয়াবে আবু তালিবে) ভূমিষ্ঠ হয় তখন তাঁর মা তাকে কোলে করে প্রথমে রাসূল (সাঃ) এর কাছে নিয়ে যায়। রাসূল (সাঃ) নিজের পবিত্র মুখ থেকে একটু থুথু নিয়ে শিশু আব্দুল্লাহর মুখে দিয়ে তাঁর তাহ্নীক করেন। এভাবে তার পেটে পার্থিব কোনো বস্তু প্রবেশ করার আগেই রাসূলের পবিত্র ও কল্যাণময় থুথু প্রবেশ করে। আর সেই সাথে প্রবেশ করে তাকওয়া ও হিকমত।

সাত বছর থেকেই তিনি রাসূলুল্লাহ (সাঃ) এর সেবা ও খিদমতে আত্মনিয়োগ করেন। অজুর প্রয়োজন হলে তিনি পানির ব্যবস্থা করেন, নামাযে দাঁড়ালে তাঁর পেছনে দাঁড়িয়ে যেতেন এবং সফরে গেলে তিনি তাঁর সওয়ারীর পেছনে বসে তাঁর সফরসঙ্গী হতেন।

হযরত আব্দুল্লাহ রাসূলের জীবনের যে অধ্যায়ে সাহচর্য লাভ করেন তখন ছিল তাঁর খেলাধুলার সময়।

উম্মুল মুমিনীন হযরত মায়মুনা হযরত আব্দুল্লাহর আপন খালা হওয়ার কারণে তিনি অধিকাংশ সময় তাঁর কাছেই কাটাতেন। অনেক সময় তার ঘরেই ঘুমিয়ে পড়তেন। এ কারণে খুব নিকট থেকে অত্যন্ত ঘনিষ্ঠ ভাবে রাসূলুল্লাহ (সাঃ) এর সাহচর্য লাভ করেন।

হযরত আব্দুল্লাহ অত্যন্ত জ্ঞানী-গুণী, হিকমত এবং কৌশলে পারদর্শী ছিলেন। রাসূলের বিভিন্ন মজলিসে বড় বড় সাহাবীদের সাথেও তিনি বসার সুযোগ পেতেন। রাসূলের সাহাবী এবং বর্ণনাকারীদের মধ্যে তিনি ছিলেন সবচেয়ে ছোট বয়সের।

হযরত আব্দুল্লাহ (রাঃ) ৬৮ হিজরীতে ৬৮৬/৮৮ খ্রীষ্টাব্দে তায়েফ নগরে মৃত্যুবরণ করেন। মৃত্যুর সময় তাঁর বয়স হয়েছিলো ৭১ বছর। তায়েফ নগরে মসজিদে ইবনে আব্বাস নামক বিশাল মসজিদের পিছনের দিকেই তাঁর কবর দেয়া হয়।

রাসূলের ওফাতের সময় হযরত আব্দুল্লাহ মাত্র ১৩ বছরের কিশোর হওয়ার পরও তিনি রাসূলুল্লাহ (সাঃ) এর প্রায় ১০৬৬টা হাদীস বর্ণনা করেন। যার অধিকাংশ হাদীস সহীহ বুখারী এবং মুসলিম শরীফে বর্ণিত হয়েছে।

হাদীসটা বর্ণনার সময়কাল : হাদীসটা রাসূলুল্লাহ (সাঃ) এর জীবনের কোন অংশে বর্ণিত হয়েছে তার নির্দিষ্ট কোনো তথ্য আমাদের হাতে নেই। তবে বিষয়বস্তুর প্রতি লক্ষ্য রাখলে মনে হয় রাসূলুল্লাহ (সাঃ) হাদীসটা মাদানী জিন্দেগীতে বর্ণনা করেছেন। এখানে হযরত ইবনে আব্বাসকে যে সব উপদেশ দিচ্ছিলেন তার মধ্যে একটা হলো আল্লাহর বিধি-নিষেধের হেফাজত। আর আল্লাহর বিধি-নিষেধ মাদানী জীবনে অবতীর্ণ হয়েছিলো-মাক্কী জীবনে নয়। তাছাড়া রাবী আব্দুল্লাহ ইবনে আব্বাস মাক্কী জীবনে শিশু ছিলেন। সুতরাং এসব বিষয় থেকে ধরে নেয়া যায়, হাদীসটা রাসূলুল্লাহ (সাঃ) মাদানী জীবনেই বর্ণনা করেছিলেন। তারপরেও আল্লাহ পাকই ভাল জানেন।

বর্ণিত হাদীসের কেতাবের পরিচয় : রাসূলুল্লাহ (সাঃ) এর এই গুরুত্বপূর্ণ হাদীসটা যেই কেতাবে স্থান পেয়েছে তা হলো 'সিহাহ্ সিত্তা' ভুক্ত কেতাব তিরমিযী শরীফে। ছয়টি বিশুদ্ধ হাদীসের কেতাবের মধ্যে তিরমিযী শরীফের স্থান তৃতীয়। সুতরাং ধরে নেয়া যায় হাদীসটা সহীহ বিশুদ্ধ।

ব্যাখ্যা : প্রিয় ভায়েরা/বোনেরা! এতক্ষণ পর্যন্ত আপনাদের সামনে দারসের জন্য হাদীস পাঠ, তরজমা এবং কিছু প্রয়োজনীয় তথ্য তুলে ধরা হলো। এখন আমি আপনাদের সামনে উল্লেখিত হাদীসটার ব্যাখ্যা পেশ করছি।

একবার বালক আব্দুল্লাহ ইবনে আব্বাস (রাঃ) রাসূলুল্লাহ (সাঃ) এর সফরে সওয়ারীর পেছনে বসা ছিলেন। এই অবস্থায় রাসূল (সাঃ) তাঁর চাচাতো ভাই

বালক আব্দুল্লাহকে সম্বোধন করে বললেন, হে বালক! আমি তোমাকে কয়েকটা অতীব গুরুত্বপূর্ণ কথা বা উপদেশ অবহিত করছি। যা তুমি যেমন নিজে আ'মল করবে তেমনি তোমার মাধ্যমে গোটা উম্মাতে মুহাম্মদী জেনে তা বাস্তব জীবনে আ'মল করবে। আল্লাহর রাসূল (সাঃ) কোনো হাদীস বা উপদেশ উপস্থিত কোনো একজন বা একাধিক সাহাবার উদ্দেশ্যে বললেও তিনি তাদের মাধ্যমে তাঁর গোটা উম্মাতের জন্যেই বলে থাকেন। কেননা তিনি সর্বশেষ এবং বিশ্ব নবী ছিলেন। আর আল্লাহ তাআলাও তাকে গোটা মুসলিম জাতির জন্য অনসরণীয় আদর্শ হিসেবে পাঠিয়েছেন। মহান আল্লাহ বলেন : **لَقَدْ كَانَ لَكُمْ فِي**

رَسُولِ اللَّهِ أُسْوَةٌ حَسَنَةٌ তোমাদের জন্য রাসূলের জীবনে উত্তম আদর্শ রয়েছে। সুতরাং রাসূলুল্লাহ (সাঃ) অত্র হাদীসের দ্বারা ইবনে আব্বাসের মাধ্যমে গুরুত্বপূর্ণ বিষয়গুলো উম্মতে মুহাম্মদীকে অবহিত করতে চেয়েছেন। আর সেসব গুরুত্বপূর্ণ বিষয়গুলো হলো :

يُحْفَظُ তুমি আল্লাহর বিধি-নিষেধের হেফাজত করবে, (তাহলে) আল্লাহ তোমাকে হেফাজত করবেন। অত্র হাদীসে রাসূলুল্লাহ (সাঃ) প্রথম যে উপদেশ ইবনে আব্বাসের মাধ্যমে গোটা উম্মতকে দিয়েছেন, তা অত্যন্ত গুরুত্বপূর্ণ। এখানে বলা হয়েছে তুমি আল্লাহকে হেফাজত করবে অর্থাৎ আল্লাহর বিধি-নিষেধের হেফাজত বা সংরক্ষণ করবে। তাহলে আল্লাহও তোমাকে হেফাজত করবেন।

আসলে তো আল্লাহপাক মানুষকে দুনিয়াতে মহান দায়িত্ব দিয়ে খলিফা হিসেবে পাঠিয়েছেন। খলিফা বা প্রতিনিধির দায়িত্ব হলো আল্লাহর বিধি-নিষেধ নিজে মেনে চলা এবং অন্যদেরকে তা মানার জন্য সামাজিক এবং রাষ্ট্রীয় ভাবে বাস্তবায়ন করা। যদি কেউ আল্লাহর যাবতীয় নির্দেশ বা বিধি-বিধানকে ব্যক্তি, পরিবার, সমাজ ও রাষ্ট্রসহ সকল ক্ষেত্রে বাস্তবায়িত বা প্রতিষ্ঠিত করতে পারে তাহলেই আল্লাহর বিধি-বিধানের হেফাজত বা সংরক্ষণ করা হলো। শুধু আল্লাহর আদেশ মান্য নয় বরং তিনি যা নিষেধ বা হারাম করেছেন তা নিজে বর্জন করা এবং খলিফা হিসেবে সামাজিক ভাবেও বর্জন করার চেষ্টা করা। তা হলেই আল্লাহকে তথা আল্লাহর বিধি-নিষেধকে সংরক্ষণ বা হেফাজত করা হলো। সুতরাং যে বা যারা আল্লাহর আদেশ এবং নিষেধকে এভাবে হেফাজত

বা সংরক্ষণ করবে, আল্লাহ তাআ'লাও তার প্রতিদান হিসেবে তাকে বা তাদেরকেও হেফাজত করবেন।

আল্লাহ যে বিনিময় বা প্রতিদানের কথা বলেছেন, তাতে বান্দার জন্য বড় এক নিয়ামত, বড় এক পাওনা। তার কারণ আল্লাহর বিধি-নিষেধ সংরক্ষণের ক্ষেত্রে মানুষের ত্রুটি-বিচ্যুতি হয়ে যেতে পারে। কিন্তু বান্দার বিনিময় সংরক্ষণের ক্ষেত্রে আল্লাহ মোটেই ত্রুটি করেন না। কেননা তিনি যা ওয়াদা করেন তা পুরোপুরি ভাবেই পূর্ণ করেন। সূরা তাওবার ১১১ নম্বর আয়াতে মহান আল্লাহ বলেন :

وَمَنْ أَوْفَى بِعَهْدِهِ مِنَ اللَّهِ আর আল্লাহর চেয়ে কে বেশী ওয়াদা পূরণ করতে পারে ?

হাদীসে বিনিময় হিসেবে يَفْخُكَ তোমাকে সংরক্ষণ করা হবে, বলতে দুনিয়া এবং আখেরাত উভয় জগতেই হেফাজত করা হবে। দুনিয়ায় হেফাজত করা হবে অর্থাৎ আল্লাহর বিধি-নিষেধ হেফাজত করা হলে সমাজে কোনো অন্যায়-অপকর্ম, পাপাচার থাকবে না। সকল মানুষই ঈমানদার সৎকর্মশীল এবং খোদাভীরু হয়ে যাবে। ফলে মানুষে মানুষে হানা-হানি হয়ে যেমন নিজেরা ক্ষতিগ্রস্ত হবে না, তেমনি আল্লাহপাকও এই আ'মলের কারণে তাদের উপর রহমত ও বরকত অর্থাৎ শান্তি বর্ষণ করবেন। দুনিয়ার গয়ব আযাব থেকে রক্ষা করবেন। মহান আল্লাহ বলেন

وَلَوْ أَنَّ أَهْلَ الْقُرَىٰ أَمَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ السَّمَاءِ وَالْأَرْضِ

আর যদি কোনো জনপদের লোকেরা ঈমান ও তাকওয়ার ভিত্তিতে সমাজ পরিচালনা করে, (তাহলে) অবশ্যই আমি সেই জনপদের জন্য আসমান ও যমীনের সমস্ত রহমত ও বরকতের দরওয়াজা সমূহ খুলে দেবো।

অপর পক্ষে আল্লাহ তাআ'লার বিধি-নিষেধ হেফাজতের জন্য আখেরাতেও তাকে হেফাজত করবেন। অর্থাৎ কবরের আযাব থেকে হেফাজত করবেন। কেয়ামতের ভয়াবহতা ও হাশরের ময়দানের কঠিন আযাব থেকে রক্ষা করবেন। সর্বপরী জাহান্নামের কঠিন শাস্তি থেকে রক্ষা করে চিরস্থায়ী বসবাসের স্থান

জান্নাত দান করে হেফাজত করবেন। কেননা দুনিয়ায় যারা সকল ক্ষেত্রে সব কিছুকে উপেক্ষা করে আল্লাহর বিধি-নিষেধ মান্য করে চলে আল্লাহ তো কেবল তাদেরকেই আখেরাতের স্থায়ী নিবাস জান্নাত দান করবেন।

অতঃপর রাসূলুল্লাহ (সাঃ) হাদীসের পরবর্তী অংশে ইবনে আব্বাসকে বলেন : -

حَفِظِ اللَّهَ تَجِدَهُ تَجَاهَكَ, তুমি আল্লাহর প্রতি লক্ষ্য রাখবে,

(তাহলে) তুমি আল্লাহকে কাছে পাবে।

এখানে ইবনে আব্বাস (রাঃ) এর মাধ্যমে দুনিয়ার মুসলিম জাতিকে রাসূলুল্লাহ (সাঃ) দ্বিতীয় যে উপদেশ দিচ্ছেন তাহলো, তুমি বা তোমরা সদা-সর্বদা আল্লাহর প্রতি অর্থাৎ আল্লাহর সন্তুষ্টি এবং হক বা অধিকারের প্রতি খেয়াল রাখবে।

বান্দার প্রতিটা এবাদত-বন্দেগী হবে একমাত্র আল্লাহ তাআ'লার সন্তুষ্টির জন্যে, রাজি-খুশির জন্যে। অন্য কোনো ব্যক্তি বা সত্তার সন্তুষ্টির জন্যে নয়। এ বিষয়ে আল্লাহ নিজেই বান্দাকে জানিয়ে দিয়েছেন-

إِنَّ صَلَاتِي وَنُسُكِي وَمَحْيَايَ وَمَمَاتِي لِلَّهِ رَبِّ
الْعَالَمِينَ

(বলো) নিশ্চয়ই আমার নামায, আমার কুরবানী, আমার জীবন ও মরণ একমাত্র বিশ্ব প্রতিপালক আল্লাহ তাআ'লার জন্য। (আনয়াম-১৬২)

সুতরাং প্রতিটা এবাদত-বন্দেগী করার সময় একমাত্র আল্লাহরই সন্তুষ্টির প্রতি খেয়াল রাখতে হবে। সাথে সাথে আল্লাহর হক বা অধিকারের প্রতিও খেয়াল রাখতে হবে।

আল্লাহর হক বা অধিকার হলো আল্লাহর জাত, আল্লাহর সifat এবং তাঁর ক্ষমতার সাথে কাউকে শরীক না করা। কোনো কিছুকে সমকক্ষ না বানানো।

আল্লাহর হক বা অধিকারের কথা হযরত মু'আজ (রাঃ) বুঝাতে গিয়ে রাসূল (সাঃ) বলেন :

فَإِنَّ حَقَّ اللَّهِ عَلَى الْعِبَادِ أَنْ تَعْبُدُوهُ وَلَا يُشْرِكُوا بِهِ
شَيْئًا-

বান্দার কাছে আল্লাহর হক বা অধিকার হলো এই, তারা এমন ভাবে আল্লাহর এবাদত করবে যে, তাঁর সাথে কাউকে শরীক করবে না। (বুখারী মুসলিম)

যদি কেউ আল্লাহর প্রতি অর্থাৎ তাঁর সন্তুষ্টি এবং অধিকারের প্রতি খেয়াল রাখে তাহলে এর বিনিময়ে আল্লাহকে কাছে পাওয়া যাবে। আল্লাহ তখন সেই বান্দার কাছের এবং নিকটের হয়ে যাবেন। অর্থাৎ আল্লাহ এসব বান্দাদের দুনিয়ায় যেসব অনিষ্ট এবং পাপের কাজ আছে তা থেকে তাকে হেফাজত করবেন, দূরে রাখবেন। অপরপক্ষে পরকালীন জীবনেও যতো প্রকার অনিষ্ট এবং বিপদ আছে তা থেকে রক্ষা করবেন, যেমন কবর এবং কিয়ামতের আযাব থেকে রক্ষা করবেন, হাশরের ময়দানের ভয়াবহতা থেকে হেফাজত করবেন, বিচারের দিনের হেসাব সহজ করে জাহান্নামের কঠিন আযাব থেকে রক্ষা করে জান্নাত দান করবেন। কেননা আল্লাহর হক আদায়ের কারণে এটা বান্দার হক বা পাওনা হয়ে যায়। এ সম্পর্কে রাসূল (সাঃ) হযরত মু'আজকে বান্দার অধিকারের কথা উল্লেখ করে বলেন-

وَحَقُّ الْعِبَادِ عَلَى اللَّهِ أَنْ لَا يُعَزَّزَ مِنْ لَا يُشْرِكُ بِهِ شَيْئًا

আর আল্লাহর উপরে বান্দার হক বা অধিকার হলো এই যে, যে ব্যক্তি তাঁর সাথে কোনো কিছুকে শরীক করবে না, তিনি তাকে (জাহান্নামের) শাস্তি দেবেন না। (বুখারী মুসলিম)।

অতঃপর রাসূল (সাঃ) বলেন :

وَإِنِّي سَأَلْتُ فَاسَأَلَ اللَّهُ যখন তুমি কোনো কিছু চাইবে তখন একমাত্র আল্লাহর কাছেই চাইবে।

বালক ইবনে আব্বাসকে রাসূলুল্লাহ (সাঃ) তৃতীয় যে গুরুত্বপূর্ণ কথা বা উপদেশ দিচ্ছেন তা হলো, পার্থিব এবং পারলৌকিক কোনো কিছু চাইতে হলে একমাত্র আল্লাহর কাছেই চাইবে। কেননা মানুষের দুনিয়ায় চাওয়া-পাওয়ার যা আছে তা আল্লাহর কাছেই আছে। চাইতে হলে তাঁর কাছেই চাইতে হবে। কোনো মানুষ বা অন্য কারো কাছে চাওয়া যাবে না। কেননা দুনিয়ায় শান্তি এবং আখেরাতের মুক্তি একমাত্র আল্লাহ পাকই দিতে পারেন, কোনো মানুষ বা অন্য কোনো সত্তার

পক্ষে তা সম্ভব নয়। মানুষের রুজি-রোজগার থেকে শুরু করে যা চাওয়া-পাওয়ার আছে সব কিছুই দেয়ার ক্ষমতা রাখেন একমাত্র আল্লাহ তাআলা। সুতরাং চাইতে হলে একমাত্র আল্লাহর কাছেই চাইতে হবে।

وَإِذَا اسْتَعْنَيْتَ فَاسْتَعِذْ بِاللَّهِ -এবং কোনো ব্যাপারে সাহায্য প্রার্থনা করতে হলে আল্লাহর কাছেই প্রার্থনা করবে। এখানে আল্লাহর রাসূল (সাঃ) ইবনে আব্বাস সহ গোটা উম্মতকে বলছেন, যদি কোনো কিছুর সাহায্য সহযোগীতার প্রয়োজন হয়, তাহলে আল্লাহর কাছেই সাহায্যের জন্যে প্রার্থনা করবে, তার কাছেই ফরিয়াদ করবে, তার কাছেই হাত পাতবে। কেননা কোনো মানুষের পক্ষে মানুষের অভাব-অনটন, দুঃখ-বেদনা, বিপদ-আপদ দূর করা এবং সাহায্য সহযোগীতা করা সম্ভব নয়। এসব করার ক্ষমতাও কারো নেই। ক্ষমতা আছে একমাত্র আল্লাহ তাআলার। সুতরাং ফরিয়াদ বা প্রার্থনা করতে হলে কেবলমাত্র আল্লাহর কাছেই করতে হবে, অন্য কারো কাছে নয়।

কিন্তু আমাদের সমাজে দেখা যায় মূর্খতা এবং দুর্বল ঈমানের কারণে মানুষ যখন কোনো বিপদ-আপদে পড়ে, তখন ছুটে যায় পীরের দরবারে, খানকা শরীফে, মাজারে। চাকুরী পাওয়া, ব্যবসা-বাণিজ্যে লাভবান হওয়া, বিবাহ-সাদী হওয়া, সন্তান লাভ করা ইত্যাদি বিষয়ে প্রার্থনার জন্য টাকা-পয়সা, খাসি, মুরগী ইত্যাদি নিয়ে ছুটে যায় মাজারে, পীরের দরবারে। এটা যে কতো বড় অপরাধ; কতো বড় বিদআত এবং শিরক; এর পরিণতি যে কতো ভয়াবহ কেবলমাত্র তারাই জানে যারা প্রকৃত জ্ঞানী, ঈমানদার, খোদাভীরু। সুতরাং হাদীসের এই অংশের উপদেশ থেকে এটাই শিক্ষণীয় যে, কোনো কিছুর সাহায্য চাইতে বা প্রার্থনা করতে হলে একমাত্র আল্লাহর কাছেই করতে হবে। এবং তাঁরই কাছে ধরণা দিতে হবে। অন্য কারো কাছে নয়।

হাদীসের পরবর্তী অংশে আল্লাহর রাসূল আরো উপদেশ দিয়ে ইবনে আব্বাসকে বলেন :

وَأَعْلَمُ أَنَّ الْأُمَّةَ لَوِ ارْجَمَعَتْ عَلَى أَنْ يَنْفَعُوكَ بِشَيْءٍ
لَمْ يَنْفَعُوكَ إِلَّا بِشَيْءٍ قَدْ كَتَبَهُ اللَّهُ لَكَ-

যেনে রেখ, গোটা জাতিও যদি তোমার উপকার বা কল্যাণ করার জন্য

ঐক্যবদ্ধ হয়, তাহলে কেবলমাত্র ততটুকুই উপকার করতে পারবে, যতটুকু আল্লাহ তোমার জন্যে লিখে রেখেছেন।

রাসূলুল্লাহ (সাঃ) ইবনে আব্বাসের মাধ্যমে গোটা উম্মাতকে অবহিত করছেন। হাদীসের মধ্যে উপরে বর্ণিত যেসব বিষয়গুলো পালনের জন্য উপদেশ দেয়া হয়েছে তার ব্যাপারে পূর্ণ আস্থা অর্জনের জন্য তিনি আল্লাহর একক ক্ষমতা এবং মানুষের সীমাবদ্ধ ক্ষমতার কথা উল্লেখ করে তিনি বলেন : এটা তোমার বা তোমাদের জানা থাকা উচিত যে, আল্লাহ এতো অসীম ক্ষমতার অধিকারী এবং মানুষের ক্ষমতা এতো সীমিত যে, গোটা মানব জাতিও যদি ঐক্যবদ্ধ হয়ে তোমার বা তোমাদের কারো কোনো উপকার বা কল্যাণ করতে চায়, তাহলে ততোটুকু পরিমাণই উপকার করতে পারবে যতটুকু আল্লাহ তোমাদের জন্য নির্ধারণ করে রেখেছেন। এ থেকে বুঝা যায় যে, আল্লাহর এখতিয়ার ছাড়া মানুষ মানুষের কোনো উপকারই করতে পারে না। এই ক্ষমতার অধিকারী একমাত্র আল্লাহ তা'আলা। সুতরাং সাহায্য যদি চাইতেই হয় তাহলে ক্ষমতাহীন মানুষের কাছে কেন, মহান এবং একক ক্ষমতাদারী একমাত্র আল্লাহর কাছেই সাহায্যের জন্য প্রার্থনা করতে হবে, ফুরিয়াদ করতে হবে, ধর্না ধরতে হবে।

অতঃপর মানুষের ক্ষতি করার ক্ষমতার কথা উল্লেখ করে রাসূল বলেন :

وَلَوْ اجْتَمَعُوا عَلَىٰ أَنْ يَضُرُّوكَ بِشَيْءٍ لَمْ يَضُرُّوكَ إِلَّا بِشَيْءٍ قَدْ كَتَبَهُ اللَّهُ عَلَيْكَ-

আর গোটা জাতিও যদি তোমার ক্ষতি করার জন্য ঐক্যবদ্ধ হয়, তাহলে কেবল ততোটুকুই ক্ষতি করতে পারবে, যতটুকু আল্লাহ তোমার ভাগ্যে লিখে রেখেছেন।

হাদীসের এই অংশে রাসূলে খোদা (সাঃ) ইবনে আব্বাসের মাধ্যমে গোটা জাতিকে নির্ভয় এবং সাহস দিয়ে বলছেন যে, যদি গোটা জাতি ঐক্যবদ্ধ হয়ে তোমাদের কোনো ক্ষতি করার জন্য ঐক্যবদ্ধ হয়, তারা তোমার ততটুকু ক্ষতি করতে পারবে যতটুকু আল্লাহ ভাগ্যে লিখে রেখেছেন।

এখানেও রাসূলুল্লাহ (সাঃ) আল্লাহর একক ক্ষমতা এবং মানুষের সীমাবদ্ধ ক্ষমতার কথা উল্লেখ করেছেন। যেহেতু মানুষের ক্ষতি করার কোনো ক্ষমতা বা এখতিয়ার নেই, তাহলে মানুষ মানুষকে কেন এতো ভয়? মানুষের কাছে কেন

এতো তওয়াজ ? মানুষের কাছেই বা কেন এত ধর্না? ভয় করতে হলে কেবলমাত্র আল্লাহকেই করতে হবে। তওয়াজ করতে হলে একমাত্র আল্লাহকেই করতে হবে এবং ধর্না ধরতে হলে কেবলমাত্র আল্লাহর কাছেই ধরতে হবে। অথচ সমাজে মানুষকে দেখা যায়, দুনিয়ার ক্ষমতা, অর্থ-সম্পদ এবং অস্ত্রের দাপটের কারণে মানুষ মানুষকে দেখে ভয়ে ভীত হয়ে পড়ে, এমনকি ঈমান পর্যন্ত হারিয়ে ফেলে। অথচ আল্লাহর অনুমতি ছাড়া কারো ক্ষতি করার কোনো ক্ষমতা নেই।

সুতরাং আল্লাহ যদি কারো উপকার বা কল্যাণ করতে চান তাহলে সারা দুনিয়ার মানুষও যদি ঐক্যবদ্ধভাবে ঠেকানোর চেষ্টা করে তবে তাদের পক্ষে ঠেকানো যেমন সম্ভব নয়, তেমনি যদি আল্লাহ কারো ক্ষতি করতে চান, তাহলে গোটা দুনিয়ার মানুষও যদি ঐক্যবদ্ধভাবে ক্ষতি থেকে বাঁচানোর চেষ্টা চালায় তাহলে তার ক্ষতি থেকে কেউ তাকে উদ্ধার করতেও পারবে না।

সুতরাং মুমিন, মুসলমান, খোদাভীরু লোকদের আল্লাহর প্রতি এই আস্থা রাখতে হবে যে, উপকার করার মালিকও আল্লাহ এবং ক্ষতি বা লোকসান করার মালিকও আল্লাহ। কোনো মানুষ কিম্বা অন্য কোনো সত্তা নয়। হাদীসের সর্বশেষ অংশে রাসূলুল্লাহ (সাঃ) বলেন : **رُفِعَتْ إِلَّا قَلَامٌ وَجَفَّتِ الصُّحُفُ**

কলম উঠিয়ে নেয়া হয়েছে এবং লিখিত কাগজসমূহও শুকিয়ে গেছে।

এখানে কলম উঠিয়ে নেয়া হয়েছে মানে মানুষের ভাগ্যে যা লিখার তা লিখা হয়ে গেছে, দ্বিতীয়বার আর কিছু লিখা হবে না। আর লিখা কাগজগুলো শুকিয়ে গেছে মানে হলো কালির সাহায্যে কাগজে মানুষের ভাগ্যে যা লিখা হয়ে গেছে তা শুকিয়ে গেছে, অর্থাৎ ভাগ্যে যা লিখা হয়ে গেছে তা আর পরিবর্তন করা যাবে না, লিখিত পড়িত হয়ে গেছে।

সুতরাং মানুষের কোনো পরওয়া না করে আল্লাহর উপর ভরসা করে সকল কাজ চালিয়ে যেতে হবে।

তবে এই কথার দ্বারা এখানে কিছু বিভ্রান্ত হবার সুযোগ আছে। তা হলো অনেকে এ ভেবে বিভ্রান্ত হয়ে যায় যে, ভাগ্যে যা ছিলো তা তো লিখা হয়েই গেছে তাহলে কাজ করে লাভ কি ? যা ভাগ্যে লিখা আছে তাই হবে, এই বলে তারা ঈমানচ্যুত হয়ে যায়। আসলে তো এর মাধ্যমে আল্লাহর প্রতি মানুষের

ঈমান, আস্থা, ভয় এবং তায়াক্কুল বেড়ে গিয়ে পাক্কা ঈমানদার, তাকওয়াবান ও খোদাভীরু হয়ে যাবার কথা। কেননা ভাগ্যে কি লিখা আছে মানুষ তো আর জানে না। সুতরাং এই কারণেই মানুষকে চেষ্টা চালিয়ে যেতে হবে এবং ভাগ্যের পরিবর্তনের জন্য আল্লাহর কাছে দো'আ করতে হবে। কেননা অপর এক হাদীসে রাসূলুল্লাহ (সাঃ) বলেন :

الْبَاطِلُ لَا يَرْزُقُ إِلَّا بِادْوَعَا ॥ ভাগ্য পরিবর্তন হয় না দোআ ছাড়া।

সুতরাং এই হাদীস দ্বারা বুঝা যায় দোআ'র মাধ্যমেই ভাগ্য পরিবর্তন হতে পারে। দোআ বলতে এতে দুটো অর্থ রয়েছে। একটা হলো চেষ্টা-প্রচেষ্টা এবং অপরটি হলো আল্লাহর সাহায্য। অতএব নিজের চেষ্টা এবং আল্লাহর সাহায্য হলেই কেবলমাত্র ভাগ্যের পরিবর্তন হলেও হতে পারে, অন্য কোনো পথে বা পন্থায় নয়।

হাত-পা ছেড়ে দিয়ে আল্লাহর কাছে ভাগ্যের পরিবর্তনের জন্য দোআ করলে আল্লাহ এসব অকর্মণ্য, অলস, নির্বোধ লোকদের ভাগ্যের পরিবর্তন ঘটান না। এই হাদীস দ্বারা এটাই বুঝানো হয়েছে যে, আল্লাহর এখতিয়ার ছাড়া মানুষ মানুষের উপকারও করতে পারে না, ক্ষতিও করতে পারে না। সুতরাং ভয় যদি কাকেও করতেই হয় তবে আল্লাহকেই করতে হবে। কোনো মানুষ কিম্বা অন্য কোনো সত্তাকে নয়। মহান আল্লাহ বলেন :

وَمَا بِمُسْتَيْبَةٍ إِلَّا بِإِذْنِ اللَّهِ ॥

আল্লাহর অনুমতি ছাড়া কোনো বিপদ মুসিবত হয় না।

শিক্ষা : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসের যে ব্যাখ্যা পেশ করা হলো এ থেকে আমাদের জন্য যেসব শিক্ষণীয় রয়েছে তা হলো—

❖ দুনিয়া এবং আখেরাতে আল্লাহর পক্ষ থেকে নিরাপত্তা লাভ করতে হলে আল্লাহর বিধি-নিষেধের হেফাজত করতে হবে। অর্থাৎ আল্লাহর সকল আদেশ নিজে মানতে হবে এবং সামাজিক ভাবে প্রতিষ্ঠা করতে হবে। অনুরূপভাবে আল্লাহর নিষিদ্ধ বিষয় গুলোও ব্যক্তিগত ভাবে এবং সামাজিক ভাবে পরিত্যাগ করতে হবে।

✳ আল্লাহকে কাছে পেতে হলে আল্লাহর সন্তুষ্টির জন্যই কেবলমাত্র তাঁর এবাদত-বন্দেগী করতে হবে এবং আল্লাহর হুক আদায় অর্থাৎ শিরক থেকে দূরে থাকতে হবে।

✳ পার্থিব অথবা পারলৌকিক কোনো কিছু চাইতে হলে মানুষের কাছে নয় বরং আল্লাহর কাছেই চাইতে হবে। আল্লাহর কাছেই হাত পাততে হবে। কেননা কোনো কিছু দেবার ক্ষমতা আল্লাহ ছাড়া আর কারো নেই।

✳ কোনো কিছু বিষয়ে বা ব্যাপারে যেমন- অভাব-অনটন থেকে মুক্ত হওয়া, বিপদ-আপদ দূর করা, রুজি-রোজগারের ব্যবস্থা করা এবং দুনিয়ার আর অন্যান্য যেসব বিষয়ের সমাধানের জন্য সাহায্যের প্রয়োজন, তা মানুষের কাছে না বলে আল্লাহর কাছেই বলতে হবে। কেননা এসবের এখতিয়ার একমাত্র আল্লাহ তাআলার।

✳ মানুষের উপকার এবং কল্যাণ করার মালিক হলেন আল্লাহ তাআলা। সুতরাং এটা জানা থাকা উচিত যে, সারা পৃথিবীর মানুষও যদি একতাবদ্ধ হয়ে উপকার করার চেষ্টা করে, তার পরেও কেউ এক চুল পরিমাণ উপকার করতে পারে না যতটুকু আল্লাহ তার জন্য লিখে রেখেছেন।

✳ সারা পৃথিবীর মানুষও যদি কারো ক্ষতি করার চেষ্টা করে তবে ততটুকু পরিমাণই ক্ষতি করতে পারবে, যতটুকু তার ভাগ্যে আল্লাহ লিখে রেখেছেন।

✳ আল্লাহ তাআলা মানুষ পয়দা করার পর প্রত্যেকের ভাগ্য লিপিবদ্ধ করে দিয়েছেন। এই কথার দ্বারা বিভ্রান্ত না হয়ে বরং আল্লাহর প্রতি পূর্ণ ঈমান ও তাকওয়া অবলম্বন করে ভালো এবং কল্যাণকর কাজ করা আর ভাগ্যের পরিবর্তনের জন্য কর্ম এবং দোআর মাধ্যমে সর্বাঙ্গক চেষ্টা চালাতে হবে। হাত-পা ছেড়ে দিয়ে বসে থাকা যাবে না। এটা মূর্খতার কাজ। গোমরাহীদের কাজ।

আহবান : প্রিয় ভায়েরা/বোনেরা! এতক্ষণ পর্যন্ত আপনাদের সামনে হাদীসের ব্যাখ্যা এবং শিক্ষা তুলে ধরতে গিয়ে যদি আমার অজান্তে কোনো ত্রুটি-বিচ্যুতি হয়ে যায় তার জন্য মহান আল্লাহর কাছেই ক্ষমা চাচ্ছি। আর এই হাদীস থেকে যেসব শিক্ষা আমরা লাভ করলাম তা যেন বাস্তব জীবনে আম'ল করতে পারি সেই তাওফিক কামনা করে দারস শেষ করছি।

সমাপ্ত

স্ক্যানিং পি ডি এফ ও সম্পাদনা:-

আব্দুল মালিক তালুকদার

<http://quransunnahrato.wordpress.com>

abdulmaliktalukder@gmail.com

তারিখ:- ২১/০৮/২০১৩

بِسْمِ اللَّهِ الرَّحْمَنِ الرَّحِيمِ

তোমরা আমাকে স্মরণ কর
আমিও তোমাদের স্মরণ রাখবো,
এবং আমার কৃতজ্ঞতা প্রকাশ কর,
অকৃতজ্ঞ হয়ো না।

সূরা আল-বাকারা : ১৫২

بِسْمِ اللَّهِ الرَّحْمَنِ الرَّحِيمِ

اَللّٰهُمَّ اَنْتَ رَبِّىْ لَا اِلٰهَ اِلَّا اَنْتَ خَلَقْتَنِىْ وَاَنَا عَبْدُكَ وَاَنَا عَلَىٰ عَهْدِكَ
وَوَعْدِكَ مَا اسْتَطَعْتُ، اَعُوْذُ بِكَ مِنْ شَرِّ مَا صَنَعْتُ، اَبُوْءُ لَكَ بِنِعْمَتِكَ
عَلَيَّ، وَاَبُوْءُ بِذُنُوبِىْ فَاغْفِرْ لِيْ فَاِنَّهُ لَا يَغْفِرُ الذُّنُوْبَ اِلَّا اَنْتَ ؕ

O Allah! You are my Lord. There is no God besides You, You created me, and I am Your slave
and with all my strength, I remain steadfast to Your promise and I beseech You to forgive me
any evil I perform. I humbly affirm what You bestow upon me and I plead guilty to my sins.
Forgive me. For besides You there is none to forgive me.

Sayyidul Istighfar

Shaddad bin Aus رضي الله عنه narrates that Rasoolullah ﷺ states that Sayyidul Istighfar
(the most loftiest of all types of repentance), is that a servant says the above once.

রাসূলুল্লাহ সাঃ বলেন, ‘যে ব্যক্তি ইচ্ছা করে আমার নামে মিথ্যা হাদীস রচনা করে সে যেন তার ঠিকানা জাহান্নামে ঠিক করে নেয়’। -বুখারী

লেখকের অন্যান্য বই

- ❖ দারসে কুরআন - ১ম খন্ড
- ❖ দারসে কুরআন - ২য় খন্ড
- ❖ নির্বাচিত বিষয়ভিত্তিক হাদীস
- ❖ বাংলা উচ্চারণসহ ১০০ মাসনুন দোয়া
- ❖ ‘সংকলন’ (বিষয় ভিত্তিক কুরআন হাদীস) - ১ম খন্ড
- ❖ ‘সংকলন’ (বিষয় ভিত্তিক কুরআন হাদীস) - ২য় খন্ড
- ❖ ‘সংকলন’ (বিষয় ভিত্তিক কুরআন হাদীস) - ৩য় খন্ড
- ❖ ইসলামী সংগঠন ও প্রশিক্ষণ
- ❖ দারসে হাদীস ১ম খন্ড
- ❖ কুরআন হাদীসের আলোকে পাঁচদফা কর্মসূচী



সাহাল প্রকাশনী